

**Mey-maaya-mawiya masa  
Matiye  
ma wuzlala  
Mey da ray  
Mey-maaya-mawiya masa  
Matiye ma wuzlala**

Matiye a wuzlala Mey-maaya-mawiya na, gweegwe letek ta masa Mark leŋ Luk ma wuzlalamara. Ata tabiya a wuzlalam:

- mey da ray Jan-Baptis ma zelta ndəhay nga mbəddamara menjey ata
- mey da ray baptem nga Yesu
- mey da ray bay-malula ma wufey nga bata Yesu daa masa anga fa key daliyam da wuzlah-ley
- mey da ray Yesu ma zla sləra anga daa hwayak ngab Galile
- mey da ray Yesu ma daw aa berney nga Jeruzelem
- mey da ray meməcey nga Yesu da Jeruzelem
- mey da ray masləkdawa nga Yesu daa meməcey

Matiye na, anga ndaw ma cakala budaw nga ngwamna nga Rawm. Ama Yesu a zəla nga səpa. Da ray ngene, ta', a mbəkda sləra anga, a daw asiya. Ara ndaw da wuzlah gula hay nga Yesu kuraw a ray a cew.

Matiye a wuzlala dərewel anga na, ngada ndəhay Jəwif hay. A zla dərewel anga na, ta

mezøley nga ndøhay daa sækway nga Yesu amba a wuzda Yesu aa daa sækway nga Abøraham. Aa guzley da ray mayawa nga Yesu. A wufey amba Jøwif hay a sørmara fara fara Yesu na, ara ndaw masa Gazlavay ma wala nga løhdata ndøhay daa mebørey, asaya, amba a sørmara ara anga masa ndøhay maa guzlam da ray a daa Mejøwey-mey Magurma.

Matiye ta wuzleley mey la ga masa Yesu maa guzlda. Daa fasølawal 5 haa 7 na, ara mey masa Yesu ma wuzda da angwaa. Daa fasølawal 13 mey-menjey hay daha ta meesørkedey hay mekele mekele da ray mewey nga Gazlavay da ray ndøhay. Daa fasølawal 24 ta 25 ara mey da ray menjey nga ndøhay nga Yesu daa masa ata fa sækwmara anga ma da vøhwa nga zøma bay anga.

Daa mezley nga ðerewel e, mey mawu-zlalakaya da ray Yesu daha, a løvey: «A da zølmara Emanøwel, anda meløvey, Gazlavay aa ta aløkwa.» (1.23) Daa mendøvey a, Matiye a wuzleley mey da ray Yesu ma løvey: «Sørmara, yah na, yah ta akwar mandaw mandaw haa mendøvey nga bøla.» (28.20)

Daa ðerewel e kedde na, mey mekele mekele daha nga vøley gødan a ndøhay:

Mey da ray maaya nga Gazlavay da ray ndøhay (5.3-10)

Sløra masa Yesu ma vøldatara a gula anga hay nga key (28.19-20)

*Mezley nga sækway nga Yesu Køriste  
(Luk 3.23-38)*

<sup>1</sup> \*Yesu \*Kəriste na, ara səkway nga Bay \*Davit. Davit e may, a yawa daa səkway nga \*Abəraham. Ndəhay daa səkway nga Yesu Kəriste he na, a zley ta Abəraham.

<sup>2</sup> Abəraham a na, anğa papan nga \*Izak. Izak may, papan nga Jakwap.

Jakwap, papan nga ata Juda ta məlmaha hay.

<sup>3</sup> Juda, papan nga ata Fares ta Zerah ma yatərwa ta nğwas anğa mezəley Tamar.

Fares, papan nga Esranw.

Esranw, papan nga Aram.

<sup>4</sup> Aram, papan nga Aminadap.

Aminadap, papan nga Naasanw.

Naasanw, papan nga Salman.

<sup>5</sup> Salman, papan nga Bəwaz ma yarawa ta nğwas anğa \*Rahap.

Bəwaz, papan nga Awbet ma yarawa ta nğwas anğa Rut.

Awbet, papan nga Jese.

<sup>6</sup> Jese, papan nga Bay Davit.

Davit e na, anğa papan nga Salamanw. Mamaha ta key nğwas nga Uri la.

<sup>7</sup> \*Salamanw, papan nga Rabəwam.

Rabəwam, papan nga Abiyah.

Abiyah, papan nga Asaf.

<sup>8</sup> Asaf, papan nga Jawzafat.

Jawzafat, papan nga Jəwaram.

Jəwaram, papan nga Awzijas.

---

**1:1** 1.1 Rm 1.3-4; 2Tm 2.8; Mt 20.30-31      **1:2** 1.2 MC 21.2-3; 25.26; 29.32-30.24      **1:3** 1.3 MC 38.29-30; Rut 4.18-22      **1:5** 1.5 Rahap: Jes 2.1-24; Rut ta Bəwaz: Rut 1-4      **1:6** 1.6 2Sam 11-12  
**1:7** 1.7 1Mev 11.31-13.23      **1:8** 1.8 2Mev 13.23-21.20; 26.1

<sup>9</sup> Awziyas, papan nga Jəwatam.

Jəwatam, papan nga Akaz.

Akaz, papan nga Ezekiyas.

<sup>10</sup> Ezekiyas, papan nga Manase.

Manase, papan nga Amanw.

Amanw, papan nga Jawziyas.

<sup>11</sup> Jawziyas, papan nga ata Yekwaniya ta  
məlmaha hay,

a yatərwə daa masa ndəhay daa hwayak nga

\*Babilanw

ma həlmata \*Israyel hay aa hwayak ata.

<sup>12</sup> Fa dəba ha masa ata ma həlmata la a  
Babilanw a na,

Yekwaniya a yawa Salatiyel.

Salatiyel, papan nga Zarubaabel.

<sup>13</sup> Zarubaabel, papan nga Abiyut.

Abiyut, papan nga Eliyakim.

Eliyakim, papan nga Azawr.

<sup>14</sup> Azawr, papan nga Sadakw.

Sadakw, papan nga Akim.

Akim, papan nga Eliyut.

<sup>15</sup> Eliyut, papan nga Eliyazar.

Eliyazar, papan nga Matan.

Matan, papan nga Jakwap.

<sup>16</sup> \*Jakwap, papan nga \*Jawzef, zel nga \*Mari  
ma yarawa Yesu ma zəlmara Kəriste, anda  
meləvey,

ndaw masa Bay \*Gazlavay ma wala nga  
ləhdata ndəhay.

<sup>17</sup> Anda keđe, dōga fa Abərahāma haa kasl fa Davit na, dedeŋ ŋga dedeŋ hay kuraw a ray a məfad. Dōga fa Davit e may haa kasl ta pas masa ata ma həlmata Israyel hay a Babilanw na, dedeŋ ŋga dedeŋ hay kuraw a ray a məfad. Yaw, dōga ta pas a ŋgene kasl fa mayawa ŋga Kəriste na, dedeŋ ŋga dedeŋ hay kuraw a ray a məfad saya.

*Mey da ray mayawa ŋga Yesu Kəriste  
(Luk 2.1-7)*

<sup>18</sup> Ehe cəndamara mey da ray mayawa ŋga Yesu \*Kəriste. \*Mari mamaha na, ara kwakwa ŋga \*Jawzef. Daa masa Jawzef ta la Mari a way anŋa daa ba aran na, Mari ta key hwad sem ta gədan ŋga \*Mesəfney ŋga Gazlavay.

<sup>19</sup> Jawzef, mangasl ŋga Mari na, ara ndaw maaya ta lenŋesl. Daa masa aa ma cənda Mari ta key ta hwad sem na, a wudəy a par hwaray fa dey ŋga ndəhay ba. Da ray ŋgene, a wulkey ŋga mbəkda kwakwa anŋa, ama a wudəy ŋga mbəkda na, kwa ndaw a səra mey a ba. <sup>20</sup> Daa masa Jawzef fa wulkey da ray mey a na, \*maslan ŋga Bay Gazlavay da vad ta', a sawa a ray a, aa guzlar daa mesəfney, a ləvar: «Jawzef, səkway ŋga \*Davit, ka da zlurey ŋga la kwakwa akah Mari ba, maja a key ta hwad ŋgene na, ara ta gədan ŋga Mesəfney ŋga Gazlavay. <sup>21</sup> A yawa bəzey mezəle la, ka da par mezəley Yesu, maja a da ləhdata ndəhay anŋa hay daa mebərey ata hay.»

<sup>22</sup> Cek aha keđe cəpa ta key la anda Gazlavay maa guzlwa zleezle ta mey \*ndaw ma təla mey anğa, ma ləvey:

<sup>23</sup> «Nəka taw! dam-sabara a key ta hwađ la manjar zel,

a da yawa bəzey mezəle.

A da zəlmara Emanəwel»,

anda meləvey, Gazlavay aa ta aləkwa.

<sup>24</sup> Jawzef a sləkdey daa đar, fa dəba ha a ka anda maslan ɲga Bay Gazlavay ma ləvar heyey. Leɲ! a la kwakwa anğa Mari a way, <sup>25</sup> ama ta cəmam cew e daa ba, haa kasl mayawa ɲga bəzey a. Jawzef a par mezəley Yesu.

## 2

*Mey da ray ndəhay ma səra mey da ray wurzla hay*

<sup>1</sup> Yesu a yawa da Betəlehem daa hwayak ɲga \*Jude, daa masa \*Herawt anğa bay ɲga hwayak a. Fa dəba ɲga mayawa anğa, ndəhay ma səra mey da ray wurzla hay a samawa ta da wurza aa berney ɲga \*Jeruzelem. <sup>2</sup> Aa cəfdamara, a ləvam: «Bəzey masa ata ma yamərwa ma da key bay ɲga \*Jəwif hay heyey na, anğa dama? Ya ta hətmərwa wurzla anğa la ma bawa ta da wurza. Anda keđe, ya samawa na, amba ya ragadamar.»

<sup>3</sup> Bay Herawt ma cənda mey a keđe na, rav anğa a jəvey ga, asaya, ndəhay daa berney ɲga Jeruzelem tabiya rav a jəvtar may. <sup>4</sup> Ta', a zəltərwa \*bay-ray hay ɲga ndəhay ma ka

---

**1:23** 1.23 Iz 7.14    **1:25** 1.25 1.21    **2:2** 2.2 Lk 2.4-7; bay ɲga Jəwif hay: Mt 27.11

kwakwas nga Gazlavay, ta ndəhay maa sərkada \*kwakwas nga Mawiz, aa cəfdəta, a ləvtar: «\*Kəriste, ndaw masa Gazlavay ma wala nga key bay na, a da yawa dama?» <sup>5</sup> A mbəddamara, a ləvmar: «A da yawa da Betəlehem daa hwayak nga Jude. Ya səmərə maja \*ndaw ma təla mey nga Gazlavay ta wuzleley la da ray a zleezle, a ləvey:

<sup>6</sup> «Akwar, ndəhay da Betəlehem daa hwayak nga Jude na, slala akwar aa mahura da wuzlah slala hay mahura hay da Jude, maja ara da slala ha ngene yah ma da bawa bay ma da nəkey dey fa ndəhay adaw hay Israyel hay.»

<sup>7</sup> Fa dəba ha, Bay Herawt a zəltərwa ndəhay ma səra mey da ray wurzla hay heyey ta mayal a, amba aa cəfdəta wurzla ha a bawa na, ta pas wura. <sup>8</sup> Ta', a slərdata a Betəlehem, a ləvtar: «Diyam a Betəlehem, səmərə bəzey a ta dək-vaw. Da masa akwar ma hətmərwa la na, ka samawa, ka wuzdamiwa, amba ya daw, ya ragadar may.»

<sup>9</sup> Ndəhay a ma cəndamara mey nga bay a cay na, ta', a diyam. Masa ata daa cəved na, a hətmar wurzla masa ma bawa ta da wurza heyey fa daw fa mey ata. Wurzla ha fa daw fa mey fa mey, a wusey kasl aa slam masa bəzey mecəhe anga da hwaɗ a heyey na, deŋ! a lecey a ray way a. <sup>10</sup> Masa ata ma hətmar wurzla malacakaya heyey na, aa səmam ga, ara mey ba. <sup>11</sup> A wusam aa slam aha, ta', a mbəzam aa

way a, a hœtfamar bœzey a ta mamaha \*Mari. A hœlmamara, a ragadamar. Cay, ta', a pœskamata gabal ata hay, a vœlmar cek hay ma hœdkam ba. A vœlmar bœrey mewedey pœlŋged pœlŋged ta matøway ŋga wudez mezey maaya, leŋ slalak mezey maaya mezøley «\*mir». <sup>12</sup> Fa dœba ha, mesœfney a katar. Daa mesœfney a na, Gazlavay a kœtata ŋga diyam ta fa Bay Herawt saba. Maja ŋgene, ta', a lam cœved mekele ŋga vœhey aa hwayak ata.

*Ata Jawzef ta Mari a hwam aa hwayak ŋga Ejiþ*

<sup>13</sup> Daa masa ndøhay ma sœra mey da ray wurzla hay heyey ma diyam sem na, ta', \*maslaŋ ŋga Bay Gazlavay a wuzar vaw a \*Jawzef daa mesœfney, a lœvar: «Slœkdœy, la bœzey, hwam ta mamaha aa hwayak ŋga \*Ejiþ. Njamawa fetede, haa kasl pas masa yah ma da lœvkwar ŋga vœhwa, maja Bay \*Herawt a da sœpa bœzey a amba a kœfa vagay.»

<sup>14</sup> Masa Jawzef ma cœnda mey a kedœ la na, pœrta! a slœkdœy, leŋ! a la bœzey a, a sœhwam ta mamana ŋga bœzey a dasi tavad a ŋgene a Ejiþ. <sup>15</sup> A njamawa fetede haa kasl memœcey ŋga Bay Herawt. Cek aha ta key la anda Gazlavay maa guzley ta mey \*ndaw ma tœla mey anga zleezle, ma lœvey: «Ya ta zœlœrwa bœzey adaw daa hwayak ŋga Ejiþ la.»

*A kœfmata bœza hay mezøle da slala Betølehem*



16 Bay \*Herawt ma səra ndəhay ma səra mey da ray wurzla hay heyey ta fəcmara sem na, mevel a car ga! Ta', a slərey ndəhay anğa hay nğa kədmata bəza hay mezəle da Betəlehem ta bəza hay masa gweegwe ta slala ha tabiya vagay. A wudəy nğa kədey vagay na, bəza hay masa ma yamawa təlām haa kasl fa bəza hay mevey cew. A kədtā bəza hay mecəhe hay a anda ngene na, maja anğa ma səra mevey nğa wurzla ma bawa masa anğa ma cənda da mey ndəhay ma səra mey da ray wurzla hay heyey. 17 Mekədey bəza hay a vagay ngene na, ta key la anda Jeremey, ndaw ma təla mey nğa Gazlavay, maa guzley zleezle, a ləvey:

18 «A cəndamara fa wudam ta gədanj da slala Rama,  
matəway ta mewudey sləw a! a ndəvey ba.  
Ara Rasel ma təway bəz anğa hay.  
Mevəl anğa a dəkey ba,  
maja bəz anğa hay a ta məcām sem.»

*Mavəhwa nğa ata Jawzef ta Mari da Ejip*

19 Fa dəba nğa meməcey nğa Bay \*Herawt heyey na, ta', \*maslanj nğa Bay Gazlavay a wuzar vaw a \*Jawzef daa mesəfney daa hwayak nğa \*Ejip heyey, 20 a ləvar: «Sləkdey, la bəzey, vəham ta mamaha aa hwayak nğa \*Israyel, maja ndəhay \* ma səpmara bəzey a nğa kədey vagay heyey na, ta məcām sem dəba.»

21 Cay, Jawzef pərta! a sləkdey, leŋ! a la bəzey, ta', a vəham ta mamanj nğa bəzey a, aa hwayak

---

2:18 2.18 Jer 31.15-16 \* 2:20 2.20 ndəhay: Bay Herawt ta madərlām anğa hay

nga Israyel. <sup>22</sup> A da cōnda na, Arkelawas fa zōma bay nga papaha Herawt daa hwayak nga \*Jude. Da ray ngene, mandərzay a kar, a zlurey nga njeý daa hwayak a. Ta', mesəfney a kar a Jawzef saya. Daa mesəfney a na, Gazlavay a kōta nga daw aa hwayak nga \*Galile. <sup>23</sup> Anda kedē, a daw a njeý aa hwayak a, da slala \*Nezeret. Menjeý anga da slala ha ngene na, ta key la, anda ndəhay ma tōla mey nga Gazlavay, ma kadamara zleezle, ma ləvam: «A da zəlmara bəzey a na, ndaw Nezeret.»

### 3

*Mey da ray sləra nga Jan-Baptis*  
(Mark 1.1-8; Luk 3.1-18; Jan 1.19-28)

<sup>1</sup> Fa dəba ha, ndaw daha mezəley \*Jan-Baptis, a wuzwa vaw da wuzlah-ley daa hwayak nga \*Jude, fa wuzey mey, <sup>2</sup> a ləvey: «Mbəddamara menjeý akwar, səpmara Gazlavay ta mevel pal, maja gweegwe cay, bay nga Gazlavay a wuzwa.»

<sup>3</sup> \*Jan a na, ara ndaw masa \*Izay, \*ndaw ma tōla mey nga Gazlavay zleezle, maa guzley da ray a, a ləvey:

«Ndaw fa wudeý da wuzlah-ley, a ləvey:

Diyamar cəved ngada Bay Mahura,

diymara cəved e maaya maaya dər e.»

<sup>4</sup> Zana fa vaw nga Jan a na, macakaya ta engwec nga slagwama. Vaw anga majəwkaya ta huted. A zəmey na, ayakw ta amam da ley. <sup>5</sup> Ndəhay

---

**2:23** 2.23 Lk 1.26; 2.39, 51; Jan 1.46    **3:2** 3.2 4.17; Lk 3.3    **3:3**  
3.3 Iz 40.3    **3:4** 3.4 2Bay 1.8

daa berney nga \*Jeruzelem ta daa hwayak nga Jude tabiya, lenj daa hwayak hay mekele mekele gweegwe ta wayam nga Jurdenj tabiya a diyam a fa Janj a, <sup>6</sup> a wuzdamara mebørey ata hay. Janj ta', a katar \*baptem daa wayam a.

<sup>7</sup> Da wuzlah ndøhay ma diyam fa Janj a amba a katar baptem na, \*Fariza hay ta \*Saduse hay ga daha. A da høtatar na, fa samawa a fa vøda, ta', aa guzltar, a løvtar: «Hey! akwar bøza hay nga kucesl hay! Ma løvkwar ka løham la daa banay masa Gazlavay ma da handørwa a ray akwar na, wa? <sup>8</sup> Kam cek maaya,

amba ndøhay a sørmara akwar ta mbøddamara menjey akwar sem, akwar fa søpmara Gazlavay ta mevel pal. <sup>9</sup> Ka da wulkam daa mevel akwar, ka løvam: "Papa ala na, ara \*Abøraham, maja ngene, Gazlavay a da sørfandar dey-ceceh." Ka da løvam køne ba, maja ya fa løvkwar fara fara, Gazlavay a gwa nga tørdara anjwa hay kefe nga søkway nga Abøraham may. <sup>10</sup> Zlamba mangakaya cay nga ngømey wudez hay ta slaslalay a cøpa. Wudez ma yey babøza maaya

ba na, a ngømamara, a pamar awaw fa vøda.

<sup>11</sup> Yah na, ya kakwar baptem ta yam, nga wuzwa fara fara akwar ta mbøddamara menjey akwar cay. Ama ndaw ma fønya fa sawa. Anja na, kwa ya wusa nga cøkwra tarak da salay anja ba. Ndaw a na, a kakwar baptem la ta \*Mesøfney nga Gazlavay lenj ta awaw. <sup>12</sup> Anja da gødak

---

**3:7** 3.7 bøza hay nga kucesl hay: 12.34; 23.33; banay: 24.15-25, 37-39    **3:9** 3.9 Lk 1.54-55; Janj 8.39; Rm 2.28-29; 4.12    **3:10** 3.10 7.19    **3:11** 3.11 Lk 3.16

ta vøley mekøfey daw da har, amba a wunka bəz-daw ta cekwesl e. Bəz-daw na, a da həla a wuded. Ama cekwesl e na, a da gəfar awaw a ray a, awaw masa ma məcey ba nga sərmataw.»

*Mey da ray baptem nga Yesu  
(Mark 1.9-11; Luk 3.21, 22)*

<sup>13</sup> Fa dəba ha, Yesu a sawa daa hwayak nga \*Galile, a daw aa wayam nga Jurden fa \*Jan, amba Jan a kar \*baptem. <sup>14</sup> Ama Jan a wufey nga kar baptem e ba, a ləvar: «Am! Anja ma da daw fa kah, amba ka kaya baptem na, yah jak, ba diya? Kaa, ka fa sawa fa yah jak na, kwara?» <sup>15</sup> Yesu a mbəddara, a ləvar: «Ama wure keđe na, təba nga kaya baptem, amba ya kakwa sləra nga Gazlavay masa aa maa cəfda tabiya nga key.» Ta', Jan a, a təba nga kar baptem e. <sup>16</sup> Masa Yesu ma hətey baptem cay fa bawa daa yam na, wure ngene, slam da vad bədan! a wurey. A da nəkey dey na, \*Mesəfney nga Gazlavay fa pawa salay da vad, anda makurgwadakw. Cəkwam! a njeý a ray a. <sup>17</sup> Asaya, day fa cənwa da gazlavay da vad, a ləvey: «Kede he, ara Bəzey adaw, masa yah ma wuda kalah. Ya faa səmey ga da ray a.»

## 4

*Bay-malula a wufey nga bata Yesu  
(Mark 1.12, 13; Luk 4.1-13)*

---

**3:12** 3.12 Jer 13.24; Mt 13.30      **3:15** 3.15 5.17; 28.19      **3:16**  
3.16 Iz 63.19; Ez 1.1-3; Jan 1.51; SNM 7.56; CWJ 4.1; 19.11      **3:17**  
3.17 Iz 42.1; Ps 2.7; Mt 12.18; 17.5

<sup>1</sup> Fa dɔba ha, \*Mesɔfnɛy nɔga Gazlavay a handa Yesu a wuzlah-ley amba \*Satan, bay-malula, a jada nɔga bata. <sup>2</sup> Kwa Yesu ta zɔmey cek daa ba, ɔar kwakwar mɔfad, taa vad, taa pas. Fa dɔba ha, may a car dɔba. <sup>3</sup> Ta', bay-malula a daw a cakay a nɔga bata, aa guzlar, a lɔvar: «Da kah Bɔzey nɔga Gazlavay na, tɔrdata aɔgwa hay keɔfe nɔga ɔaf taw!»

<sup>4</sup> Yesu a mbɔɔɔara, a lɔvar: «Mawuzlalakaya daa ɔerewel nɔga Gazlavay, a lɔvey: “Ndaw na, a nɔey ta cek mezɔmey daada ba, ama ta mey cɔpa masa ma bawa da mey Gazlavay.”»

<sup>5</sup> Cay, bay-malula ha ta', a handa a \*Jeruzelem, berney nɔga Gazlavay. A tɔpda aa ray nɔga \*Way-mekey-kwakwas nɔga Gazlavay, <sup>6</sup> a lɔvar: «Da kah Bɔzey nɔga Gazlavay na, jɔvey a hwayak, maja Mey nɔga Gazlavay mawuzlalakaya a lɔvey: “Gazlavay a da ka amba a slɔrwa maslan aɔga hay,

a slɔwmaka la a har ata

amba salay akah a gurzey fa aɔgwa ba.”»

<sup>7</sup> Yesu a mbɔɔɔara, a lɔvar: «Mey nɔga Gazlavay mawuzlalakaya a lɔvey saya: “Ka da jada Bay Gazlavay akah ba.”»

<sup>8</sup> Fa dɔba ha, bay-malula ha, a handa saya, a tɔpda aa ray nɔga aɔgwa maazɔma, a wuzɔara hwayak hay da bɔla cɔpa ta zleley hay cɔpa da hwad a, aa guzlar, <sup>9</sup> a lɔvar: «Da kah ma ragadaya la, kah ma ɔerya ɔaɔgay la na, hwayak

---

**4:1** 4.1 Heb 2.18; 4.15    **4:2** 4.2 Mab 34.28; Mt 6.16-17    **4:4**  
 4.4 Mew 8.3    **4:6** 4.6 Ps 91.11-12    **4:7** 4.7 Mew 6.16    **4:8**  
 4.8 5.1

hay a ta zleley hay cəpa da hwaɗ a keɗe na, ya vɔldatakawa la.»

<sup>10</sup> Ta', Yesu a mbəɗɗara, a ləvar: «Satan, hway la feɗe! Mbəkɗaya maja Mey nga Gazlavay mawuzlalakaya a ləvey: “Ka da ragadar na, si ngada Bay Gazlavay akah gway. Dərar dangay ngada Bay Gazlavay pal taava anɗa.”» <sup>11</sup> Daa nɗene, bay-malula ha, mbak! a mbəkda Yesu. Ta', maslan hay nga Bay Gazlavay da vad a samawa a cakay a, a jənmara, a vɔlmar cek mezəmey.

*Yesu a zlar sləra anɗa daa hwayak nga Galile*

<sup>12</sup> Menjey nekəɗey na, ta', a kərzamara \*Jan-Baptis, a mbəzdamara aa fərsəne. Masa Yesu ma cənda ata ma kərzamara Jan-Baptis sem na, a sləkɗey, a vəhey aa hwayak nga \*Galile. <sup>13</sup> Ta njey da slala \*Nezeret daa ba, ama a daw a njey a Kapernayum. Kapernayum na, ara slala da mey dəhwa nga Galile, masa daa hwayak nga səkway nga Zabulanw ta nga Naftali. <sup>14</sup> Anda keɗe, cek aha ta key la anda \*Izay, \*ndaw ma tɔla mey nga Gazlavay, maa guzley zleezle, ma ləvey:

<sup>15</sup> «Ndəhay daa hwayak nga səkway nga Zabulanw  
ta nga Naftali,  
hwayak hay masa gweegwe ta dəhwa nga Galile,  
ta dey lanɗar nga wayam nga Jurden,  
hwayak nga Galile masa ndəhay Jəwif hay ba  
hay  
ma njam da hwaɗ a,

---

**4:10** 4.10 Mew 6.13; 5.9

**4:12** 4.12 14.3

**4:13** 4.13 Jan 2.12

**4:14** 4.14-16 Iz 8.23-9.1

16 ndəhay a, ata daa ləvan,  
 ama a hətmar mewedəy mahura la.  
 Ata masa anda ndəhay maməctakaya,  
 ama slam a wedəy la a ray ata.»

17 Masa Yesu ma daw a Kapernayum a na,  
 ara daa ŋgene, anğa ma zlar mewuzey mey,  
 a ləvey: «Mbəɖdamara menjey akwar da bəla,  
 maja gweegwe cay, Gazlavay a wuzdərwa bay  
 anğa.»

*Yesu a zəlwa gula hay məfad ŋgeeme*  
 (Mark 1.16-20; Luk 5.1-11)

18 Pas pal daha, Yesu fa pəkey da mey dəhwa  
 ŋga \*Galile. Ta', a hətey məlman hay cew  
 daha, ara ndəhay ma kərza ewet. Ata \*Simanw  
 masa ma zəlmara \*Piyer ta məlmaha \*Andəre,  
 fa kərzam ewet ta \*tabaw daa dəhwa ha. 19 Yesu  
 ta', a zəltərwa, a ləvtar: «Samawa asi adaw.  
 Akwar na, ndəhay ma kərza ewet, ama dəga  
 wure keɖe ya da tərɖakwar ŋga ndəhay ma  
 zəlwa ndəhay aa cəveɖ ŋga Gazlavay.» 20 Wure  
 ŋgene, mbak! a mbəkdamata tabaw ata hay, ta',  
 a diyam asi Yesu.

21 Yesu a ŋgəchey nekəɖey fa mey na, a  
 hətey məlman hay cew mekele saya, ara ata  
 \*Jak ta məlmaha \*Jan, bəza hay ŋga Zebede.  
 Ata manjatakaya daa kwambiwal ta papa ata  
 Zebede, fa diymata tabaw ata hay. Yesu ta', a  
 zəлта ata Jak ta Jan ŋga diyam asiya. 22 Wure  
 ŋgene, mbak! a mbəkdamara kwambiwal len  
 papa ata, ta', a diyam asi Yesu.

*Yesu a wuzey mey ta a mbøley masa-macay hay  
(Mark 1.39; Luk 4.44; 6.17-19)*

<sup>23</sup> Yesu fa pøkta slala hay cøpa daa hwayak nga \*Galile, faa sørkadata ndøhay daa way-mewuzey-mey hay nga Gazlavay, fa wuzey \*Mey-maaya-mawiya da ray \*mewey nga Bay Gazlavay da ray ndøhay, fa mbøley ndøhay daa macay hay wura wura cøpa leŋ ndøhay maahølbatakaya hay tabiya. <sup>24</sup> Ndøhay tabiya daa hwayak nga Siri a cøndamara mey da ray a. Anda kefe, a handamar ndøhay ga daa macay hay mekele mekele, siya hay masa vaw fa catar kalah, siya hay masa malula da ray, siya hay masa ta cek da ray fa børzlam, leŋ masa maahølbatakaya hay. Ta', Yesu a mbøldata. <sup>25</sup> Ndøhay ga fa diyam asiya. Ndøhay a na, a samawa daa hwayak nga Galile, daa hwayak mezøley Berney-Hay-Kuraw, daa berney nga \*Jeruzelem, daa hwayak nga \*Jude, leŋ daa hwayak ta dey langar nga wayam nga Jurdeŋ.

## 5

*Yesu a wuzey mey da anɣwa*

<sup>1</sup> Masa Yesu ma høtatar ndøhay ga fa diyam asiya na, ta', a tøpey a anɣwa, cøkwam! a njeŋ ta njeŋ. Gula anɣa hay a diyam, a kusam a cakay a.

*Mey da ray maaya nga Gazlavay ma da sawa  
a ray ndøhay  
(Luk 6.20-23)*



- <sup>2</sup> Yesu a zlar ngaa sərkadata, a ləvtar:  
<sup>3</sup> «Maaya nga Gazlavay aa da ray ndəhay ma ləvam mbalay Gazlavay, ba na, ata cek hay nga tede.  
 Maaya nga Gazlavay aa da ray ata na, maja ata ma təbmarā amba Gazlavay a wey da ray ata fara fara.  
<sup>4</sup> Maaya nga Gazlavay aa da ray ndəhay masa ta matəway daa dey, maja ata na, ara Gazlavay ma da dəktar mevel.  
<sup>5</sup> Maaya nga Gazlavay aa da ray ndəhay meekwed-mey, maja ata na, a da hətam slam menjey anda Gazlavay ma ləvtar a da vəldatara.  
<sup>6</sup> Maaya nga Gazlavay aa da ray ndəhay ma wudam nga key cek ma mbafar a Gazlavay ta mevel ata cəpa, maja ata na, Gazlavay a, a pata la aa wiya.  
<sup>7</sup> Maaya nga Gazlavay aa da ray ndəhay ma səram dey-ceceh fa ndəhay, maja ata na, Gazlavay a sərfatar dey-ceceh la may.  
<sup>8</sup> Maaya nga Gazlavay aa da ray ndəhay ma səpmara mey nga Gazlavay ta mevel pal, maja ata na, a hətmar Gazlavay la ta dey ata.  
<sup>9</sup> Maaya nga Gazlavay aa da ray ndəhay ma cəmtar dəy nga ndəhay,

maja ata na, Gazlavay a da zelta böz anğa hay.

<sup>10</sup> Maaya nga Gazlavay aa da ray ndəhay masa ndəhay ma sərdamata banay maja ata ma kam cek ma mbafar a Gazlavay. Maaya nga Gazlavay aa da ray ata na, maja Bay Gazlavay fa wey da ray ata.

<sup>11</sup> «Da ndəhay fa cədmakwar, fa sərdamakwar banay, asaya, fa mbərzlam a ray akwar maja akwar ndəhay adaw hay na, maaya nga Gazlavay aa da ray akwar. <sup>12</sup> Ta sərdamata banay ta ndəhay ma təla mey nga Gazlavay zleezle la, ba diya? Yaw, da anda keđe na, maaməlkam, njam ta meesəmey ga ara mey ba, maja ara Gazlavay ma da pəlkwara mawurbay nga sləra akwar maaya maaya da vad.»

*Mey da ray manda ta slam-mewedey*  
(Mark 9.50; Luk 14.34, 35)

<sup>13</sup> Yesu a ləvtar a gula anğa hay saya: «Da bəla keđe, akwar na, anda manda. Da mecərey nga manda ha daa saba na, ka da sərmara ara manda na, kwara? Da mecərey nga manda ha daa saba na, anğa maaya saba, a kwiydamura aa papalah saw, ndəhay a hərpamara.

<sup>14</sup> «Asaya, akwar na, ndəhay ma wadə bəla. Da berney aa daa ray nga anğwa na, a bey fa dey nga ndəhay la daw? <sup>15</sup> Yaw, ndaw a gədfey away aa petərila, a pa asi manğayak ba, si a pa aa slam mepey petərila amba a wadatar dey

---

**5:9** 5.9 Heb 12.14    **5:10** 5.10 1Pi 3.14    **5:11** 5.11 10.22; Lk 6.22    **5:12** 5.12 2Mev 36.16; Mt 23.30; Lk 6.23; SNM 7.52; Heb 11.32-38; Jak 5.10    **5:13** 5.13 Mk 9.50

ngada ndəhay daa way a tabiya. <sup>16</sup> Anda keɗe, si ka waɗam fa dey nga ndəhay tabiya, amba a hətmar sləra akwar maaya, a həslmar ray a Papakw akwar Bay Gazlavay da vad.»

*Mey da ray kwakwas nga Mawiz*

<sup>17</sup> «\*Kwakwas nga Mawiz ta meesərkedey nga ndəhay ma təla mey nga Gazlavay na, ka wulkam, ya sawa nga nəsa daw? Ara kəne ba. Ama ya sawa na, amba ya wuzdakwara mabara nga mey da ray a. <sup>18</sup> Ya fa ləvkwar fara fara, kwakwas nga Mawiz a, kwa kuset kəɗey, fa daa zəɗey daa ba səlak, haa kasl slam da vad ta slam da hwayak ma ndəvam. Kwakwas nga Mawiz fa daa zəɗey daa ba, haa kasl ta pas masa sləra nga kwakwas a ma ndəvey cay cəpa. <sup>19</sup> Anda keɗe, da ndaw ta zləbey mey la, kwa kuset kəɗey daa kwakwas a, asaya, da taa sərkaɗata ndəhay la nga kamara anda aa ma zləba ha na, ndaw aha a da tərey ndaw mecəhe da wuzlah ndəhay masa Gazlavay ma wey da ray ata. Ama da ndaw ta nar ray la ngada kwakwas a cəpa, asaya, da taa sərkaɗata ndəhay la nga kamara kəne na, ndaw aha a da tərey mahura da wuzlah ndəhay masa Gazlavay ma wey da ray ata. <sup>20</sup> Ya fa ləvkwar fara fara, akwar fa da ndəkwaam a wuzlah ndəhay masa Gazlavay ma wey da ray ata na, daa ba, si ka kam cek ma mbafar a Gazlavay ma fəna \*Fariza hay len ndəhay maa sərkaɗa kwakwas nga Mawiz.»

---

**5:15** 5.15 Mk 4.21; Lk 8.16    **5:16** 5.16 Ef 5.8; Fəl 2.15; 1Pi 2.12

**5:17** 5.17 3.15; 7.12; 22.40; Rm 3.31    **5:18** 5.18-19 Jak 2.10

*Mey da ray mecey-mevel*

<sup>21</sup> Yesu aa sərkadata gula anğa hay da cakay a heyey saya, a ləvtar: «Akwar ma cəndamara mey nğa Gazlavay maa guzldatara nğada dede aləkwa hay zleezle la, ba diya? Mey a, a ləvey: “Ka da kəfey ndaw vagay ba. Kwa waawa ma kəfey ndaw vagay na, a kamar sariya la.”

<sup>22</sup> Ama yah na, ya fa ləvkwar saya, kwa waawa ma cey mevel a ray məlmaha \* na, Gazlavay a kar sariya la. Kwa waawa ma ləvar a məlmaha: “Kah manjar lenğesl” na, a handamara ndaw a la fa mey nğa ndəhay mahura hay ma sla yawa nğa Israyel hay. Asaya, kwa waawa ma ləvar a məlmaha: “Kah marəzlkaya” na, nğene, mak nğa mbəzda aa vəgeđ nğa awaw magaza.

<sup>23</sup> «Yaw, da ka fa daw aa \*Way-mekey-kwakwas nğa Gazlavay amba ka vələr cek a Gazlavay, daa nğene, ka sərfađa, məlmakw fa cey mevel da ray akah na, <sup>24</sup> nğene, mbəkda cek akah ha a cakay slam-mefəkey cek nğada Gazlavay a, daw fa məlmakw a, cəmamawa đay ta anğa la đagay, wara ka vəhwa, ka vəlda cek akah nğada Gazlavay.

<sup>25</sup> «Da ndaw a wudka, fa handaka aa sariya na, wusey vaw, điymara mey akwar ta ndaw aha daa cəved. Da daa ba na, a da vəldaka a har ndaw ma ka sariya. Ndaw ma ka sariya ha, a da vəldaka a har sewje hay. Sewje hay may, a da

---

**5:21** 5.21 Mab 20.13; Lev 24.17 \* **5:22** 5.22 məlmaha: Məlmaha a wufey nğa ləvey ara məlmaj nğa səkway ba, ama ara məlmaj daa mey nğa Gazlavay. **5:22** 5.22 1Jn 3.15 **5:24** 5.24 6.14-15

kəzlamaka aa fərsəne. <sup>26</sup> Ya fa ləvka fara fara, ka fa da bawa daa fərsəne he daa ba səlak, si kah ma pəla dəvaz a la tabiya ndav.»

*Mey da ray meley-vaw saw*

<sup>27</sup> «Akwar ma cəndamara mey nga Gazlavay maa guzlda la, a ləvey: “Ka da ley vaw saw da palah ba.” <sup>28</sup> Ama yah na, ya fa ləvkwar saya, kwa waawa maa həmey ηgwas ηga ndaw daa mevel anga ηga ney ta anga na, ηgene anda ndaw aha ta lam vaw sem ta ηgwas aha.

<sup>29</sup> Da dey akah ηga zəmay fa həldaka ηga key cek hay maaya ba na, wuzlka dey a, hazakada dərəŋ ta kah. Nğama mezəvey ηga vaw akah pal meezədey da ray vaw akah tabiya ma da kəzley aa vəgeđ ηga awaw magaza. <sup>30</sup> Asaya, da har akah ηga zəmay fa həldaka ηga key cek maaya ba na, dəsla har a, hazakada dərəŋ ta kah. Nğama mezəvey ηga vaw akah pal meezədey da ray vaw akah tabiya ma da mbəzey aa vəgeđ ηga awaw magaza.»

*Mey da ray mebəley ηgwas*

*(Matiye 19.9; Mark 10.11, 12; Luk 16.18)*

<sup>31</sup> «Mey mekele daha saya, a ləvey: “Kwa waawa ma bəla ηgwas anga na, si a vəlar dərəwel ηga wuzda anga ma bəla sem.” <sup>32</sup> Ama yah na, ya fa ləvkwar saya: Ndaw a da bəla ηgwas anga ba, si da ηgwas aha ta ley vaw la da palah kwa. Da ndaw a bəla, fa dəba ha ηgwas

---

**5:25** 5.25-26 Lk 12.58-59    **5:26** 5.26 18.34    **5:27** 5.27 Mab 20.14    **5:28** 5.28 Jəw 31.1; 2Pi 2.14    **5:29** 5.29-30 18.8-9; Mk 9.43-47    **5:31** 5.31 Mew 24.1; Mt 19.7; Mk 10.3-4

aha a ley zel mekele na, a key ngene, a tərda ngwas aha nga ngwas meley-vaw saw da palah. Asaya, ndaw ma la ngwas masa zel e ma bəla ngene na, anga anda ndaw ma ley vaw saw da palah may.»

### *Mey da ray membedey*

<sup>33</sup> «Asaya, akwar ma cəndamara mey nga Gazlavay maa guzldatara ngada dede aləkwa hay la, a ləvey: “Ka da mbaɗam nga tede ba. Da akwar ma mbaɗam sem na, si ka kamara cek aha fara fara ta mezəley nga Bay Gazlavay.”

<sup>34</sup> Ama yah na, ya fa ləvkwar, kwa ka da mbaɗam ba səlak, kwa ta slam da vad ka da mbaɗam ba, maja ara slam-menjey nga Gazlavay. <sup>35</sup> Kwa ta slam da hwayak ka da mbaɗam ba, maja ara slam-mepey-salay nga Gazlavay. Kwa ta \*Jeruzelem ka da mbaɗam ba, maja ara berney nga Gazlavay Mawaca-waca. <sup>36</sup> Asaya, kwa ta ray akwar hay ka da mbaɗam ba, maja ka gwamara nga tərđamara kwa enɗwec nga ray akwar matara pal nga mabara ba. <sup>37</sup> Da mey a ara anga na, ləvam: “Ahaw, ara anga!” Da ara anga ba na, ləvam: “Kay, ara anga ba!” Da ka ləvam mey wal na, ngene mey a, a bawa ta fa \*Satan, bay-malula.»

### *Mey da ray mepəley cəhwal (Luk 6.29, 30)*

---

**5:32** 5.32 19.9; Mk 10.11-12; 1Kwr 7.10-11    **5:33** 5.33 Lev 19.12; Mesl 30.3    **5:33** 5.33-37 23.16-22; Jak 5.12    **5:34** 5.34-35 Iz 66.1; SNM 7.49    **5:35** 5.35 Ps 48.3    **5:37** 5.37 2Kwr 1.17-19

<sup>38</sup> «Akwar ma cɛndamara mey nga Gazlavay maa guzley la daa slam mekele, a lɔvey: “Da ndaw a wuzlkakawa dey na, wuzlkara nga anɔa may. Da ndaw a pɔlɔngwakawa sler na, pɔlɔngwara nga anɔa may.” <sup>39</sup> Ama yah na, ya fa lɔvkwar, akwar na, ka da pɔlam cɔhwal ba. Da ndaw a kɛdka a cakay baazlam nga zɔmay na, mbɛdɔdara dey nga gula saya. <sup>40</sup> Da ndaw a wudka amba a tɔba dɛn-kece akah na, gɛrda nga tɔba dawura akah saya. <sup>41</sup> Da ndaw a tɔkaka dɔy nga ley cek dadakw kɔlemeeter pal na, handara a key kɔlemeeter cew. <sup>42</sup> Da ndaw aa cɛdfafaka cek na, vɔlar. Asaya, da ndaw a dedɔdɔy cek na, kwa ka daa zlɔka ba.»

*Mey da ray mewudɔy masa-gɛra hay*  
(Luk 6.27, 28, 32-36)

<sup>43</sup> «Akwar ma cɛndamara mey nga Gazlavay maa guzley la daa slam mekele, a lɔvey: “Wudfa jam akah, masa-gɛra akah na, ka da pey dey a ray a ba.” <sup>44</sup> Ama yah na, ya fa lɔvkwar: wudmata masa-gɛra akwar hay, dɔram dangay a Gazlavay amba a pɛstar mey a ndɔhay ma sɛrdamakwar banay. <sup>45</sup> Anda kedɛ, a da wuzwa akwar na, bɛza hay nga Papan Bay Gazlavay da vad, maja anɔa na, fa wadɔrawa pas a ray ndɔhay maaya ta maaya ba hay, asaya, fa parawa var nɔgada ndɔhay ma namar ray ta nɔgada ndɔhay ma namar ray ba tabiya. <sup>46</sup> Da

---

**5:38** 5.38 Mab 21.24    **5:39** 5.39 Rm 12.17    **5:40** 5.40 1Kwr 6.7; Heb 10.34    **5:43** 5.43 Lev 19.18; Mt 22.39; Mk 12.31; Lk 10.27

**5:44** 5.44 Mab 23.4-5; Rm 12.20; 1Pi 2.20-23; mepɔsey-mey: Lk 6.28; 23.34; SNM 7.60; Rm 12.14; 1Kwr 4.12; 1Pi 3.9    **5:45** 5.45 Ef 5.1

ka wudam ndəhay ma wudmakwar daada gway na, Gazlavay a da pəlkwara mawurbay nga sləra akwar na, maja me? Kwa ma cakala budaw hay na, fa kamara kəne may, ba diya? <sup>47</sup> Da ka cam har ngada səkway akwar hay gway na, ka ta kam sləra maaya ma fəna maamandaw la daw? Kwa ndəhay ma səmra Bay Gazlavay ba na, fa kamara kəne may, ba diya? <sup>48</sup> Papakw akwar Bay Gazlavay da vad, anga maaya kalah, a wudta ndəhay tabiya. Təram ndəhay maaya kalah anda anga.»

## 6

### *Mey da ray mejəney masa-viya hay*

<sup>1</sup> Yesu aa sərkadata gula anga hay da cakay a heyey saya, a ləvtar: «Wam vaw fa sləra masa akwar ma kamara ngada Gazlavay. Ka da kamara ta mezlepey fa mey nga ndəhay ba. Maja da ka kamara amba a hətmakwar na, Papakw akwar masa da vad na, fa da pəlkwara mawurbay nga sləra akwar a daa ba.

<sup>2</sup> «Yaw, da ka vələm dala a ndəhay masa-viya hay na, ka da wudam ta wudey anda ndəhay masa ta neneh cew ba. Ata na, fa kamara kəne daa \*way-mewuzey-mey nga Gazlavay lej daa mepəkey ata hay, amba ndəhay aa həmdamata. Ya fa ləvkwar fara fara, meehəmey a ngene na, ara mawurbay nga sləra ata. <sup>3</sup> Ama kah, da ka fa vələy dala a masa-viya hay na, vələda ta mayal a, amba ndəhay a səmra ba. <sup>4</sup> Anda keđe, Papakw Bay Gazlavay, ma hətar cek masa



kah ma velda na, ara anğa ma da pølkawa mawurbay akah.»

*Mey da ray medərey-danğay*  
(Luk 11.2-4)

<sup>5</sup> «Yaw, da akwar fa dəräm danğay na, ka da kamara anda ndəhay masa ta neneh cew ba. Ata na, a wudfäm melecey nğa dərey danğay daa \*way-mewuzey-mey nğa Gazlavay leñ da mey-cəved hay amba ndəhay tabiya a hətmatar. Ya fa ləvkwar fara fara, taa həmdamata cay, meehəmey a nğene na, ara mawurbay ata. <sup>6</sup> Ama kah, da masa ka fa da dərey danğay na, daw a ver akah, gərca mey-slam, dərär danğay a Papakw Bay Gazlavay fetede, daa slam masa ndəhay da hwađ a daa ba. Anda keđe, Papakw Bay Gazlavay, ma hətär sləra masa kah ma ka ta mebey nğene na, ara anğa ma da pølkawa mawurbay nğa sləra akah.

<sup>7</sup> «Da akwar fa dəräm danğay na, ka da dulam mey ga anda ma ta kuley hay ba. Ata a wulkam na, Bay Gazlavay a cəndatara mey ata meduley ga nğene la. <sup>8</sup> Ka da kam anda ata ba, maja Papakw akwar Bay Gazlavay na, ta səra cek masa akwar ma daa cədfafamara sem. <sup>9</sup> Da akwar fa dəräm danğay na, ləvam:

“Papa ala Bay Gazlavay da vad,  
anja ndəhay tabiya nğa namaka ray maja kah  
na,

Bay Gazlavay pal.

<sup>10</sup> Anja bay akah nğa wuzwa.

Ka amba ya namaka ray da bəla keđe

anda ata ma namaka ray da vad.

11 Vəındar cek mezəmey nga wusndar tasana.

12 Mbəkđandara mebərey ala

anda ala ma mbəkđamatara mebərey

nga ndəhay ma kamandar cek maaya ba.

13 Jəđndar amba cek a batandar nga key mebərey ba.

Badandərwa dasi har nga bay-malula.”

[Ahaw, ara kah Bay Gazlavay ta gədaŋ,

ma wey da ray cek hay tabiya.

Ara kah masa ndəhay ma həslmaka ray nga sərmataw.

Amen.]

14 «Sərmara, da akwar fa mbəkđamatara mebərey nga ndəhay ma kamakwar mebərey na, ŋgene, Papakw akwar masa da vad a mbəkđakwara mebərey akwar la may. 15 Ama da ka mbəkđamatara mebərey nga ndəhay ba na, ŋgene, Bay Gazlavay Papakw akwar a mbəkđakwara mebərey akwar daa ba may.»

### *Mey da ray mekey daliyam*

16 Yesu a ləvtar saya: «Masa akwar fa kam \*daliyam na, ka da ndərbam dey anda ndəhay masa ta neneh cew ma kamara ba. Ata na, a ndərbam dey amba ndəhay tabiya a sərmara ata fa kam daliyam. Ya fa ləvkwar fara fara, taa həmdamata cay, meehəmey a ŋgene na, ara

---

**6:10** 6.10 4.17; 7.21; 12.50; 18.14; 21.31; 26.39-42; Mk 3.35; 14.36; Lk 22.42; Jan 4.34; 6.38-40; SNM 21.14 **6:11** 6.11 6.24-34 **6:12** 6.12 6.15 **6:13** 6.13 10.16-25; 24.3-28; Jak 1.12-15; Jan 17.15; 2Tes 3.3; 2Tm 4.18 **6:14** 6.14-15 5.24; Lk 6.37; Ef 4.32 **6:15** 6.15 18.35

mawurbay nga slëra ata. <sup>17</sup> Ama kah, da masa ka fa key daliyam na, përa dey akah, njëra ray akah, <sup>18</sup> amba ndëhay a sërmara ka fa key daliyam ba. Ama, ma sëra na, si Papakw Bay Gazlavay, ma hëtar slëra masa kah ma ka ta mebey ñgene, a pëlkawa mawurbay nga slëra akah la.»

*Mey da ray meböcey zleley da gazlavay da vad  
(Luk 12.33, 34)*

<sup>19</sup> «Ka da sëpam nga böcey zleley da bëla kefe ba, maja kwa mëtal, da daa ba, maaca a gwa nga zëma. Kwa mayal hay a gwamara nga slënmara way nga lalamara. <sup>20</sup> Ama sëpam nga böcey na, zleley masa da vad, maja fetede na, mëtal, da daa ba, maaca a gwa nga zëma ba. Kwa mayal hay a gwamara nga mbëzam fetede, nga lalamara ba. <sup>21</sup> Ya lövey anda kefe maja daa slam masa zleley akah aa da hwad a na, mevel akah may aa fetede.»

*Mey da ray mewedey masa fara fara  
(Luk 11.34-36)*

<sup>22</sup> «Bëz nga dey na, anga anda petërla ngada vaw tabiya. Da bëz nga dey akah anga maaya maaya na, ñgene vaw akah cëpa aa daa slam-mewedey. <sup>23</sup> Ama, da bëz nga dey akah maaya ba na, ñgene, vaw akah cëpa aa daa lövan. Da mewedey da ray akah fara fara daa ba na, ñgene, kah daa lövan bëk-bëk.»

---

**6:16** 6.16-17 Iz 58.5; Mt 4.2; 9.14-15; 17.21; Mk 2.18; 9.29; Lk 2.37; 4.2; 5.33; 18.12; SNM 13.2-3; 14.23; 2Kwr 6.5; 11.27 **6:19** 6.19 Jak 5.2-3 **6:20** 6.20 19.21; Mk 10.21; Lk 12.33

*Mey da ray mesəpey Gazlavay, da daa ba, zleley*

*(Luk 16.13; 12.22-31)*

<sup>24</sup> Yesu a ləvtar saya: «Ndaw pal a gwa nga key madərlam nga bay hay cew ba. Da ta key la kəne na, a da wudə bay lanġar ma fəna bay lanġar, da daa ba, a da nar ray ngada bay lanġar, a rəsa bay lanġar. Ka gwamara nga səpmara Gazlavay leŋ zleley cewete daa slam a ba.

<sup>25</sup> «Maja nġene, ya fa ləvkwar fara fara, daa menjeŋ akwar na, ray akwar a da həbey da ray cek mezəmey ta cek meseŋ ba. Asaya, ray akwar a da həbey da ray zana nġa kəzley fa vaw akwar ba. Yaw, cek mezəmey na, a fəna heter akwar daw? Asaya, zana na, a fəna vaw akwar daw?

<sup>26</sup> «Wulkam da ray dīyaŋ hay taw: fa sləkam daa ba, fa nġəmam daw daa ba, fa bəcam kwa meeme a wudedə daa ba, ama Papakw akwar Bay Gazlavay da vad fa vəltar cek mezəmey cəŋga. Kaa akwar na, ka fənmata dīyaŋ hay, ba daw?

<sup>27</sup> Ndaw da wuzlah akwar ma gwa nġa peŋ kwa dər pal a ray dər aŋga da bəla ta mewulkey aŋga na, wa?

<sup>28</sup> «Kaa, ka wulkam ga da ray zana na, maja me? Nəkmara meefekweŋ hay da ley ceŋ! Aa fakwam na, kwara? A kam sləra ba, a cam zana ba, <sup>29</sup> ama ya fa ləvkwar, kwa Bay \*Salamaŋw zleezle ta zleley ga ta gwa nġa kəzley zana ma mbey anda meefekweŋ pal na, daa ba.

<sup>30</sup> Gazlavay a ka amba kusaf aa fekwey tasana,

ama mandaw na, kusaf a, a wewurey. Da Gazlavay fa key cek maaya ngada kusaf masa awaw ma da wawura anda kede na, Gazlavay a nekƙafkar dey ma fɛna kusaf a ngene daa ba daw? Akwar masa ma pamara Gazlavay nga ndaw akwar fara fara ba ngene, sɛrmara Gazlavay a kɛzƙarwar zana la ma fɛna meefekwey hay a.

<sup>31</sup> «Da ray ngene, ka da wulkam ga ba. Da ka lɔvam: “Ya da zɔmam me? Ya da sam me? Ya da kɛzlam fa vaw me?” na, ka da wulkam kɛne ba, <sup>32</sup> maja ma sɔpam cek hay a ngene na, ara ndɔhay ma sɛrmara Gazlavay ba. Asaya, cek hay masa akwar ma wudam cɔpa ha na, Papakw akwar da vad ta sɛra sem. <sup>33</sup> Sɔpam teesɛd na, Gazlavay nga wey da ray akwar, asaya, kam cek anda anga ma wudey. Fa dɔba ha, Bay Gazlavay a vɔldakwara cek hay siya la cɔpa. <sup>34</sup> Ya fa lɔvkwar dɔba, ka da wulkam ga fa cek ma da key mandaw ba, maja mewulkey nga mandaw na, anga wal. Mewulkey fa dar pal na, a wusa ngada dar a.»

## 7

*Mey da ray membɔkey meɔrey nga ndɔhay  
(Luk 6.37, 38, 41, 42)*

<sup>1</sup> Yesu aa guzltar saya, a lɔvtar: «Ka da wulkam daa mevel akwar, ka lɔvam, “Anja mananɔ ngaa zɔɔey maja meɔrey anga” na, kɛne ba, maja Bay Gazlavay a daa zɔɔɔakwar maja meɔrey

akwar kōne may. <sup>2</sup> Ya fa lōvkwar, Bay Gazlavay a daa zōfdakwar daa sariya anda akwar ma wudam manan na, ngaa zōfdey ngene may. Asaya, a da dōsla mey da ray akwar anda akwar ma dōslmara mey da ray ndōhay mekele may.

<sup>3</sup> «Ka nōkey dey fa guzer daa dey nga mōlmakw, ama hwadam mahura masa daa dey akah na, ka wulkey da ray a ba na, maja me?

<sup>4</sup> Ka gwa nga lōvar ngada mōlmakw, “Dagay, ya lakawa guzer daa dey akah la”, anja hwadam mahura daa dey akah daha gway na, kwara?

<sup>5</sup> Kah, ndaw masa ta neneh cew! La hwadam daa dey akah la dōgagay, amba ka hōtar dey njōd-njed nga ley guzer daa dey nga mōlmakw.»

*Mey-menḡey da ray ndōhay ma rōsmara Gazlavay*

<sup>6</sup> «Cek hay maaya masa ngada Gazlavay na, ka da vōdamatara ngada gōdey hay ba, maja a da tatōrmawa a ray akwar. Asaya, ka da kōzlamata bersle akwar hay maaya asi salay nga vetem hay ba, maja a da mbōzlamata ta salay.»

*Mecōfdey cek fa Bay Gazlavay  
(Luk 11.9-13)*

<sup>7</sup> «Cacōfdam cek fa Bay Gazlavay, a vōdakwara la. Sōpam cek fa Gazlavay, ka hōtam la. Zōlam fa mey-mbew, a wurkwara la, <sup>8</sup> maja kwa waawa maa cōfdafar cek na, a vōlar la. Kwa waawa ma sōpey cek fa vōda na, a hōtey la. Kwa waawa ma zōley fa mey-mbew

**7:1** 7.1 Jak 4.11-12; 1Kwr 4.5    **7:2** 7.2 Mk 4.24; Rm 2.1; 14.10-12

**7:7** 7.7 Jer 29.12-14; Mt 18.19; 21.22; Mk 11.24; Jan 14.13-14; 15.7; 16.24; Jak 1.5; 1Jn 5.14-15

na, a wurara la. <sup>9</sup> Da bəzey akah aa cəfdafaka makala na, ka vələr anğwa la daw? <sup>10</sup> Asaya, da aa cəfdafaka ewet na, ka vələr zezekw la daw? <sup>11</sup> Akwar ndəhay malamba hay ma!, ka səmra nga vəley cek maaya ngada bəz akwar hay. Da kəne na, kaa wara Papakw akwar Bay Gazlavay da vad a vəltar cek maaya ngada ndəhay masa maa cəfdafamara ba na, kwara?

<sup>12</sup> «Anda kedə, kamatar cek maaya a ndəhay anda akwar ma wudam a kamakwara kəne may. Kedə he ara mey masa \*kwakwas nga Mawiz lej ndəhay ma təla mey nga Gazlavay maa sərkadamara.»

*Mey-menğey ta mey-mbew hay cew*

*(Luk 13.24)*

<sup>13</sup> «Səpam nga mbəzey na, ta daa mey-mbew meenğəlez e, maja mey-mbew maaban a na, ara cəved meezədey ndaw. Ma daw taa cəved e na, anğa ta banay daa ba. Ndəhay ga fa diyam ta da hwad a. <sup>14</sup> Ama mey-mbew nga cəved ma hendey ndaw aa heter mawiya na, ara mey-mbew meenğəlez e. Ma daw ta hwad a na, anğa ta banay. Ndəhay ma hətam nga daw ta da hwad a na, ga daa ba.»

*Nga sərey ndəhay maaya ta maaya ba hay na, kwara?*

*(Luk 6.43, 44)*

<sup>15</sup> «Wam vaw fa ndəhay ma pamata ray ata nga ndəhay ma təla mey nga Gazlavay. A da samawa fa akwar na, ta meney ray zəkwaḅ

zəkwaḅ anda təḅaŋ hay, ama a da kam həma na, anda gədey-ley hay. <sup>16</sup> Ka da sərmata na, ta fa sləra ata hay maaya ba. Nəka, ndaw a gwa ŋga ŋgəley maŋgwara fa hatak-daw la daw? Da daa ba, ndaw a gwa ŋga ŋgəley gudav fa manjaraf la daw? <sup>17</sup> Wudez maɗaɗakaya gudaf! gudaf! na, a yey babəza maaya maaya may. Wudez masa fa betey ta betey na, a yey babəza maaya ba may.

<sup>18</sup> Anda keɗe, wudez makudɗafar a na, a yey babəza maaya ba na, daa ba. Yaw, wudez masa fa betey ta betey may, a yey babəza maaya na, daa ba. <sup>19</sup> Wudez ma yey babəza maaya ba na, a ɗəslmara, a pamar awaw fa vəɗa. <sup>20</sup> Ara anda keɗe, ka da sərmata ndəhay ma pamata ray ata ŋga ndəhay ma təla mey ŋga Gazlavay na, ta fa sləra ata hay maaya ba may.»

*Mey da ray sariya ŋga Gazlavay*  
(Luk 13.25-27)

<sup>21</sup> «Sərmara ndəhay ma zəlmaya “Bay Mahura, Bay Mahura” na, fa da mbəzam cəpa a wuzlah ndəhay masa Gazlavay ma wey da ray ata na, daa ba. Ama ma da mbəzam na, si ndəhay ma kam cek ma mbafar a Papay Bay Gazlavay da vad gway. <sup>22</sup> Ta pas masa yah ma da katar sariya a ndəhay tabiya na, ndəhay ga a ləvmaya la: “Bay Mahura, Bay Mahura, mey ŋga Gazlavay masa ala ma wuzdamara na, ara ta mezəley akah. Malula hay masa ala ma

---

**7:15** 7.15 Mew 13.2-4; Mt 24.11, 24; SNM 20.29; 2Kwr 11.13-15; 2Pi 2.1; 1Jn 4.1 **7:16** 7.16 Jak 3.12 **7:16** 7.16-18 12.33 **7:17** 7.17 Gal 5.19-23 **7:19** 7.19 3.10; Lk 3.9; Jan 15.2, 6 **7:21** 7.21 6.10; 7.24-27; 21.28-31; Rm 2.13; Jak 1.22-25; 2.14-26



bølmata da ray ndəhay ga na, ara ta mezəley akah. Asaya, maazla hay ga masa ala ma kamata na, ara ta mezəley akah, ba diya?" <sup>23</sup> Anda keɗe, ya daa guzltar ta' a mey, ya ləvtar: "Kwa ya sərkwar ba səlak! Diyam dərəŋ ta yah, akwar ndəhay ma kam cek hay malamba."»

*Mey-menŋgey ta way hay cew*  
(Luk 6.47-49)

<sup>24</sup> «Yaw, kwa waawa ma cənda mey adaw keɗe, ma ka cek anda mey a la na, aŋga anda ndaw masa ta lenŋesl, ma ləma way aŋga da ray pərad. <sup>25</sup> Ta piya, bərgadaŋ a kawa a ray way a, var a pey, wayam a ley. Ama way a, a bəzley ba, maja salay ŋga way a mapakaya da ray pərad. <sup>26</sup> Ama kwa waawa ma cənda mey adaw keɗe, ma ka cek anda mey a daa ba na, aŋga anda ndaw manjar lenŋesl, ma ləma way aŋga da ray mawurbay. <sup>27</sup> Ta piya, bərgadaŋ a kawa a ray way a, var a pey, wayam a ley. Way a kərep! a bəzley, kwa dey lanŋar ma mbəkey daa ba.»

*Yesu aa sərkadata ndəhay na, ta me?*

<sup>28</sup> Fa dəba ha Yesu ma ndəvnda ŋgaa sərkadata ndəhay cay da ray mey hay a ŋgene na, ndəhay a, a rəzlam da ray meesərkedey aŋga ha, <sup>29</sup> maja aa sərkadata ndəhay anda ndəhay ata hay maa sərkada \*kwakwas ŋga Mawiz ba, ama aa sərkadata na, ta gədaŋ masa Gazlavay ma vəldara.

---

**7:23** 7.23 25.12; 2Tm 2.19    **7:24** 7.24-27 7.21    **7:28** 7.28 11.1; 13.53; 19.1; 26.1; Lk 7.1    **7:28** 7.28-29 Mk 1.22; Lk 4.32

## 8

*Yesu a pørey ndaw daa maasækula*

<sup>1</sup> Fa døba ha, Yesu a bønngawa da anɗwa heyey, ndøhay ga fa søpmar wurzay. <sup>2</sup> Ndaw-maasækula daha a ngøchey a cakay a, a regedey fa mey anɗa, a løvar: «Bay adaw, da ka wufey na, ka gwa nɗa pørya daa maasækula adaw kede.» <sup>3</sup> Yesu tal! a telda har anɗa, a gøsfar, a løvar: «Ya wufey amba maasækula akah a pørey. Tørey ndaw mapørkaya døba!» Wure wure nɗene, ndaw-maasækula heyey sad! a sødey. <sup>4</sup> Ta', Yesu a løvar: «Pey lengesl, ka da wuzda cek masa yah ma kakawa kede kwa a ndaw ba. Ama daw fa \*ndaw ma ka kwakwas nɗa Gazlavay, amba a nøkaka. Fa døba ha, vølar cek a Gazlavay anda \*kwakwas nɗa Mawiz ma løvey, nɗa wuzey a ndøhay, maasækula fa vaw akah daa saba.»

*Yesu a mbølda madørlam nɗa mahura nɗa sewje hay*

<sup>5</sup> Yesu fa daw a Kapernayum. Masa anɗa fa daw na, ndaw Rawma daha, anɗa mahura nɗa sewje hay temere, a ngøchey a cakay a. A kar ambahw amba Yesu a jøna, <sup>6</sup> a løvar: «Bay adaw, madørlam adaw, anɗa manakaya da way daa macay. Maahølbakaya, fa sørey banay kalah.» <sup>7</sup> Yesu a mbøddara, a løvar: «Ya fa daw, ya mbølda la.» <sup>8</sup> Ama mahura nɗa sewje hay heyey a løvar: «Bay adaw, kwa ya ta wusa amba ka mbøzey a way adaw na, daa ba. Gweguzley mey

pal gway na, madər lam adaw a, a mbøley la. <sup>9</sup> Ya ləvka anda kede maja yah na, sewje hay mahura da ray adaw daha, asaya, yah mahura da ray sewje hay mekele may. Da ya ləvar ŋgada sewje lanġar “daw”, a daw. Da ya ləvar ŋgada ndaw lanġar “sawa”, a sawa. Da ya ləvar ŋgada beke adaw “ka sləra kede”, a ka.»

<sup>10</sup> Masa Yesu ma cənda mey a kede la na, a mbafar ara mey ba, ta', aa guzltar ŋgada ndəhay ma diyam asiya, a ləvey: «Ya fa ləvkwar fara fara, kwa ya ta hətey ndaw ma paya ŋga ndaw anġa fara fara anda ndaw kede daa ba səlak, kwa da wuzlah səkway adaw hay \*Israyel hay, ya ta hətey daa ba. <sup>11</sup> Ya fa ləvkwar: Ta pas masa Gazlavay ma da wuzdərwa bay anġa na, ndəhay ga a samawa la daa slam hay tabiya da bəla, ŋga key gwagway da vad ta ata \*Abərahəm, \*Izak len \*Jakwap. <sup>12</sup> Ama ndəhay masa ma yamawa da wuzlah səkway ŋga ndəhay ŋga Gazlavay na, a da kəzlamata aa ambaw aa ləvanġ. Fetede na, a da təwam, a daa pədam sler.» <sup>13</sup> Ta', Yesu aa guzlar a mahura ŋga sewje hay heyey, a ləvar: «Daw a way dəba. Anġa cek masa kah ma wufey kede na, ŋga key, anda kah ma təba mey adaw kede.» Wure wure ŋgene madər lam anġa heyey mbal! a mbøley.

*Yesu a mbøley masa-macay hay ga*

<sup>14</sup> Cay, ta', Yesu a daw a way \*Piyer. A hətfar mananġ ŋga ŋgwas ŋga Piyer e, vaw fa car, manakaya, awaw fa vaw ga. <sup>15</sup> Yesu ta', a gəsfar

**8:11** 8.11 Iz 25.6      **8:12** 8.12 13.42, 50; 22.13; 24.51; 25.30

**8:13** 8.13 9.22; 9.29; 15.28      **8:14** 8.14 1Kwr 9.5

fa har. Da ray ηgene, awaw fa vaw heyey daa saba. Ngwas aha p̄erta! a lecey, ta', a v̄elar cek mez̄omey a Yesu a.

<sup>16</sup> Taa kwad a ηgene, a handamawa nd̄ohay ga ta malula hay da ray. Yesu aa guzltar mey pal, ta', malula hay da ray nd̄ohay a, a bam. Asaya, a mb̄eldata nd̄ohay masa-macay hay tabiya. <sup>17</sup> Cek aha ta key la anda \*Izay, \*ndaw ma t̄ela mey ηga Gazlavay maa guzley zleezle, ma l̄ovey: «Ara ηnga ta ray ηnga ma j̄onndakwar daa b̄ele al̄ekwa, asaya, ara ηnga ma mb̄eldandakwar daa macay al̄ekwa hay tabiya.»

*Mey da ray nd̄ohay ma wud̄am ηga diyam asi Yesu*

<sup>18</sup> Masa Yesu ma n̄ekta nd̄ohay ga fa zl̄ermar ray na, ta', a l̄ovtar a gula ηnga hay amba a zl̄ongam a dey lan̄gar ηga d̄ehwa ηga \*Galile. <sup>19</sup> Daa ηgene, \*ndaw maa s̄erkada kwakwas ηga Mawiz daha a ηḡochey a cakay a, aa guzlar, a l̄ovar: «Bay ad̄aw, kwa aa slam wura wura masa kah ma da daw na, ya daw la asi akah.» <sup>20</sup> Yesu a mb̄eddara, a l̄ovar: «Mbiga hay, ata ta v̄eged̄ ata hay, d̄iyan̄ hay, ata ta way ata hay. Ama yah, \*B̄ez ηga Ndaw na, kwa slam ηga ney nek̄ed̄ey amba ya m̄eskey vaw da hwad̄ a na, daa ba.»

<sup>21</sup> Ndaw mekele da wuzlah nd̄ohay ηga Yesu heyey, a sawa, a l̄ovar: «Bay ad̄aw, v̄elya c̄oved̄ amba ya daw ya j̄oh̄erwa papay la d̄agay.»

<sup>22</sup> Yesu a mb̄eddara, a l̄ovar: «Sawa asi ad̄aw,

---

**8:17** 8.17 Iz 53.4    **8:20** 8.20 2Kwr 8.9    **8:21** 8.21-22 4.20, 22; 9.9; 19.21; Mk 1.18, 20; 2.14; 10.21; Lk 5.11, 28; 18.22; Jan 1.43; 21.19, 22

mbəkdata ndəhay maməctakaya nga jəhmata ndəhay ata hay maməctakaya.»

*Yesu a lacada bərgadan da wuzlah dəhwa  
(Mark 4.35-41; Luk 8.22-25)*

<sup>23</sup> Cay, Yesu kula! a mbəzey aa kwambiwal, gula anga hay ta', a diyam bama. <sup>24</sup> Daa masa kwambiwal a fa daw na, wure ngene memed mahura aa bərey a ray yam, mendərey nekədey vanɣwala nga yam a sərta kwambiwal a. Daa ngene, Yesu na, manakaya daa dər. <sup>25</sup> Ta', gula anga hay, a ngəcham a cakay a, a sləkdamara, a ləvmar: «Bay Mahura, sləkdey, ləhdandakwar! Aləkwa fa da məkwa.» <sup>26</sup> Yesu a mbəddatara, a ləvtar: «Ka zluram na, maja me? Akwar fa padamara Gazlavay nga ndaw akwar fara fara daa ba daw?» Pərta! a sləkdey, ta', aa bəctar ngada memed ta yam heyey. Memed deŋ! a lecey, yam a wusey saba. <sup>27</sup> Da ray ngene, ndəhay a rəzlam, a ləvam da wuzlah ata: «Ndaw a kefe na, ara na, wa? Masa kwa memed ta yam a cənmə mey kefe na!»

*Yesu a bəley malula da ray ndəhay cew  
(Mark 5.1-20; Luk 8.26-39)*

<sup>28</sup> Daa masa Yesu ma wusey la a dey lanɣar nga dəhwa nga \*Galile heyey, masa daa hwayak nga ndəhay Gederen hay na, ndəhay cew daha ta malula da ray fa bamawa daa cəvay hay mavavərkwatakaya daa anɣwa, a cam ray ta Yesu. Ndəhay a, fa zləzləbam ndəhay ara mey ba, kwa ndaw ma gwa nga daw taa cəved e ngene daa ba. <sup>29</sup> Ndəhay a, a wudam ta gədan,

a ləvmar a Yesu: «Kah, Bəzey n̄ga Gazlavay, ka wufey fa ala na, me? Ka sawa n̄ga sərđandar banay d̄ega pas n̄ga sariya aran daw?»

<sup>30</sup> Da fetede na, n̄gaba n̄ga vetem hay ga daha da mecəkwer gweegwe ta ata. <sup>31</sup> Malula hay da ray ndəhay kaa heyey a bərkwamara Yesu, aa cəfdamara, a ləvmar: «Da ka da bəlndar na, vəlndar cəved amba ya diyam ya mbəzam aa vetem hay katay.» <sup>32</sup> Ta', Yesu a ləvtar: «Diyam, mbəzam.» Da ray n̄gene, a bam da ray ndəhay kede heyey, a diyam a mbəzam a ray vetem hay a. Ta', vetem hay a cəpa, a hwam ta gəđan n̄gadaa heelen, a tataram, a kwiyam saf! aa yam, aa zəđam kudap! fetede.

<sup>33</sup> Mecəkwer hay n̄ga vetem hay kaa heyey takw! a həlmara mahway a slala, a kadamatara mey a len mey da ray ndəhay ta malula da ray heyey cəpa n̄gada ndəhay da slala ha. <sup>34</sup> Da ray n̄gene, ndəhay tabiya da slala ha a bamawa, a cadamara ray ta Yesu. Ta', a bərkwamara n̄ga daw la daa hwayak ata ha.

## 9

### *Yesu a mbəley ndaw maahəlbakaya (Mark 2.1-12; Luk 5.17-26)*

<sup>1</sup> Fa dəba ha, Yesu a təpey aa kwambiwal, a vəhey a dey lan̄gar n̄ga dəhwa, a daw a slala an̄ga. <sup>2</sup> Ta', a handamar ndaw maahəlbakaya daha, manakaya da ray bebele. Masa Yesu ma n̄eka ndəhay a, fa təbmara an̄ga ta gəđan n̄ga mbəlda ndaw ata na, ta', a ləvar a ndaw

maahëlþakaya heyey: «Dëka mevel, böz adaw! Mebørey da ray akah daa saba.» <sup>3</sup> Fetede na, ndøhay maa sèrkada kwakwas nga \*Mawiz daha, a wulkam daa ray ata, a løvam: «Ndaw a kedede, a pa ray anga nga Gazlavay na, kwara?» <sup>4</sup> Yesu a sèra mewulkey ata. Da ray ngene, aa cøfdata, a løvtar: «Ka wulkam maaya ba anda kedede na, maja me? <sup>5</sup> Ya gwa ya løvey: “Mebørey akah daa saba” da daa ba, ya gwa ya løvey: “Sløkdøey, daw ta salay akah.” Dasi mey hay cewete kedede na, masa ta banay nga løvey ngada yah na, wura? <sup>6</sup> Yaw, ya wudøey ka sèrmara, yah \*Böz nga Ndaw, yah ta gødan nga mbøkey mebørey nga ndøhay da bøla kedede. Wure kedede, ka høtmar cek ma da key la.» Anda kedede, Yesu, ta', a løvar a ndaw maahëlþakaya heyey: «Sløkdøey, la bebele akah, daw a way!» <sup>7</sup> Ndaw aha pørta! a sløkdøey, ta', a daw a way. <sup>8</sup> Daa masa ndøhay makustakaya ma høtmar cek aha mekey na, a zluram, a røzlam. A hølmanara Gazlavay maja anga ma vølar gødan mahura anda kedede a ndaw-magødan.

*Yesu a zøla Matiye  
(Mark 2.13-17; Luk 5.27-32)*

<sup>9</sup> Yesu a sløkdøey daa slam aha, a daw. Masa anga fa daw na, a høtar ndaw daha mezøley \*Matiye. Anga manjakaya fa key sløra daa slam mecekeley budaw. Ta', Yesu aa guzlar, a løvar: «Sawa, søpya.» Da ray ngene, Matiye pørta! a sløkdøey, ta', a daw asiya.

<sup>10</sup> Fa dɔba ha nekɔfey, Yesu a daw ɲga zɔmey ɔaf da way Matiye he. Daa way a, ata Yesu ta gula anɲa hay a zɔmamara ɔaf a na, ta ndɔhay ma cakala budaw ga lenj ta ndɔhay ma zlɔba \*kwakwas ɲga Mawiz. <sup>11</sup> Masa \*Fariza hay ma hɔtmatar fa zɔmam ɔaf bama ta ndɔhay a na, ta', a lɔvmatar a \*gula hay ɲga Yesu: «Bay akwar a zɔmam ɔaf ta ndɔhay ma cakala budaw lenj ta ndɔhay ta mebɔrey hay na, kwara?»

<sup>12</sup> Yesu ma cɔnda mey a na, ta', aa guzltar, a lɔvtar: «Ndɔhay masa wurwer na, mey ata ta ndaw ma vɔlda slalak daa ba. Ama ma wufey mey ɲga ndaw ma vɔlda slalak na, si ndɔhay masa-macay hay gway. <sup>13</sup> Ehe, sɔrmara mey ɲga Gazlavay mawuzlalakaya daa ɔerewel anɲa, a lɔvey: “Ya wufey na, ndɔhay a sɔram dey-ceceh fa ndɔhay, ba na, a hɔrmaya gɔnaw hay ba.” Yaw, ndɔhay ma wulkam ata ndɔhay maaya fa mey ɲga Gazlavay na, Gazlavay ta slɔrdiwa ɲga zɔlta daa ba, ama a slɔrdiwa na, ɲga zɔley ndɔhay ta mebɔrey.»

*Mey da ray mekey daliyam*

*(Mark 2.18-22; Luk 5.33-39)*

<sup>14</sup> Fa dɔba ha, gula hay ɲga \*Jan-Baptis a ɲgɔcham a cakay Yesu, aa cɔɔdamara, a lɔvmar: «Ala ta ndɔhay \*Fariza hay na, ala fa kam \*daliyam \*, ama gula akah hay na, a kam daliyam ba sɔlak na, maja me?» <sup>15</sup> Yesu a

---

**9:10** 9.10 11.19; Mk 2.15; Lk 5.29; 7.34; 15.1-2; 19.7 **9:13** 9.13 Aw 6.6; Mt 12.7; Lk 19.10 \* **9:14** 9.14 daliyam: Da ndaw Jɔwif fa key daliyam na, a zɔmey cek ba amba a nar ray a Gazlavay, a mbɔɔda menjey anɲa. **9:14** 9.14 6.16-17; 11.18-19; Lk 7.33-34



mbədfdata ta mey-menğey, a lövey: «Da ndaw a zəlwa ndəhay aa mekey mələk nga kwakwa nga zəmey cek na, ndəhay a, aa səmam da cakay zel-kwakwa ha daa ba daw? Ta pas nğene a kam daliyam ba. Ama pas a, a sawa la masa ata ma da kərzamara zel-kwakwa † ha na, a kam daliyam la dəba.

<sup>16</sup> «Yaw, ndaw a gwa nga dəpa zana magurma ta zana mawiya daw? A key ba, maja zana mawiya madəpkaya na, a nəsa zana magurma ha la, zana magurma ha a da nğorey a dey a.

<sup>17</sup> «Asaya, ndaw a gwa a zlərey wuzam meededek e aa kwene-kwene ‡ magurma ba. Da a zləra a hwađ a na, wuzam a, a məsley, a nğəra kwene-kwene he la. Anda keđe, wuzam a leŋ kwene-kwene he a nəsam la cewete. Da nga key maaya na, si ndaw a zləra wuzam meededek e na, aa kwene-kwene mawiya. Anda keđe, wuzam a, aa daha, kwene-kwene may aa daha, cewete a nəsam ba.»

*Yesu a mbəley nğwas ta a sləkđadərwa dam daa meməcey*

*(Mark 5.21-43; Luk 8.40-56)*

<sup>18</sup> Daa masa Yesu faa guzltar anda nğene na, ndaw mahura daa \*way-mewuzey-mey nga Gazlavay a sawa fa aŋga, ta', a regedey fa mey aŋga, a ləvar: «Dam adaw ta məcey sem wure wure keđe. Ama ya fa kaka ambahw, sawa, pa

---

† **9:15** 9.15 zel-kwakwa: Yesu a nğey mey da ray ndəhay ma da kərzamara nga keđey vagay. **9:15** 9.15 22.2; 25.10; Jan 2.1-12; 3.29; CWJ 19.7 ‡ **9:17** 9.17 kwene-kwene: Ara cek anda des (gwajakwad) ama makakaya ta ambal.

har akah a ray a amba a hëtar mesëfney anğa aa slam a cënga.» <sup>19</sup> Da ray nğene, Yesu a lecey, a diyam asiya ta gula anğa hay.

<sup>20</sup> Nğwas daha, mambaz fa mbëdwa da hwađ dëga mevey kuraw a ray a cew. Daa masa Yesu fa daw na, nğwas aha a nğëchey a cakay a ta fa dëba, ta', a gësfar har fa mey nğa zana nğa Yesu a. <sup>21</sup> A ka anda keđe maja anğa fa wulkey daa mevel anğa, a lëvey: «Da ya gwa nğa gësfar har kwa fa zana anğa na, ya mbëley la.» <sup>22</sup> Yesu pëla! a mbëdey dey fa dëba, a nëka nğwas aha, ta', a lëvar: «Dëka mevel, dam ađaw! Ka ta mbëley cay maja kah ma paya nğa ndaw akah fara fara.» Wure wure nğene, nğwas aha ta mbëley cay.

<sup>23</sup> Fa dëba ha, Yesu a wuswa a way ndaw mahura heyey. A hëtfatar ndëhay ma fa slëlam, asaya ndëhay makustakaya fa mbëdam haya! haya! <sup>24</sup> Ta', a lëvtar a ndëhay a: «Hwam la fede! Dam aha ta mëcey daa ba, ama a key a ney aa đar.» Ndëhay a, aa sanğëram da ray a. <sup>25</sup> Daa masa ndëhay a ma bamawa sem aa ambaw na, Yesu a mbëzey a way a, ta', a kërza dam aha fa har. Dam a përtal! a slëkdey. <sup>26</sup> Mey da ray dam aha, a cëney aa wura aa wura tabiya daa hwayak a.

*Yesu a wurey dey nğa ndëhay wulaf hay cew*

<sup>27</sup> Masa Yesu ma slëkdey da way ndaw mahura heyey la na, wulaf hay cew daha, a sëpmar

**9:20** 9.20 Lev 15.25-27; Mt 14.36; Mk 5.27; 6.56; Lk 6.19; 8.44

**9:22** 9.22 8.13; Mk 5.34; 10.52; Lk 7.50; 8.48; 17.19; 18.42; SNM 3.16 **9:24** 9.24 Jan 11.11-13 **9:25** 9.25 Mk 5.41

wurzay ta mewudey, a ləvam: «Sərfandar dey-ceceh, may taw, Bəzey ŋga \*Davit!»

<sup>28</sup> Yesu a wusey a way na, wulaf hay cew heyey, a mbəzam asiya. Ta', Yesu aa cəfdəta, a ləvtar: «Ka wulkam na, ya gwa ŋga wurkwara dey akwar daw?» A mbəɗdamara, a ləvmar: «Ahaw, Bay Mahura.» <sup>29</sup> Da ray ŋgene, anɗa gas! gas! a gəsfatar har fa dey ŋga wulaf hay a, ta', a ləvtar: «Dey akwar ŋga wuram anda akwar ma təbmara ya gwa ŋga wurkwara.»

<sup>30</sup> Dey ata wur! wur! a wuram. Yesu a kətata, a ləvtar: «Jəkam sləmay maaya maaya, ndaw a da cənda cek masa ma key ta akwar keɗe ba.»

<sup>31</sup> Ama ndəhay cew kaa heyey, a mbəkdamara slam aha nekəɗey na, ta', a kadamara mey da ray Yesu a ndəhay daa hwayak a tabiya.

*Yesu a bəla malula da ray ndaw ma gwa ŋga guzley ba*

<sup>32</sup> Masa ndəhay Yesu ma wurtara dey heyey fa bamawa da way a la na, ta', a handamar ndaw daha ma gwa ŋga guzley ba, maja anɗa ta malula da ray. <sup>33</sup> Ta', Yesu a bəla malula da ray ndaw a, ndaw aha aa guzley dəba. Da ray ŋgene, ndəhay tabiya fetede a rəzlam, a ləvam: «Dəga ŋga menjey aləkwa, ya ta hətkwa cek ma key anda keɗe daa hwayak ŋga \*Israyel keɗe daa ba.» <sup>34</sup> Ama ndəhay \*Fariza hay na, aa guzlam, a ləvam: «Ara bay ŋga mesəfney maaya

ba hay ma vølar gødan nga bøley malula da ray ndøhay.»

*Mey da ray Yesu, ma key dey-ceceh fa ndøhay*

<sup>35</sup> Yesu fa pøkta berney hay ta slala hay masa gweegwe ta døhwa nga \*Galile. Fetede faa sèrkadata ndøhay daa way ata hay mewuzey mey nga Gazlavay, fa wuzey \*Mey-maaya-mawiya da ray \*mewey nga Bay Gazlavay da ray ndøhay, asaya, fa mbøley ndøhay daa macay hay wura wura cøpa lej ndøhay maahølbatakaya tabiya.

<sup>36</sup> Masa Yesu ma høtatar ndøhay makustakaya na, dey-ceceh a kar maja a gøram, gødan ata daa saba, ata anda tøbøn hay manjar mecækwer.

<sup>37</sup> Maja ngene ta', a ngatar mey a gula anga hay, a løvtar: «Cek ta key la ga da ley §, ama ndøhay pøreh nga kamørw a ngada way.

<sup>38</sup> Anda keðe, kamar ambahw a bay nga ley a, nga slørw a ndøhay mekele saya a dey a nga kawa cek hay da ley a.»

## 10

*Yesu a slørd data gula anga hay kuraw a ray a cew*

*(Mark 3.13-19; Luk 6.12-16)*

<sup>1</sup> Fa døba ha, Yesu ta', a zølta gula anga hay kuraw a ray a cew amba a slørd data nga key

---

**9:34** 9.34 10.25; 12.24, 27; Mk 3.22; Lk 11.15, 19    **9:35** 9.35 4.23

**9:36** 9.36 Mesl 27.17; Ez 34.5; Zak 10.2; Mt 14.14; 15.32; Mk 8.2

**§ 9:37** 9.37 Cek ta key la ga da ley: Yesu a wa cek ma key da ley ta ndøhay ma da tøbmara mey nga Gazlavay, ama ndøhay pøreh nga jønta nga tøbmara mey nga Gazlavay a. Bay nga ley a na, ara Gazlavay.

slëra anġa. A vëltar gëdan ġga bëley malula hay da ray ndëhay, asaya, ġga mbëley ndëhay daa macay hay wura wura cëpa, leġ ndëhay maahëlbatakaya tabiya.

<sup>2</sup> Ndëhay meslërey kuraw a ray a cew e na, ara \*Simanġw, ndaw masa ma zëlmara \*Piyer ta mëlmaħa \*Andëre, \*Jak ta mëlmaħa \*Jan, ata cewete bëza hay ġga Zebede, <sup>3</sup> \*Fëlep, \*Bartelemey, \*Tuma, \*Matiye, \*ndaw ma cakala budaw, Jak, bëzey ġga Alfe, Taade, <sup>4</sup> Simanġw, ndaw da wuzlah ndëhay ma wudam ġga lëhdamata ndëhay ata hay dasi har ġga masa-gëra ata hay, leġ Juda Iskariyawt, ndaw ma vëlda Yesu a har masa-gëra anġa hay.

*Mey da ray slëra ġga ndëhay meslërey ġga Yesu ma da kamara  
(Mark 6.7-13; Luk 9.1-6)*

<sup>5-6</sup> Yesu a slërdata gula anġa hay kuraw a ray a cew heyey, a këtata, a lëvtar: «Diyam fa ndëhay \*Israyel hay. Ata maazëftakaya anda tëban ġay maa zëdam. Ama a slala ndëhay masa \*Jëwif hay ba hay na, ka da diyam ba. Ka da diyam a slala \*Samari hay ba may. <sup>7</sup> Da akwar fa diyam daa cëved na, wuzdamatara a ndëhay, lëvmatar, “Gweegwe cay, bay ġga Gazlavay a wuzwa.” <sup>8</sup> Mbëldamata masa-macay hay, slëkdadamatërwa ndëhay mamëctakaya, përmata maasëkula hay, bëlmeta malula hay da ray ndëhay. Gëdan a na, ya vëldakwara ġga

---

**10:2** 10.2-4 Jan 1.40-44; SNM 1.13      **10:5-6** 10.5 Lk 10.33  
**10:5-6** 10.5-15 Lk 10.4-12      **10:5-6** 10.6 Jer 50.6; Mt 15.24; SNM  
13.46      **10:7** 10.7 4.17

maaya. Yaw, akwar may, kamatarar nga maaya.  
 9 Da akwar fa diyam na, ka da lam dala a har ba.  
 10 Ka da diyam ta gabal da har ba, kwa ta zana hay cew ba. Ka da diyam kwa ta tarak ba, kwa ta zlanday ba. Maja ndaw ma ka slɛra na, si a hɛtey cek mezɛmey maja slɛra aɗga.

11 «Da akwar ma wusam la aa berney, da daa ba, a slala na, sɛpam ndaw masa ma wudɛy nga tɛɓkwar. Njam da way aɗga haa kasl pas masa akwar ma da diyam. 12 Da akwar fa mbɛzam a way ndaw na, ka camatar har, ka lɛvmatar: “Maaya nga Gazlavay nga sawa a ray akwar.” 13 Da ndɛhay da way a ta tɛɓmakwar la na, cacɛɗamara Gazlavay amba maaya aɗga a njeɣ a ray ata. Ama da ta tɛɓmakwar daa ba na, cacɛɗamara Gazlavay amba a la maaya aɗga ha la da ray ata. 14 Da way, da daa ba, da slala masa ndɛhay da hwad a, a gɛmam nga tɛɓmakwar ba, asaya, a gɛmam nga cɛndamara mey akwar ba na, raramatarar lagwada fa salay akwar hay\*, bam la da way a, da daa ba, da slala ha. 15 Ya fa lɛvkwar fara fara, ta pas nga sariya na, Gazlavay a da sɛrdata banay ta ndɛhay daa berney a ɗgene ma fɛna nga ndɛhay daa berney

**10:10** 10.10 1Kwr 9.14; 1Tm 5.18      **10:13** 10.13 Lk 2.14

\* **10:14** 10.14 raramatarar lagwada fa salay akwar hay: Da Jɛwif hay fa pɛkam daa hwayak nga Jɛwif hay ba hay na, a raramara lagwada fa salay ata hay leɗ fa zana ata hay maja a wulkam lagwada ha a da zlɛfta. Yesu a lɛvtar a gula aɗga hay, da ndɛhay da slala a tɛɓmara mey ata ba na, nga raramatarar lagwada fa salay ata hay kɛne. Nɛka Mk 6.11; Lk 9.5.      **10:14** 10.14 SNM 13.51

nga \*Sadawm ta nga \*Gwamar †.»

*Mey da ray banay ma da sawa a ray ndəhay  
meslərey nga Yesu*

*(Mark 13.9-13; Luk 21.12-17)*

<sup>16</sup> Yesu a patar lenjesl, a ləvtar: «Jəkam sləmay, ya fa slərdakwar anda təbaŋ hay ngada wuzlah gədey-ley hay. Anda keɗe, wam vaw fa ndəhay anda zezekw hay ma wam vaw fa ray ata. Təram ndəhay meekwed-mey anda makurgwadakw hay.

<sup>17</sup> Wam vaw, maja a kərzamakwar la, a handamakwar la fa mey nga ndəhay ma ka sariya. Asaya, a sləɗmakwar la daa way ata hay mewuzey mey nga Gazlavay.

<sup>18</sup> A ɗaɗamakwar la fa mey nga ndəhay mahura hay lenj fa mey nga bay hay maja akwar ndəhay aɗaw hay. Gazlavay a pəskatar mey la nga handamakwar amba ka kam sede da ray aɗaw fa mey ata lenj fa mey nga ndəhay masa \*Jəwif hay ba hay.

<sup>19</sup> Da ta handamakwar la aa sariya na, ka da həbam ray da ray mey masa akwar ma daa guzldamara ba, maja mey masa akwar ma daa guzldamara ŋgene na, a bawa la daa masa akwar faa guzlam.

<sup>20</sup> Yaw, mey a, a da bawa ta fa akwar ba, ama ara Mesəfney nga Papakw akwar Bay Gazlavay ma da balakwara mey a.

---

† **10:15** 10.15 Berney hay nga Sadawm ta nga Gwamar na, Gazlavay ta pəlhata sem cewete zleezle maja mebərey nga ndəhay daa berney hay a kalah. Nəka Mezley 18 ta 19. **10:15** 10.15 MC 18.20; 19.1-29; Mt 11.24 **10:16** 10.16 Lk 10.3 **10:17** 10.17 SNM 5.40; 2Kwr 11.24 **10:17** 10.17-22 24.9-14; Mk 13.9-13; Lk 21.12-19; Jaŋ 16.1-4 **10:18** 10.18 SNM 24.1-26 **10:19** 10.19-20 Lk 12.11-12

21 «Ndəhay a vəldamata mələma ata hay la ɲga kəfey vagay. Papan hay may, a vəldamata bəz ata hay la kəne. Bəza hay a kam həma la a ray papa ata hay ta mama ata hay, amba ndəhay a kədmata vagay. 22 Ndəhay cəpa a da ɲgəldamakwar ba maja yah. Ama ndaw ma bəsa banay a la haa kasl mēndəvey a na, Gazlavay a ləhda la. 23 Da fa sərđamakwar banay da slala na, diyam a slala mekele. Ya fa ləvkwar fara fara, ta pas masa yah, \*Bəz ɲga Ndaw, ma da vəhwa na, akwar ma ndəvdamara sləra akwar da slala hay tabiya ɲga \*Israyel daa ba araɲ.

24 «Ndaw maa sərkey na, a səra cek a fəna ndaw maa sərkada ba. Ndaw ma ka sləra na, mahura da ray bay aɲga ba. 25 Ndaw maa sərkey na, a da tərey anda ndaw maa sərkada ha gway. Ndaw ma ka sləra na, a da tərey anda bay ɲga sləra ha gway. Yaw, akwar na, anda ndəhay da way ađaw, da ta zəlmaya “\*Beyelzebul †” sem na, ɲgene he, akwar ndəhay da way ađaw, a da cəđmakwar ma fəna.»

*Ka da zluram ta ndəhay ba*

*(Luk 12.2-9)*

26 «Da ray ɲgene, ka da zluram ta ndəhay ba. Cek tabiya masa ndəhay ma bədamara, a wuzwa la a palah, cek hay masa ndəhay ma sərmara ba na, a sərmara la. 27 Mey masa yah ma wuzdakwara ta mayal a keđe na,

---

**10:21** 10.21 Mi 7.6; Mt 10.35; Lk 12.52-53    **10:22** 10.22 5.11; Jan 15.18    **10:23** 10.23 16.28; SNM 8.1    **10:24** 10.24-25 Lk 6.40; Jan 13.16; 15.20    † **10:25** 10.25 Beyelzebul: Mezəley ɲga bay ɲga mesəfney maaya ba hay.    **10:25** 10.25 9.34    **10:26** 10.26 Mk 4.22; Lk 8.17



wuzdamərwa a palah. Yaw, mey adaw masa akwar ma cəndamara ta mey-meesekey kefe na, təpam aa ray nga aŋgwa, wudmara ta gədaŋ a ndəhay tabiya. <sup>28</sup> Ka da zluram ta ndəhay ma da kədfmakwar vagay ba, maja a da kədfam na, vaw akwar daada gway, ama a gwamara a ray mesəfney akwar ba. Zluram na, si ta Gazlavay gway. Aŋga na, a gwa nga kəzla vaw akwar ta mesəfney akwar aa vəgedŋ nga awaw magaza.

<sup>29</sup> Diyaŋ mecəhe mecəhe cew na, a gwa nga hədfkedey dala pal daada, ba daw? Ama kwa dīyaŋ mecəhe pal fa da kəzlwa a hwayak ŋgaa zədey na, daa ba, si Papakw akwar Bay Gazlavay ma vəlda cəvedŋ ŋgaa zəfda. <sup>30</sup> Akwar may, kwa eŋgwec nga ray akwar hay na, masləftakaya pal pal tabiya. <sup>31</sup> Yaw, maja ŋgene, ka da zluram ba. Akwar na, Gazlavay a wudkwar a fəna dīyaŋ hay mecəhe mecəhe ga ŋgene, ba daw?

<sup>32</sup> «Kwa waawa ma ləvey fa mey nga ndəhay, aŋga ndaw adaw na, ŋgene, yah, ya da ləvey fa mey nga Papay da vadŋ, aŋga, ndaw adaw may.

<sup>33</sup> Ama ndaw ma ləvey fa mey nga ndəhay, a sərya ba na, ŋgene, ya da ləvey fa mey nga Papay da vadŋ, ya səra ndaw a ba may.»

*Mey da ray ndəhay ma wunkam d'ay maja mey nga Yesu*

*(Luk 12.51-53; 14.26, 27)*

<sup>34</sup> Yesu a patar leŋgesl saya, a ləvtar: «Ka da wulkam ya sawa nga handawa zazay a bəla na, kəne ba. Fara fara, ya sawa na, nga handawa

zazay ba, ama ya handawa vëram. <sup>35</sup> Ya sawa na, amba ya wunkatar d'ay nga böz-mezöle ta papaha, nga dam-mangusa ta mamaha, lej nga ngwas ta mamanj nga zel e. <sup>36</sup> Kwa da way ndaw pal na, ndöhay siya hay a da tëram masa-gëra nga siya hay.

<sup>37</sup> «Kwa waawa ma wudfa papaha ta mamaha kalah a fëna anga ma wudya na, ta wusa nga njeý ta yah daa ba. Asaya, kwa waawa ma wudfa böz anga hay ta dam anga hay kalah a fëna anga ma wudya na, ta wusa nga njeý ta yah daa ba.

<sup>38</sup> Kwa waawa ma bësa banay § ma da sawa a ray a maja yah daa ba na, ta wusa nga njeý ta yah daa ba. Asaya, kwa waawa ma sëpya daa ba na, anga ta wusa nga njeý ta yah daa ba may.

<sup>39</sup> Yaw, kwa waawa ma wudfey nga lëhda heter anga na, aa zëd'da la. Ama ndaw ma vëlda heter anga maja yah na, a hëtar la aa slam a.»

*Gazlavay ma da pëley mawurbay nga slëra na, ngada wa hay wa?*

*(Mark 9.41)*

<sup>40</sup> «Kwa waawa ma tëbkwar la ta meesëmey na, a key a tëbey ngene na, yah. Ndaw ma tëbya na, a key a tëbey ngene na, ndaw ma slërdiwa.

<sup>41</sup> Yaw, kwa waawa ma tëba \*ndaw ma tëla mey

---

**10:34** 10.34 Lk 2.14    **10:35** 10.35 10.21; 24.10; Mk 13.12; Lk 21.16    **10:35** 10.35-36 Mi 7.6    **10:37** 10.37 Mew 13.7-10; 33.9;

Mt 19.29; Mk 10.29; Lk 18.29    § **10:38** 10.38 Ta mey Gërek a lëvey: «Kwa waawa ma la hwadam anga mazlanjalakaya nga daw asi adaw daa ba na, ta wusa nga njeý ta yah daa ba.»    **10:38** 10.38-39 16.24-25; Mk 8.34-35; Lk 9.23-24; Janj 12.25-26    **10:40** 10.40 18.5; Mk 9.37; Lk 9.48; Janj 13.20; Gal 4.14

nga Gazlavay ta meesəmey, maja a səra, anğa ndaw ma təla mey nga Gazlavay na, a hətey mawurbay nga sləra anğa la anda nga ndaw ma təla mey nga Gazlavay. Yaw, kwa waawa ma təba ndaw maja a səra, ara ndaw maaya fa mey nga Gazlavay na, a hətey mawurbay nga sləra anğa la anda nga ndaw maaya ha may. <sup>42</sup> Kwa waawa ma vəlar yam makəslkaya ngada ndaw pal da wuzlah akwar, masa ma pa ray anğa nga mecəhe, maja a səra, anğa gula adaw na, ya fa ləvkwar fara fara, a hətey mawurbay nga sləra anğa la.»

## 11

*(Luk 7.18-35)*

<sup>1</sup> Masa Yesu ma kətata ndəhay anğa hay meslərey kuraw a ray a cew heyey cay na, pərta! a sləkdey, a daw nga wuzey \*Mey-maaya-mawiya ngada ndəhay da slala hay fetede.

*Jan-Baptis a slərdata gula anğa hay fa Yesu*

<sup>2</sup> \*Jan-Baptis, anğa daa fərsəne. Daa masa anğa daa fərsəne he na, a cənda mey da ray sləra nga Yesu \*Kəriste. Ta', a slərey gula anğa hay siya fa Yesu a <sup>3</sup> ngaa cəfdamara, a ləvmar: «Kah na, Kəriste, ndaw ma da sawa nga ləhdata ndəhay heyey daw? Da daa ba, ya səkwam ndaw mekele ma da sawa daw?» <sup>4</sup> Yesu a mbədfatara, a ləvtar: «Diyam, kadamara cek masa akwar ma cəndamara ta sləmay akwar, ta masa akwar ma hətmar ta dey akwar keđe a Jan-Baptis. <sup>5</sup> Ləvmar na, wulaf hay fa hətmar dey dəba,

jegwer \* hay fa diyam maaya maaya ta salay ata, maasəkula hay ta sədam sem, madagazlam hay fa cənam sləmay, ndəhay maməctakaya fa sləkdamawa daa meməcey, ndəhay masa-viya hay fa cəndamara Mey-maaya-mawiya dəba.

<sup>6</sup> Ndaw ma mbəkda mey adaw ba maja sləra masa yah ma ka na, maaya ŋga Gazlavay aa da ray a.»

### *Mey da ray Jan-Baptis*

<sup>7</sup> Masa gula hay ŋga \*Jan-Baptis ta diyam sem na, Yesu aa guzltar mey da ray Jan-Baptis a, a ndəhay, a ləvtar: «Akwar ma diyam a wuzlahley na, ŋga nəkwa me? Ka nəkmawa na, guzer masa memed ma wusa daw? Ara anga ba, ba diya? <sup>8</sup> Kaa, akwar ma diyam ŋga nəkwa na, me? Ka nəkmawa na, ndaw masa ma pey zana maaya fa vaw daw? Anja ndəhay masa ma pam zana maaya fa vaw na, ata da way bay hay, ba diya? <sup>9</sup> Wuzdamiwa, ka diyam ŋga nəkmawa na, wa? Ka nəkmawa na, \*ndaw ma təla mey ŋga Gazlavay, ba diya? Ya fa ləvkwat, fara fara ara anga. Ama a fəna ndaw ma təla mey ŋga Gazlavay la saya, <sup>10</sup> maja \*Jan a na, ara ndaw masa mey ŋga Gazlavay mawuzlalakaya maa guzley da ray a, a ləvey: “Bay Gazlavay a ləvar a Bəzey anga: Ehe, ya fa slərey maslan-cəved adaw fa mey akah, amba a dīykawa cəved akah.”»

---

\* **11:5** 11.5 jegwer: Ndaw masa salay pal maaya ba. **11:5** 11.5 Iz 35.5-6; 26.19; 61.1; Lk 4.18 **11:10** 11.10 Mal 3.1; Mab 23.20; Mk 1.2; Lk 1.76

<sup>11</sup> Yesu aa guzley saya, a løyey: «Ya fa løykwār fara fara, da wuzlah ndəhay da bəla na, kwa ndaw ma fəna Jan-Baptis na, daa ba. Ama ndaw mecəhe da wuzlah ndəhay masa Gazlavay fa wey da ray ata na, ndaw aha a fəna Jan-Baptis. <sup>12</sup> Dəga ta pas masa Jan-Baptis ma zlar ŋga wuzey mey ŋga Gazlavay haa wure kefe na, ndəhay malamba masa-həma hay fa kəfam vaw ŋga təkmarā Bay Gazlavay ŋga wey da ray ndəhay. A wudam ŋga wamara bəla aa slam a ŋga Gazlavay. <sup>13</sup> Kwakwas ŋga \*Mawiz ta ndəhay ma təla mey hay tabiya taa guzlam la da ray Gazlavay ma wey da ray ndəhay. Aa guzlam anda kefe haa kasl pas masa Jan ma wuswa. <sup>14</sup> Da ka təbmara mey adaw na, ya fa løykwār, \*Eli, ndaw masa ndəhay ma təla mey hay maa guzlam zleezle da ray a ma da vəhwa heyey na, ara Jan-Baptis a. <sup>15</sup> Da ndaw, aŋga ta sləmay na, ŋga cənda mey a maaya maaya.

<sup>16</sup> «Səkway ŋga ndəhay masa wure kefe kaa na, ya da wata na, ta me? Yaw, ya da wata na, ta bəza hay masa manjatakaya da slala fa kam wasa ta mandala ata hay, a wudkam dəy da wuzlah ata, a løyam: <sup>17</sup> “Ala ta famakwar sləlam la, ama ka ta gərvam daa ba. Ala ta zlamakwar walay vagay la, ama akwar ta təwam daa ba may.” <sup>18</sup> Yaa guzlkwar anda kefe na, maja Jan ta sawa la ŋga wuzkwār mey. A key \*daliyam, asaya, a sey wuzam ba. Kaa ndəhay a løyam: “Aŋga ta malula da ray.” <sup>19</sup> Yah, \*Bəz

---

**11:14** 11.14 1Bay 17.1; Mal 3.23; Mt 17.12-13; Mk 9.13      **11:15**  
 11.15 13.9, 43; Mk 4.9, 23; 7.16; Lk 8.8; 14.35      **11:18** 11.18-19  
 9.14; Mk 2.18; Lk 5.33

nga Ndaw, ya sawa, ya fa zəmey cek, ya fa sey cek anda ndəhay mekele. Ama ndəhay a ləvam: “Nəkmara, ndaw a kefe, a wulkey si nga zəmey cek ta nga sey wuzam ngada hwaɗ anga gway. Asaya, anga na, ara jam nga ndəhay ma cakala budaw ta nga ndəhay ma zləba kwakwas nga Mawiz.” Ama yah na, ya fa ləvkwar ndəhay a da səmra lenjesl nga Gazlavay anga maaya na, ta fa sləra maaya masa ndəhay ta lenjesl nga Gazlavay ma kamara.»

*Mey da ray banay ma da sawa a ray ndəhay ma təbmara mey nga Yesu ba*  
(Luk 10.13-15)

<sup>20</sup> Fa dəba ha, Yesu a mbəɗtar ray ngada ndəhay da slala hay masa aa ma key maazla hay ga da hwaɗ a. A mbəɗtar ray na, maja ndəhay da slala hay a, ta mbəɗdamara menjey ata daa ba. <sup>21</sup> A ləvtar: «Haya! ndəhay da slala Kwaraziŋ, banay a sawa la a ray akwar. Haya! ndəhay da slala Betsayda, banay a sawa la a ray akwar. Da ndəhay daa berney nga Tir ta nga Sidanw ta hətmatar maazla hay a la na, anja ta mbəɗdamara menjey ata sem dəga zleezle, anja ta kəzlam zana nga sak meefərey vaw sem fa vaw, asaya, ta pətkwalam sem daa bebədes nga wuzwa na, ata ta mbəɗdamara menjey ata da bəla cay. <sup>22</sup> Da ray ngene, ya fa kadakwara, ta pas masa Gazlavay ma da ka sariya da ray bəla na, Gazlavay a da sərdakwar banay ma fəna nga ndəhay daa berney nga Tir ta nga

---

**11:19** 11.19 9.10; 11.2 **11:21** 11.21 Tir ta Sidanw: 15.21; Iz 23.1-16; Am 1.9-10; SNM 12.20

Sidanw. <sup>23</sup> Akwar ndəhay da Kapernayum may, ka wulkam na, Gazlavay a ɲgəlkwār la a vad daw? Ara kəne ba. A da kəzłakwar aa slam ɲga ndəhay maməctakaya. Ya ta key maazla hay la da wuzlah akwar. Da ndəhay daa berney ɲga \*Sadawm ta hətmatar maazla hay a kefe la na, anja berney ata ta pəlhey daa ba, anja ɲnga daha haa wure kefe. <sup>24</sup> Da ray ɲgene, ya fa kadakwara, ta pas masa Gazlavay ma da ka sariya da ray bəla na, Gazlavay a da sərdakwar banay ma fəna ɲga ndəhay daa berney ɲga Sadawm.»

*Yesu a kar suse a Gazlavay ta meesəmey  
(Luk 10.21, 22)*

<sup>25</sup> Daa ɲgene, Yesu aa guzley, a ləvey: «Waa Papay Bay Gazlavay, ndaw ma wa slam da vad ta da hwayak, ya fa kaka suse, maja ka ta wuzdərwa maaya akah la a ndəhay ma səra cek ba anda bəza hay mecəhe hay. Ama ɲgada ndəhay masa ta lenjesl ma səra cek na, ka ta bəda maaya ha sem fa ata. <sup>26</sup> Ahaw, Papay, maja ta mbafaka sem ɲga ka kəne.»

<sup>27</sup> Ta', Yesu aa guzłtar a gula ɲnga hay, a ləvey: «Papay ta vəldatiwa cek hay tabiya sem asi har adaw. Kwa ndaw pal ma sərya, yah, \*Bəz ɲga Ndaw na, daa ba, si Papay. Asaya, kwa ndaw pal ma səra Papay daa ba may, si yah, Bəzey ɲnga, leɲ ndəhay masa yah ma wufey ɲga wuzdatara.»

*Mey da ray Yesu ma da mæskadata vaw ta ndøhay*

<sup>28</sup> «Akwar ndøhay masa fa gøram nga søpey mey hay mekele mekele nga \*ndøhay maa særkada kwakwas nga Mawiz ñgene, samawa fa yah, akwar fa da gøram daa saba. <sup>29</sup> Cøndamara mey adaw, samawa, sasærkam fa yah, maja yah ndaw meekwed-mey, ka da mæskam vaw ta zazay. <sup>30</sup> Meesærkey adaw na, anga ta banay nga cøney ba, kwa sløra masa yah ma da løvkwar nga key na, aa ta gøra daa ba.»

## 12

*Yesu, anga bay ma wey da ray pas memøskey-vaw*

*(Mark 2.23-28; Luk 6.1-5)*

<sup>1</sup> Pas pal daha, ara ta \*pas memøskey-vaw, ata Yesu ta gula anga hay a diyam taa ley nga cek anda daw \*. May fa catar a gula anga hay a. Da ray ñgene, ta', a høbam cek hay a heyey, aa mbøðmara. <sup>2</sup> Daa masa ndøhay \*Fariza hay ma høtmatar gula anga hay fa høbam cek aha na, ta', aa guzlmara a Yesu, a løvmara: «Haya! Nøkta gula akah hay fa kam sløra ta pas memøskey-vaw, ara cek matøkakaya daa \*kwakwas nga Mawiz.»

<sup>3</sup> Yesu a mbøðdatara, a løvtara: «Akwar ta janamara daa ðerewel nga Gazlavay cek masa \*Davita ma ka zleezle na, daa ba daw? Ta pas

---

**11:28** 11.28-30 Iz 28.12    **11:29** 11.29 Jer 6.16    \* **12:1** 12.1  
cek anda daw: Ta mey Pelta na, mezøley «alkamaari», ta mey Nasara «le blé».    **12:1** 12.1 Mew 23.25-26    **12:2** 12.2 Mab 20.8-10



lanġar daha, ata Davit ta ndəhay anġa hay, may fa catar, ama cek mezəmey fa ata daa ba. <sup>4</sup> Maja nġene Davit e a mbəzey aa way nġa Gazlavay, anġa ta ndəhay anġa hay, ta', a zəmamara peŋ masa mavəldakaya nġada Gazlavay. Kwa kwakwas aləkwa ta pəskatar mey nġa zəmamara daa ba, anja nġa zəmamara na, si ndəhay ma ka kwakwas nġa Gazlavay gway. <sup>5</sup> Asaya, ka ta janġamara mey nġa kwakwas nġa Mawiz la, ta pas meməskey-vaw na, ndəhay ma ka kwakwas a fa kam sləra daa \*Way-mekey-kwakwas nġa Gazlavay. Anda keċe, ata fa zləbmara kwakwas nġa pas meməskey-vaw, ama ara mebərey ba. <sup>6</sup> Ehe, ya fa ləvkwar, cek mahura ma fəna Way-mekey-kwakwas nġa Gazlavay na, anġa feċe da wuzlah akwar. <sup>7</sup> Derəwel nġa Gazlavay zleezle a ləvey: "Ya wuċey na, ndəhay a səram dey-ceceh fa ndəhay, ba na, a hərmaya gənaw hay ba." Ama ka ta cəndamara mabara nġa mey a fara fara daa ba. Anja da ka ta cəndamara la na, ka gwamara nġa mbədmatar ray nġada ndəhay masa manjar mebərey keċe ba. <sup>8</sup> Yaw, ma wey da ray pas meməskey-vaw na, ara yah, \*Bəz nġa Ndaw.»

*Yesu a dīyra har maməckaya nġa ndaw ta pas meməskey-vaw*

*(Mark 3.1-6; Luk 6.6-11)*

<sup>9</sup> Fa dəba ha, Yesu pərta! a sləkċey, a daw a mbəzey aa \*way-mewuzey-mey nġa Gazlavay da slala ha. <sup>10</sup> Ndaw fetecə daha, har maməckaya.

**12:3** 12.3-4 1Sam 21.2-7; Lev 24.5-9    **12:5** 12.5 Mesl 28.9-10

**12:7** 12.7 9.13    **12:9** 12.9-14 Mk 2.27-28

Ndohay \*Fariza hay daa way-mewuzey-mey a, aa cɔfdamara Yesu, a lɔvmar: «Kwakwas alɔkwa ta vɔley cɔved la nga mbɔley ndaw ta \*pas memɔskey-vaw daw?» Aa cɔfdamara anda ngene na, amba aa dɔdfamar mey. <sup>11</sup> Yesu a mbɔdfatara, a lɔvtar: «Da ndaw da wuzlah akwar, anga ta tɔban pal, da tɔban a, a kɔzley aa vɔged ta pas memɔskey-vaw na, ndaw aha, a badɔrwa daa vɔged e daa ba daw? <sup>12</sup> Yaw, ya fa lɔvkwara fara fara, ndaw a fɔna tɔban ta maaya. Kaa wara kwakwas alɔkwa a vɔley cɔved nga jɔney ndaw ta pas memɔskey-vaw ba na, kwara?»

<sup>13</sup> Cay, ta', Yesu a lɔvar a ndaw masa har mamɔckaya heyey: «Tɔdɔrwa har a.» Tal! a tɔdara har a. Ta', a dɔiyey anda har langar. <sup>14</sup> Da ray ngene, ndohay Fariza hay a, a bamawa aa ambaw, a kusam, a cɔmdamara dɔy ata nga kɔdey Yesu vagay.

*Mey da ray ndaw ma ka slɔra masa Gazlavay ma wala*

<sup>15</sup> Daa masa Yesu ma sɔra dabaray ata la na, pɔrta! a slɔkdey daa slam aha, ndal! a daw. Ndohay ga fa diyam asiya. Ta', a mbɔldata masa-macay hay cɔpa da wuzlah ata. <sup>16</sup> Ama a katar mey, a lɔvtar: «Kwa ka da wuzdamara mey da ray adaw a ndohay ba.» <sup>17</sup> Yesu maa guzley anda kedɔ na, mey a, ta key la anda \*Izay, \*ndaw ma tɔla mey nga Gazlavay zleezle, ma lɔvey:

**12:11** 12.11-12 Lk 13.15-16; 14.5      **12:14** 12.14 Jan 5.16, 18

**12:16** 12.16 8.4; 9.30; Mk 7.36      **12:17** 12.17-21 Iz 42.1-4

- 18 «Gazlavay a lövey: Kede ara ndaw ma ka sløra adaw  
 masa yah ma wala,  
 yah ma wudfa kalah,  
 yah faa sөmey ga da ray a.  
 Ya slørey Mesөfney adaw la a ray a,  
 amba a wuzdatara a ndөhay masa Jөwif hay  
 ba,  
 ya da katar sariya a ndөhay ta cөved e.
- 19 Kwa fa da tөrey vaw ta ndaw daa ba,  
 kwa fa da wudey ta wudey daa ba.  
 Kwa fa da key baazlam da wuzlah ndөhay  
 daa ba.
- 20 Fa da ngөrfa panay masa fa da hөbey na, daa  
 ba.  
 Asaya, kwa fa da mөca petөрla masa fa da mөcey  
 na, daa ba,  
 maja ara ndaw mesөrey dey-ceceh fa masa-  
 bөle hay.
- A ka sløra anga ha la haa ta pas  
 masa aa ma da ka sariya fara fara da ray  
 ndөhay cөpa.
- 21 Ndөhay tabiya a da pamara nga ndaw ata fara  
 fara.»

*Gөdan nga Yesu a sawa na, dama?  
 (Mark 3.20-30; Luk 11.14-23)*

<sup>22</sup> Ta', a handamawa ndaw-wulaf daha ma gwa  
 ngaa guzley ba, maja anga ta malula da ray.  
 Yesu ta', a mbөlda, a gwa ngaa guzley, a gwa  
 nga hөtar dey maaya maaya dөba. <sup>23</sup> Ndөhay

tabiya fetede a rəzlam, a ləvam da ray Yesu: «Da ara Bəzey nga \*Davit † heyey kwa?»

<sup>24</sup> Ama ndəhay \*Fariza hay ma cəndamara mey a kede na, a ləvam: «Ndaw kede fa bəley malula da ray ndəhay ta maazla nga \*Beyelzebul, bay nga mesəfney maaya ba hay.»

<sup>25</sup> Yesu a səra mewulkey ata, a ləvtar: «Da ndəhay daa hwayak pal a kam vəram da wuzlah ata na, hwayak a ngene a nəsey la. Asaya, ndəhay da slala hay, da daa ba, ndəhay da way ndaw pal, da ta cəmam dəy da wuzlah ata daa ba na, slala ha a nəsey la, da daa ba, way nga ndaw aha a nəsey la may. <sup>26</sup> Da ndəhay nga \*Satan fa kədam vaw da wuzlah ata na, ngene he, ara Satan a, mekədey vaw ta vaw anğa. Kaa wara a da cəmtar ray nga wey da ray ata na, kwara dəba wura? <sup>27</sup> Da ka ləvam ya bəla malula ta gədan nga Beyelzebul, bay nga mesəfney maaya ba hay na, kaa gula akwar hay na, a bəlam malula ta gədan nga wa? Da ray ngene, gula akwar hay na, a wuzdamakwara la, mey akwar ngene, ara anğa ba. <sup>28</sup> Fara fara, ya fa bəley malula ta gədan nga \*Mesəfney nga Gazlavay. A wudəy nga ləvey, Gazlavay fa wey da ray akwar cay.

<sup>29</sup> «Yaw, kwa ndaw-mayal ma gwa nga mbəzey a way ndaw masa-gədan amba a lalatərwa cek anğa hay meedey anğa na, daa ba. Si ndaw-mayal a, a key gədan teesed, a jəwa ndaw masa-

---

† **12:23** 12.23 Bəzey nga Davit: Ara mehəsley-ray ngada ndaw mawalakaya ma da sawa nga key Bay Mahura nga Israyel hay, a da yawa daa səkway nga Davit, bay nga Israyel hay zleezle.

**12:23** 12.23 20.30-31    **12:24** 12.24 10.25    **12:28** 12.28 Lk 17.21

gɔdan a dagay. Fa dɔba ha, a gwa a hɔltɔrwa cek hay da way a.

<sup>30</sup> «Da ndaw ta njeɣ ta yah daa ba na, ɳgene ndaw a ara masa-gɔra adaw. Asaya, da ndɔhay a jɔnmaya ɳga bɔcwa ray ɳga ndɔhay ɳgada fa Gazlavay ba na, a key ɳgene, aa wadamatay ray.

<sup>31</sup> Maja ɳgene, ya fa lɔvkwari, da ndaw ta key cek maaya ba sem, kwa a cɔɔa Gazlavay na, Gazlavay a gwa a mbɔkdara meberɔy aɳga cɔpa. Asaya, a gwa a mbɔkdara meɣ hay maaya ba tabiya masa aɳga maa guzlda da ray Gazlavay a. Ama da ndaw a cɔɔa Mesɔfney ɳga Gazlavay na, Gazlavay fa da mbɔkdara meberɔy aɳga daa ba sɔlak.

<sup>32</sup> Kwa anja ndaw aha aa guzley meɣ maaya ba da ray adaw, yah, \*Bɔz ɳga Ndaw na, Gazlavay a gwa a mbɔkdara meberɔy aɳga. Ama ndaw maa guzley meɣ maaya ba da ray Mesɔfney ɳga Gazlavay na, Gazlavay fa da mbɔkdara meberɔy a daa ba, kwa wure kedɔ, kwa ta vara ta vara, fa da mbɔkdara daa ba sɔlak.»

*Mey-menjeɣ ta wudez meɣ babɔza maaya ta maaya ba*

*(Luk 6.43-45)*

<sup>33</sup> «Da wudez, aɳga maaya na, a yey babɔza maaya may. Da wudez, aɳga maaya ba na, a yey babɔza maaya ba may. A da sɔmra wudez kedɔ maaya ta maaya ba na, fa babɔza ha.

<sup>34</sup> Hey! Akwar bɔza hay ɳga kucɔsl hay, akwar ndɔhay maaya ba, kaa wara ka daa guzlam meɣ

maaya na, kwara? Maja mey masa ndaw maa guzlda na, fa wuzdərwa cek masa mabadakaya daa mevel anga. <sup>35</sup> Anda kefe, ndaw maaya na, fa wuzdərwa cek maaya daa mevel anga. Ndaw malamba may, fa wuzdərwa cek malamba daa mevel anga. <sup>36</sup> Ya fa ləvkwar, ta pas masa Bay Gazlavay ma da ka sariya na, kwa waawa a kadara mey anga la a Bay Gazlavay da ray mey hay maaya ba masa aa maa guzldata cəpa. <sup>37</sup> Anda kefe, da mey masa kah maa guzlda aa maaya ba na, Gazlavay a mbədfka ray la. Yaw, da mey a maaya na, ŋgene Gazlavay a paka la ŋga ndaw maaya fa mey anga.»

*Ndəhay aa cəfdamara Yesu ŋga key maazla  
(Mark 8.11, 12; Luk 11.29-32)*

<sup>38</sup> Fa dəba ha, ndəhay siya da wuzlah \*ndəhay maa sərkada kwakwas ŋga Mawiz leŋ \*Fariza hay siya aa guzlmara a Yesu, a ləvmara: «Bay ala, ya wudam ka kandar maazla ma wuzdərwa gədan ŋga Gazlavay.»

<sup>39</sup> Yesu a mbədfdatara, a ləvtara: «Akwar ndəhay masa wure kefe na, malamba hay, akwar ma mbəkdamara Bay Gazlavay sem! Ka wudam ŋga hətam maazla ma wuzdərwa gədan ŋga Gazlavay fara daw? Kwa akwar fa da hətam maazla ha daa ba, si maazla anda ma key ta \*Jawnas, \*ndaw ma təla mey ŋga Gazlavay zleezle. <sup>40</sup> Anda Jawnas ma key dar maakar taa vad, taa pas da hwad ewet mahura heyey na, ara anda ŋgene may, yah, \*Bəz ŋga Ndaw, ma da

key ɗar maakar taa vadɗ, taa pas da vøgedɗ. <sup>41</sup> Ta pas sariya masa Gazlavay ma da ka na, ndøhay daa berney nga Niniwe heyey na, a lacamawa la nga mbøɗmakwar ray, akwar ndøhay wure kede, maja daa masa ata ma cøndamara mey nga Gazlavay masa Jawnas ma wuzdatara na, ta mbøɗdamara menjey ata sem. Nøkmara, da wuzlah akwar fede, ndaw ma føna Jawnas daha, ama akwar ta mbøɗdamara menjey akwar daa ba. <sup>42</sup> Asaya, ta pas sariya masa Gazlavay ma da ka na, ngwas ma key bay daa hwayak nga Saba zleezle heyey a lacawa la nga mbøɗkwar ray, akwar ndøhay wure kede, maja anga na, a sawa da dørenj nga cøney mey da ray lenjesl maaya nga Bay \*Salamanjw. Nøkmara, da wuzlah akwar fede, ndaw ma føna Bay Salamanjw daha, ama akwar ta tøbmarara mey anga daa ba.»

*Mey da ray malula ma vøhwa a ray ndaw saya  
(Luk 11.24-26)*

<sup>43</sup> «Da masa malula ta bey sem da ray ndaw na, a daw a pøkey da ley saw, a søpey slam nga møskey vaw. Ama da ta høtey slam daa ba na, <sup>44</sup> a wulkey, a løvey: “Ngama, ya vøhey aa slam adaw masa yah ma bawa da hwaɗ a heyey.” A vøhey a ray ndaw aha aa slam anga heyey, a høtfar slam aha maɗiykaya maaya maaya, kwa meeme da hwaɗ a daa ba. <sup>45</sup> Da ray ngene, malula ha a daw, a ngølwa malula hay mekele maasala ma fønmarara ta høma nga key cek maaya ba. A samawa a ray ndaw a heyey.

Anda keɗe, ndaw aha a da serey banay ma fɛna masa ngeeme. Ara anda keɗe, cek aha a da key ta ndɛhay masa maaya ba wure keɗe.»

*Mamanɗa nɗa Yesu ta mɛlmaha hay na, ara wa hay wa?*

*(Mark 3.31-35; Luk 8.19-21)*

<sup>46</sup> Daa masa Yesu faa guzltar a ndɛhay na, ata mamaha ta mɛlmaha hay malacatakaya daa ambaw, a wudam nɗaa guzlmara. <sup>47</sup> Ndaw daha a lɛvar a Yesu: «Mamakw ta mɛlmakw hay ata malacatakaya daa ambaw. A wudam nɗaa guzlmaka.»

<sup>48</sup> Yesu a mbɛɗɗara, a lɛvar: «Mamay na, wa? Mɛlma aɗaw hay na, wa hay wa?» <sup>49</sup> Fa dɛba ha Yesu, ta', a wuzey har nɗada fa gula anɗa hay, a lɛvey: «Mamay ta mɛlma aɗaw hay na, ara ndɛhay keɗe, <sup>50</sup> maja mɛlma aɗaw, dam-mama aɗaw, da daa ba, mamay na, ara ndaw ma key cek anda Papay da vad ma wudɛy.»

## 13

*Mey-menɗey ta ndaw maa kwecey hulfad a ley*  
*(Mark 4.1-9; Luk 8.4-8)*

<sup>1</sup> Ta pas a nɗene, Yesu a bey da way, a daw a nɗey a mey dɛhwa nɗa \*Galile nɗaa sɛrkadata ndɛhay. <sup>2</sup> Ndɛhay ga a kusam a cakay a. Maja nɗene, ta', Yesu a tɛpey aa kwambiwal, a nɗey a hwad a amba aa guzltar. Kwambiwal a, aa da ray yam, ama ndɛhay a na, malacatakaya da mey



dəhwa ha. <sup>3</sup> Aa guzltar da ray cek hay ga ta mey-menjey, a ləvtar:

«Ndaw mehəvey daha, a daw ɲgaa kwecey hulfad a ley anɲa. <sup>4</sup> Daa masa anɲa faa kwacada hulfad a na, hulfad lanɲar a kəzley aa cəved. Fa dəba ha, dīyan hay a samawa, a ndamara. <sup>5</sup> Yaw, hulfad lanɲar a kəzley aa slam masa pərad, hwiyak da ray a ga daa ba. Hulfad a, a pəcey fiyaw, maja hwiyak da ray a ga daa ba. <sup>6</sup> Ama menjey nekədey, da masa pas fa tey na, a bata. Fa dəba ha, a kweley, maja slaslalay a daa vəged ga daa ba. <sup>7</sup> Hulfad lanɲar a kəzley a wuzlah hatak. Hatak a, a gəley, aa nɲərda hulfad mapəckaya ha. <sup>8</sup> Ama hulfad lanɲar na, a kəzley aa slam masa maaya, a gəley, a yey babəza ga, wurzay pal, a gwa a yey babəza temere, lanɲar kwakwar maakwaw, lanɲar may, kwakwar maakar.»

<sup>9</sup> Yesu aa guzltar saya, a ləvtar: «Da ndaw, anɲa ta sləmay na, ɲga cənda mey a maaya maaya.»

*Yesu aa guzltar a ndəhay ta mey-menjey hay na, maja me?*

*(Mark 4.10-12; Luk 8.9, 10)*

<sup>10</sup> Fa dəba ha, \*gula hay ɲga Yesu a ɲgəcham a cakay a, aa cəfdamara, a ləvmar: «Kaa guzltar ɲgada ndəhay a ta mey-menjey hay na, maja me?»

<sup>11</sup> A mbəddatara, a ləvtar: «Yaa guzltar ta mey hay menjey na, maja akwar na, Gazlavay ta vəkwar cəved la ɲga sərey mey hay mabadatakaya da ray mewey anɲa da ray

ndəhay. Ama ndəhay a kedə na, Gazlavay ta vəltar cəved ŋga sərey mey a daa ba. <sup>12</sup> Anda kedə, da ndaw a wudəy ŋga səra mey ŋga Gazlavay na, Gazlavay a jəna ŋga səra mey a la a dey a. Da ndaw a wudəy ŋga səra mey ŋga Gazlavay ba na, kwa mey a masa nekədəy daa mevel anğa na, Gazlavay a badərwa la tabiya.

<sup>13</sup> Yaw, yaa guzltar ta mey-menğey na, maja ata fa nəkam dey, ama a hətmar dey ba, fa jəkam sləmay, ama a cəndamara ba. <sup>14</sup> Anda kedə, cek aha ta key la ŋgada ata, anda mey masa Gazlavay maa guzlda zleezle ta mey ndaw ma təla mey anğa \*Izay, ma ləvey:

“Akwar fa jəkam sləmay maaya maaya,  
ama ka cəndamara ba.  
Akwar fa nəkam dey maaya maaya,  
ama ka hətmar dey ba.

<sup>15</sup> Maja ndəhay a, a gəmam ŋga cənam mey ba,  
a dəzlmata sləmay ata hay,  
a dəpmata dey ata hay.

A kamara kəne amba a hətmar dey ba,  
a jəkam sləmay ba,  
a təbmara mey a, aa mevel ata ba.

Da ray ŋgene, fa da mbəddamara menjey ata  
amba ya mbəldata na, daa ba.”

<sup>16</sup> «Ama akwar, gula adaw hay na, maaya ŋga Gazlavay aa da ray akwar, maja akwar fa hətmar dey, asaya, akwar fa jəkam sləmay. <sup>17</sup> Ya fa ləkwara fara fara, ndəhay ma təla mey hay ga zleezle ta ndəhay siya ga masa maaya fa mey ŋga Gazlavay ta wudam la ŋga hətmar cek masa

akwar ma hətmar keđe, ama ta hətmar daa ba. Ta wudam la nga cəndamara cek masa akwar ma cəndamara keđe, ama ta cəndamara daa ba.»

*Mabara nga mey-menğey ta ndaw maa kwecey hulfad*

*(Mark 4.13-20; Luk 8.11-15)*

<sup>18</sup> «Ehe, cəndamara mabara nga mey-menğey ta ndaw maa kwecey hulfad heyey dəba. <sup>19</sup> Ndəhay siya hay a cəndamara mey da ray \*mewey nga Gazlavay da ray ndəhay, ama a cəndamara mabara nga mey a ba. Bay-malula a sawa, a la mey maaya daa mevel ata la. Ngada ata na, mey a, anğa anda hulfad ma kəzley aa cəved. <sup>20</sup> Ndəhay siya hay saya ma cəndamara mey nga Gazlavay la na, a təbmara fiyaw fiyaw ta meesəmey. Ngada ata na, mey a anğa anda hulfad ma kəzley aa slam masa pərad. <sup>21</sup> Ama ndəhay a, a təbmara mey nga Gazlavay nga đar nekədey gway. Ta pas masa banay mekele mekele ma da sawa a ray ata maja mey a na, ndəhay a, a da mbəkdamara mey nga Gazlavay a fiyaw fiyaw. Ata na, anda hulfad ma pəcwa daa slam masa pərad, slaslalay daa vəgeđ ga daa ba. <sup>22</sup> Ndəhay mekele a cəndamara mey nga Gazlavay, a təbmara, ama mey a, aa zədey maja ata fa wulkam kalah da ray menjey maaya da bəla, asaya, maja a wudam zleley kalah. Ngada ata na, mey a, anğa anda hulfad masa ma kəzley a wuzlah hatak, manjanjərdakaya daa hatak a. Ata anda cek ma yey babəza ba.

<sup>23</sup> Ndøhay mekele saya, a jøkam slømay fa mey nga Gazlavay, a tøbmara. Da ray ngene, fara fara a kadamara sløra ta anga. Ata anda hulfad ma pøcwa daa slam maaya. Anda kedø, mey a, a yey daa mevel ata anda hulfad ma pøcwa ma yey ga, babøza fa vøða a key temere, mekele a key kwakwar maakwaw, da daa ba, kwakwar maakar.»

*Mey-menjey ta ley nga daw ta zlørav da hwad a*

<sup>24</sup> Fa døða ha, Yesu aa guzltar ta mey-menjey mekele a ndøhay makustakaya heyey, a løvtar: «\*Mewey nga Bay Gazlavay da ray ndøhay na, ya gwa nga wa na, ta me? Ehe, ya ngakwar mey da ray a: Ndaw daha a sløkey hulfad maaya a ley anga. <sup>25</sup> Ta tavað masa ndøhay fa nam na, masa-gøra anga, a sawa, a sløkey zlørav aa ley a, ta', a daw. <sup>26</sup> Menjey nekøðey, daw heyey a pøcwa. Zlørav a, a pøcwa may. A gølam daa slam a, a pamawa ray \*. <sup>27</sup> Anda kedø, ndøhay ma ka sløra nga bay nga ley a, ta', a samawa, a løvmar a bay ata: "Waa Bay ala, ka sløkey aa ley akah na, hulfad maaya, ba diya? Kaa zlørav na, a sawa dama?" <sup>28</sup> A mbøðdatara, a løvtar: "Ara masa-gøra aðaw ma ka sløra ha." Ta', ndøhay ma ka sløra anga hay a, a løvmar: "Anda kedø na, ka wudøey ya diyam, ya møðmata daw?" <sup>29</sup> A mbøðdatara, a løvtar: "Kay, a njey, maja da akwar fa møðmata na, ka da møðam daw maaya asiya may. <sup>30</sup> Mbøkdamata nga kam daa slam a haa kasl kiya mekey daw. Ta kiya ha ngene, ya

\* **13:26** 13.26 a pamawa ray: a tølmawa ray

da ləvtar ɲgada ndəhay ma da kamərwa daw a, ɲga ɲgəmamara zlərav a la dɔgay, ɲga jəwmata maaday a, ɲga pamatar awaw fa vəda. Ama daw maaya na, a kamərwa, a handamərwa a wuded.”»

*Mey-menɲey ta babəza ɲga bazlawar leɲ ta cek ma həsla makala*

*(Mark 4.30-32; Luk 13.18, 19)*

<sup>31</sup> Fa dəba ha, Yesu aa guzltar ta mey-menɲey mekele saya a ndəhay fetede heyey, a ləvtar: «\*Mewey ɲga Bay Gazlavay da ray ndəhay na, aɲga anda babəza ɲga bazlawar, masa ndaw ma la, ma rəba aa ley aɲga. <sup>32</sup> Aɲga mecəhe da wuzlah hulfad hay siya, ama a pəcwa, a gəley mahura da ray cek hay siya, a terey ɲga wudez, dīyaɲ hay a samawa, a dīyam way fa mey-har hay a.»

*(Luk 13.20, 21)*

<sup>33</sup> Yesu aa guzltar ta mey-menɲey mekele saya, a ləvtar: «Mewey ɲga Bay Gazlavay da ray ndəhay na, aɲga anda cek ma həsla makala masa ɲgwas ma həley kuset kədəy, ma jahada ta hapa ɲga makala ga, amba a həslərwa tabiya.»

*Yesu aa guzley ta mey-menɲey na, maja me?*

*(Mark 4.33, 34)*

<sup>34</sup> Yesu a wuzdatara mey hay cəpa ɲgada ndəhay na, ta mey-menɲey. Kwa taa guzltar ta mey mekele daa ba. <sup>35</sup> A ka kəne na, amba a

---

**13:30** 13.30 3.12; CWJ 14.14-15    **13:31** 13.31 17.20; Lk 17.6  
**13:32** 13.32 Ez 17.23    **13:33** 13.33 1Kwr 5.6; Gal 5.9    **13:34**  
 13.34-35 13.10-17

key anda \*ndaw ma tēla mey nga Gazlavay maa guzley zleezle, ma lōvey:  
 «Ya daa guzltar a ndōhay ta mey-menḡey,  
 Ya da wuzdatara cek hay masa zleezle  
 mabadatakaya  
 dōga Gazlavay ma lōma bēla.»

*Mabara nga mey-menḡey ta ley nga daw*

<sup>36</sup> Fa dōba ha, Yesu ta', a mbəkdata ndōhay heyey, a vōhey a way. Gula aḡga hay ta', a samawa a cakay a, aa cōfdamara, a lōvmar: «Wuzdandara mabara nga mey-menḡey ta zlōrav da ley heyey cey.»

<sup>37</sup> Ta', a mbēdfdatara, a lōvtar: «Ndaw ma slōka daw masa maaya na, ara yah, \*Bōz nga Ndaw. <sup>38</sup> Ley na, ara bēla. Hulfad masa maaya na, ara ndōhay ma tōbmara amba Gazlavay a wey da ray ata. Zlōrav na, ara ndōhay ma namar ray a bay-malula. <sup>39</sup> Masa-gōra ma slōka zlōrav na, ara \*Satan, bay-malula. Kiya mekey daw na, ara pas nga mendōvey nga bēla. Ndōhay ma da kamōrwa daw na, ara maslan hay nga Gazlavay da vad. <sup>40</sup> Anda ata ma ḡḡōmamara zlōrav nga tekwerrey na, ta pas mendōvey nga bēla na, a da key kōne may ta ndōhay ma namar ray a bay-malula. <sup>41</sup> Anda kedē, yah, Bōz nga Ndaw, ya slōrdata maslan adaw hay da vad la nga badamata ndōhay ma tōknamata ndōhay nga key mebōrey leḡ ndōhay ma kam cek malamba da wuzlah ndōhay masa Gazlavay ma wey da ray ata. <sup>42</sup> A da kōzlamata aa awaw mendōvey ba.

Fetede na, a tɔwam la, aa pɔdam sler la. <sup>43</sup> Ama ngada ndɔhay ma namar ray a Bay Gazlavay na, a njam la ta Papa ata, Bay Gazlavay, da vad, a wadam la anda pas. Da ndaw, anɔa ta slɔmay na, nɔa cɔnda mey a maaya maaya.»

*Mey-menɔey ta zleley mabadakaya leɔ ta bersle*

<sup>44</sup> Yesu aa guzltar ta mey-menɔey mekele saya, a lɔvtar: «\*Mewey nɔa Bay Gazlavay da ray ndɔhay na, aa letek ta zleley mabadakaya daa ley. Ndaw a daw, a hɔtar, a bada ma fɔna saya. Aa sɔmey ga da ray a. Maja nɔgene, a daw, a hɔdkadata cek anɔa hay tabiya amba a hɔdka ley a.

<sup>45</sup> «Asaya, mewey nɔa Gazlavay da ray ndɔhay na, aa letek ta ndaw ma ka filaw, ma sɔpey bersle maaya membey nɔa hɔdkey. <sup>46</sup> Da ta hɔtey bersle maaya membey ma hɔdkey ba la na, a daw, a hɔdkadata cek anɔa hay tabiya amba a hɔdka bersle he.»

*Mey-menɔey ta tabaw*

<sup>47</sup> «Asaya, \*mewey nɔa Gazlavay da ray ndɔhay na, aa letek ta \*tabaw † ma kɔrzawa ewet hay daa dɔhwa, a kusmawa sɔkway nɔa ewet hay mekele mekele ga. <sup>48</sup> Masa tabaw a ta rɔhey cay ta ewet e na, ta', a badamɔrwa a mey dɔhwa. A njam ta nɔey, a walamata sɔkway nɔa ewet hay masa maaya, a pamata aa gabal,

---

**13:42** 13.42 8.12    **13:43** 13.43 Dan 12.3; NMH 5.31; Mt 11.15

**13:44** 13.44 Fɔl 3.7-14    † **13:47** 13.47 tabaw: Ara njele mahura masa ndɔhay ga ma kɔrzadamara ewet daa slam a.

ama səkway nga ewet hay masa maaya ba na, a kəzlamata. <sup>49-50</sup> Ta pas mendəvey nga bəla na, maslan hay nga Gazlavay da vad, a samawa la nga wunkey ndəhay ma namar ray a Gazlavay ta ndəhay masa ta mebərey. Ndəhay masa ta mebərey na, a kəzlamata aa awaw mendəvey ba. Fetede na, a təwam la, asaya, aa pəfam sler la. Sariya nga Gazlavay ma da key na, ara anda kede.»

*Mey da ray mey hay mengey nga Yesu*

<sup>51</sup> Yesu aa cəfdəta gula anga hay, a ləvtar: «Ak-war ta səmbara mabara nga mey hay mengey kede la daw?» A mbəfdamara, a ləvmar: «Ahaw, ala ta səmbara la.»

<sup>52</sup> Da ray ngene, Yesu a ngatar mey mekele saya, a ləvtar: «Kwa waawa da wuzlah \*ndəhay maa sərkada kwakwas nga Mawiz ma təba amba Gazlavay a wey da ray a na, anga anda bay nga way ma badərwa zleley anga mawiya ta magurma nga jəney ndəhay.»

*Ndəhay da Nezeret a rəsmara Yesu  
(Mark 6.1-6; Luk 4.16-30)*

<sup>53</sup> Masa Yesu maa guzltar a ndəhay ta mey hay mengey cay na, ta', a sləkdey fetede, <sup>54</sup> a daw a \*Nezeret, slala masa aa ma gəley da hwaɗ a. Fetede aa sərkadata ndəhay daa \*way-mewuzey-mey nga Gazlavay. Ndəhay tabiya daa way a, a rəzlam, a ləvam: «Haya! Ma vəldara lengeşl a ndaw a kede nga sərey cek hay anda kede na, wa? A hətərwa lengeşl nga sərey cek hay a kede



na, dama? <sup>55</sup> Anğa na, bəzey nğa ndaw ma sla hwadam, ba diya? Mamaha na, \*Mari, ba diya? Ata \*Jak, \*Jawzef, \*Simanw leŋ Jud na, məlmaha hay ba diya? <sup>56</sup> Dam-mamaha hay tabiya, ata da wuzlah aləkwa fedə, ba diya? Kaa a hətərwa leŋgesl kede ta gədaŋ kede na, dama?» <sup>57</sup> Ara maja mewulkey ata ngene, ata ma təbmara mey nğa Yesu ba. Da ray ngene, Yesu aa guzltar, a ləvtar: «\*Ndaw ma təla mey nğa Gazlavay na, ndəhay a təbmara mey anğa kwa dama dama, ama ma təbmara ba na, si ndəhay daa hwayak anğa, ndəhay daa səkway anğa.» <sup>58</sup> Yesu a key maazla hay fetede nekədey gway maja ata ma təbmara mey anğa ba.

## 14

### *Mey da ray meməcey nğa Jan-Baptis* (Mark 6.14-29; Luk 9.7-9)

<sup>1</sup> Daa ngene, \*Herawt, bay daa hwayak nğa \*Galile, a cənda mey da ray Yesu. <sup>2</sup> Da ray ngene, aa guzltar a madərlam anğa hay, a ləvtar: «Ndaw aha na, ara \*Jan-Baptis. A sləkəfawa daa meməcey. Ara maja ngene, anğa ta gədaŋ nğa key maazla hay.»

<sup>3-4</sup> Herawt aa guzley anda kede na, maja ara anğa ta ray anğa ma kəda Jan-Baptis a vagay. Ehe mey da ray Jan-Baptis a: Herawt a la Herawdiyət, nğwas nğa məlmaha \*Fəlep nğa nğwas anğa, daa masa Fəlep aa ta dey dāgay. Maja ngene, \*Jan a ləvar a Herawt:

«Kah ma la ngwas nga mœlmakw ngene na, ara cek matœkakaya daa kwakwas alœkwa.» Da ray ngene, Herawt a lœvtar a sewje anga hay nga kœrzamara Jan a. Ta', sewje anga hay a, a kœrzamara, a jœwmara, a kœzlamara aa fœrsœne.

<sup>5</sup> Herawt a wudey nga kœda Jan a vagay, ama a zlurey ta ndœhay \*Jœwif hay maja a wulkam na, Jan a ara \*ndaw ma tœla mey nga Gazlavay.

<sup>6</sup> Yaw, ta pas gwagway nga mesœrfedey đar nga mayawa nga Herawt na, dam nga Herawdiyat a gœrvey fa mey nga ndœhay mazœltakaya aa gwagway a. Megœrvey a, a mbafar kalah a Herawt. <sup>7</sup> Ta', a mbedey fa mey nga ndœhay, a lœvar a dam aha: «Kwa meeme masa kah maa cœđafaya na, ya vœldakawa la.» <sup>8</sup> A mbœđara a Herawt, a lœvar: «Vœldiwa ray nga Jan-Baptis aa vœley wure kede fede.» A lœvar anda ngene na, maja mamaha ma balar mey.

<sup>9</sup> Masa Bay Herawt ma cœnda mey a kede na, mevel a tœđar. A gwa nga mbœđda mey anga ha saba, maja ta mbedey sem fa mey nga ndœhay mazœltakaya heyey. Da ray ngene, ta', a vœley cœved nga vœlda ray nga Jan-Baptis ngada dam aha. <sup>10</sup> Ta', a slœrey ndaw aa fœrsœne. Ndaw aha a đœslœrwa ray nga Jan-Baptis, <sup>11</sup> a parawa aa vœley, a handœrwa, a vœldara a dam a heyey. Ta', dam aha a handara a mamaha. <sup>12</sup> Fa đœba ha, gula hay nga Jan-Baptis a, a diyam a lamara vagay a, a pœshamara aa cœvay. Ta', a diyam, a wuzdamara mey a, a Yesu.

*Yesu a vøltar cek mezømey ηgada ndøhay ma føna gabal zlam*

*(Mark 6.30-44; Luk 9.10-17; Jan 6.1-14)*

<sup>13</sup> Daa masa Yesu ma cønda mey da ray memøcey ηga \*Jan-Baptis la na, pørta! a sløkdøey, ta', a daw ta kwambiwal amba a wusey taava anga aa slam masa ndøhay da hwad a daa ba. Masa ndøhay da slala hay ma cøndamara anga sem na, a diyam ta mey døhwa ha ta salay, a søpmar wurzay. <sup>14</sup> Annga ma wusey cay na, ta', a bønngawa daa kwambiwal a, a høtfatar ndøhay makustakaya ga fetedø. A sørfatar dey-ceceh, ta', a mbøldata masa-macay hay da wuzlah ata.

<sup>15</sup> Ta pas ηgaa kwad na, \*gula hay ηga Yesu a ηgøcham fa vøða, a løvmar: «Wure kedø hakwad cay, aløkwa da wuzlah-ley. Nngama na, ka mbødtar mey a ndøhay a ηga diyam a slala hay, amba a hødkam cek mezømey.» <sup>16</sup> Yesu a mbøddatara, a løvtar: «Ndøhay a na, si a diyam a slala hay daw? Akwar, ray akwar na, vølmatar cek mezømey a.» <sup>17</sup> Ama a mbøddamara, a løvmar: «Kwa cek mezømey fa ala daa ba, si peη zlam ta ewet cew daada gway.» <sup>18</sup> Yesu a mbøddatara, a løvtar: «Handamørwa fedø.»

<sup>19</sup> Fa døba ha, Yesu a løvtar ηgada ndøhay tabiya ηga njam a hwayak. Annga hal! a hølta peη zlam ta ewet cew heyey, a banngadø dey a vad, a kar suse a Gazlavay. Fa døba ha, a papøsa peη e, ta', a vøldatara a gula annga hay amba a wunkamatara a ndøhay makustakaya

heyey. <sup>20</sup> Kwa waawa a zəmey haa a rəhey. Gula anğa hay ta', a cakalamara siya nğa peñ e. Membəkey na, a rəhey gadakar kuraw a ray a cew. <sup>21</sup> Ndəhay ma zəmam peñ e na, ata ga ara mey ba, a fəna ndəhay gabal zlam, nğusay ta bəza hay manjar nğa sləfam.

*Yesu a daw ta salay da ray dəhwa nğa Galile  
(Mark 6.45-52; Jan 6.15-21)*

<sup>22</sup> Masa ndəhay a ma zəmam cek cay na, wure wure ngene Yesu ta', a təktar dāy a gula anğa hay nğa təpam aa kwambiwal amba ata na, a zləngam teesed a dey lanğar nğa dəhwa nğa \*Galile. Yesu na, a njeý fa dəba dāgay amba a mbədtar mey a ndəhay makustakaya heyey nğa diyam a way. <sup>23</sup> Masa ta mbədtar mey a ndəhay a cay na, ta', a təpey aa ray nğa anğwa nğa dərwa danğay. Haa tavad, anğa pal taava anğa da anğwa ha cəngə. <sup>24</sup> Kwambiwal masa gula anğa hay da hwad a heyey, anğa da wuzlah yam, anğa dərəñ ta rav-zazay, vanğwala nğa yam fa zakada \* kwambiwal a maja memed fa key ga nğada ray ata. <sup>25</sup> Fa dəba ha, gweegwe slam nğaa pərek na, Yesu ta', a daw ta salay da ray yam nğada fa ata. <sup>26</sup> Masa gula anğa hay a ma hətmər fa daw da ray yam na, a zluram ga, aa wasam pər-par! Aa guzlam da wuzlah ata, a ləvam: «Ara mamayam!» Ta', a wudam ta gədan maja mandərzay fa katar. <sup>27</sup> Ama, wure ngene,

---

**14:20** 14.20 2Bay 4.43-44    **14:23** 14.23 5.1; Lk 5.16    \* **14:24** 14.24 a zakada: a dəgda    **14:25** 14.25 Jəw 9.8    **14:26** 14.26 Lk 24.37

Yesu aa guzltar, a ləvtar: «Dəkmara mevel! Ara yah, ka da zluram ba!»

<sup>28</sup> \*Piyer a mbəfdara, a ləvar: «Bay adaw, da ara kah fara fara na, vəlya cəved amba ya daw da ray yam ngada fa kah taw.» <sup>29</sup> Ta', Yesu a ləvar a Piyer: «Sawa!»

Piyer a bərnəgawa daa kwambiwal, a daw da ray yam ta salay ngada fa Yesu. <sup>30</sup> Ama, masa aa ma nəka memed fa key ta gədan na, mandərzay a kar. A zlar nga mbəzey asi yam, ta', a wudey, a ləvey: «Bay mahura, ləhdaya!» <sup>31</sup> Wure wure ngene, Yesu tal! a təley har, a kərza fa har, a ləvar: «Ka wulkey cew cew na, maja me? Kah, ndaw masa ma paya nga ndaw akah fara fara ba ngene.» <sup>32</sup> Fa dəba ha, ta', a təpam cewete aa kwambiwal a. Wure wure ngene, memed e, deŋ! a lecey, a key saba. <sup>33</sup> Gula hay nga Yesu masa daa kwambiwal, a ragadam fa mey aŋga, a ləvmar: «Fara fara, kah na, Bəzey nga Gazlavay.»

*Yesu a mbəley masa-macay hay daa hwayak nga Genezeret*

*(Mark 6.53-56)*

<sup>34</sup> Masa ata Yesu ta gula aŋga hay ma təngam la a dey langar nga dəhwa nga \*Galile heyey na, a wusam aa hwayak daha mezəley Genezeret. <sup>35</sup> Ndəhay daa slam aha na, a səmra ara Yesu. Ta', a kadamatara mey a, a ndəhay da slala hay mekele mekele daa hwayak a. Daa masa ata ma cəndamara mey a cay na, ta', a handamar

---

**14:30** 14.30-32 8.26    **14:31** 14.31 6.30; 8.26; 16.8; 17.20; Lk 12.28    **14:33** 14.33 16.16; 27.54; Mk 15.39

masa-macay hay. <sup>36</sup> A bærkwamara amba masa-macay hay a, a gøsam har kwa fa mey nga zana anga gway. Ndøhay ma gøsfamar har cøpa na, ta mbølam sem.

## 15

### *Mey nga Yesu da ray kwakwas nga Jøwif hay (Mark 7.1-13)*

<sup>1</sup> Fa døba ha, \*Fariza hay ta \*ndøhay maa særkada kwakwas nga Mawiz a samawa da \*Jeruzelem fa Yesu, a løvmar: <sup>2</sup> «Gula akah hay a zløbmara kwakwas nga papan nga papa aløkwa hay zleezle na, maja me? A da zømam daf na, a pørmara har anda kwakwas aløkwa ma løvey ba na, kwara?» <sup>3</sup> Yesu a mbødðatara, a løvtar: «Akwar na, ka zløbmara \*mewey hay nga Gazlavay ta mesøpey kwakwas akwar hay na, maja me? <sup>4</sup> Gazlavay a løvey: “Natar ray ngada ata papakw ta mamakw.” Asaya, “Ndaw ma cøða papaha, da daa ba, ma cøða mamaha na, si a køðmara ndaw aha vagay.” <sup>5</sup> Ama akwar na, akwar faa særkadam ndøhay, ka løvam ndaw a gwa nga løvar a papaha, da daa ba, a mamaha: “Cek masa yah ma da vøldakawa nga jønka heyey na, ya vøldakawa daa saba, maja yah ma vøldara sem a Gazlavay.” <sup>6</sup> Ngene na, ndaw aha a nar ray a papaha, da daa ba, a mamaha ha saba, ba diya? Ara anda ngene, akwar fa nøsmara mey nga Gazlavay, ta mesøpey kwakwas akwar. <sup>7</sup> Akwar na, ndøhay masa ta neneh cew! \*Izay, \*ndaw ma tøla mey

nga Gazlavay zleezle maa guzley da ray akwar na, anja fara. Izay a, a løyey:

<sup>8</sup> “Gazlavay a løyey: Ndəhay keɗe fa həslmaya ray

ta meɗ ɲga tede,

ama mevel ata na, aa dərəɲ ta yah.

<sup>9</sup> Ata fa həlmamaya,

ama mehəlmey a, ta tərey sem ɲga cek ɲga tede,

maja kwakwas masa ata maa sərkadamara ɲgene na,

ara kwakwas ɲga ndaw-magədaɲ daada gway.”»

*Mey da ray cek mekey mebərey a ndaw*

*(Mark 7.14-23)*

<sup>10</sup> Fa dəba ha, Yesu a zəltərwa ndəhay makus-takaya ta', aa guzltar, a ləvtar: «Jəkam sləmay, cəndamara meɗ keɗe maaya maaya: <sup>11</sup> Cek masa ndaw ma ndəkɗa a meɗ, ma zəma na, a kar mebərey ba, ama ma kar mebərey na, si meɗ ma bawa da meɗ aɲga.»

<sup>12</sup> Ta', \*gula hay ɲga Yesu a ɲgəcham a cakay a, a ləvmar: «Ka fa səra meɗ masa kah maa guzlda keɗe na, fa catar mevel a \*Fariza hay, ba diya?» <sup>13</sup> Yesu a mbəɗɗatara, a ləvtar: «Kwa wudez wura wura masa Papay da vad, ma rəva ba na, a məɗmara la. <sup>14</sup> Mbəkdamata! Ata na, wulaf hay ma ɗaɗam wulaf hay anda ata. Da ndaw-wulaf a ɗeɗey wulaf cəla ta zlanday na, ata cewete a təɗam la aa vəgeɗ, ba diya?»

15 Fa dɔba ha, \*Piyer ta', aa guzlar, a lɔvar: «Wuzdandara mabara nga mey a kede cey.»  
 16 Yesu a lɔvey: «Akwar gula adaw hay kwa na, ka cɔndamara mey a kede ba saya na, gway daw?  
 17 Cek masa ndaw ma ndɔkwda a mey, ma zɔma na, a daw ngada hwad nga ndaw aha. Fa dɔba ha, a bawa a palah. Ka ta sɔrmara daa ba cɔnga daw? 18 Ama mey masa ndaw maa guzlda ta mey anga na, a sawa dɔga daa mevel anga. Ngene, a kar mebɔrey a ndaw aha. 19 Mewulkey maaya ba a bawa na, daa mevel nga ndaw. Ara mewulkey a ma hɔlda ndaw nga kɔdey ndaw vagay, nga ley vaw saw da palah, nga key cek malamba saw kɔne, nga leley, nga mbɔrzley a ray ndaw, leŋ nga key mbaɔa fa ndɔhay. 20 Ara sɔkway nga cek hay malamba anda kede ma kar mebɔrey a ndaw. Ama, da ndaw a zɔma cek ta har manjar nga pɔrey na, ara mebɔrey ba.»

*Ngwas masa Jɔwif ba a pa Yesu nga ndaw anga fara fara*  
 (Mark 7.24-30)

21 Fa dɔba ha, Yesu pɔrta! a slɔkdey daa slam aha, tal! a diyam ta gula anga hay aa hwayak mekele masa berney nga Tir ta berney nga Sidaŋw da hwad a. 22 Ngwas daa hwayak a daha, anga dam Kana. A sawa fa Yesu, a kar ambahw, a wudey, a lɔvar: «Waa Bay mahura, Bɔzey nga \*Davit! Dam adaw daha, anga ta malula da ray, fa sɔrda banay kalah. Sɔrfaya dey-ceceh may taw!» 23 Yesu taa guzlar kwa mey pal daa ba. Gula anga hay a



ngəcham a cakay a, a ləvmar: «Mbəðfar mey a ngwas a kefe, maja fa səpndakwar wurzay ta mewudey.» <sup>24</sup> Yesu a mbəðdatara, a ləvtar: «Gazlavay a slərđiwa na, fa ndəhay \*Israyel hay gway. Ata na, maazəðtakaya anda təban hay manjar mecəkwer.»

<sup>25</sup> Ama, ngwas a heyey a daw, a regedey fa mey anğa, a ləvar: «Waa Bay mahura, jənya may taw!» <sup>26</sup> Yesu a mbəðdara, a ləvar: «Mevəley dəf nğa bəza hay nğada gədey hay na, maaya daw?»

<sup>27</sup> Ngwas a heyey a ləvar: «Ahaw, Bay adaw, kaa gədey hay na, a zəmam meepəsey nğa dəf ma kəzley daa slam masa bay ata hay ma zəmam dəf cəngə, ba diya?» <sup>28</sup> Da ray ngene, Yesu a mbəðdara, a ləvar: «Maaya kwakwa! Kah ma paya la nğa ndaw akah fara fara. Cek aha nğa key anda kah ma wudey.» Daa ngene, dam anğa heyey a mbəley.

*Yesu a mbəley masa-macay hay ga*

<sup>29</sup> Fa dəba ha, Yesu a sləkdey daa slam aha, a daw ta mey dəhwa nğa \*Galile. Ta', a təpey aa ray nğa anğwa, cəkwan! a njeý fetede.

<sup>30</sup> Ndəhay makustakaya ga, a samawa fa vəða, a handamawa ndəhay jegwer hay, ndəhay wulaf hay, ndəhay maahəlbatakaya hay, madagazlam hay leŋ ndəhay ta macay hay mekele mekele ga. A njadamata fa mey nğa Yesu. Ta', a mbəldata.

<sup>31</sup> Ndəhay makustakaya heyey a rəzlam maja ata ma hətmatar madagazlam hay heyey faa guzlam dəba, ndəhay maahəlbatakaya hay heyey ta

mbølam cay, ndøhay jegwer hay heyey fa diyam ta salay ata hay, wulaf hay may fa høtmar dey døba. Ta', a hølmmamara Bay Gazlavay nga \*Israyel hay.

*Yesu a vøltar cek mezømey nga ndøhay ma føna gabal møfad*

*(Mark 8.1-10)*

<sup>32</sup> Yesu ta', a zøltørwa gula anga hay, a løvtar: «Dey-ceceh fa kaya fa ndøhay makustakaya keðe, maja anga kaa ðar maakar ata da cakay aðaw, wure keðe cek mezømey da har ata daa saba. Ya wudsey nga mbøkdata nga diyam a way ta may ba, maja da a da høtam gøðan daa cøved nga wusey a way ata hay ba kwa.»

<sup>33</sup> Gula anga hay a mbøðdamara, a løvmar: «Kaa aløkwa da wuzlah-ley keðe na, ya da høtmawa cek mezømey nga røhdata ndøhay tabiya makustakaya keðe na, dama?» <sup>34</sup> Yesu aa cøðdata, a løvtar: «Da har akwar feðe kaa na, peñ we?» A mbøðdamara, a løvmar: «Da har ala na, peñ maasala ta ewet mecøhe mecøhe nekøðey gway.»

<sup>35</sup> Yesu a løvtar a ndøhay makustakaya heyey nga njam a hwayak. <sup>36</sup> Anga ta', a høla peñ maasala ta ewet hay heyey, a kar suse a Gazlavay, a papøsa, ta', a vøldatara a gula anga hay. Gula anga hay a, a wunkamatara a ndøhay makustakaya ha. <sup>37</sup> Kwa waawa ta høtey cek mezømey la, haa a røhey. Ta', gula anga hay a cakalamara siya mambøkakaya. Macakalakaya ha a røhey gadakar mahura mahura maasala.

<sup>38</sup> Yaw, ndəhay ma zəməmara peŋ ta ewet e na, ndəhay gabal məfad, ŋgusay ta bəza hay manjar ŋga sləfam. <sup>39</sup> Fa dəba ha, Yesu a mbəkdata ndəhay makustakaya ha ŋga diyam a way ata hay. Ta', a təpey aa kwambiwal, a diyam aa hwayak mezəley Magadaŋ.

## 16

*Mahura ŋga Jəwif hay aa cəfdamara Yesu ŋga key maazla*

*(Mark 8.11-13; Luk 12.54-56)*

<sup>1</sup> Fa dəba ha, \*Fariza hay ta ndəhay \*Saduse hay a ŋgəcham a cakay Yesu ŋga jadamara, aa cəfdamara amba a key maazla ŋga wuzda gədaŋ aŋga a sawa ta fa Bay Gazlavay. <sup>2</sup> Yesu a mbədfdatara, a ləvtar: «[Masa pas fa kəzley, gazlavay fa key magaža na, ka ləvam mandaw na, gazlavay ŋga var a key daa ba. <sup>3</sup> Asaya, pərek pərek da masa pas fa bawa, fa cey na, ka ləvam tasana na, var a pey la. Anda kefe, da akwar fa nəkam dey a gazlavay na, ka səmara cek ma da key tasana ta cek ma da key mandaw. Kaa sləra masa yah ma ka na, ka səmara mabara ha ba na, kwara?] <sup>4</sup> Akwar ndəhay masa wure kefe na, malamba hay, akwar ma mbəkdamara Bay Gazlavay sem! Ka wudam ŋga hətam maazla ma wuzdərwa gədaŋ ŋga Gazlavay fara daw? Kwa akwar fa da hətam maazla ha daa ba, si maazla anda ma key ta \*Jawnas \* zleezle.»

Fa dəba ha, Yesu ta', a mbəkdata, a daw.

---

**16:1** 16.1 Jan 6.30      **16:1** 16.1-4 12.38-39; Lk 11.16, 29-30

\* **16:4** 16.4 Nəka Mt 12.39-40.

*Mey-menjey da ray meesærkedey nga Fariza hay ta nga Saduse hay*  
(Mark 8.14-21)

<sup>5</sup> Daa masa ata Yesu ta gula anga hay ma tɔngam sem a dey langar nga dɔhwa na, gula anga hay a ta sɔrfadamara nga handawa peɲ daa ba. <sup>6</sup> Ta', Yesu aa guzltar, a lɔvtar: «Wam vaw fa cek ma hɔsla peɲ nga \*Fariza hay leɲ nga \*Saduse hay!» <sup>7</sup> Da ray ngene, gula anga hay aa guzlam da wuzlah ata, a lɔvam: «Aa guzley anda keɔe maja alɔkwa ma sakurwa ta peɲ daa ba daw?»

<sup>8</sup> Yesu na, ta sɔra mey masa ata maa guzldamara da wuzlah ata sem. Da ray ngene, aa cɔɔɔata, a lɔvtar: «Akwar ndɔhay masa ma pamara Gazlavay nga ndaw akwar fara fara ba ngene, ka wulkam da ray peɲ masa akwar ma handamawa daa ba na, maja me? <sup>9</sup> Haa wure keɔe akwar na, ka cɔndamara mey a ba cɔnga daw? Sɔrfadamara peɲ zlam masa yah ma wunkatara ngada ndɔhay gabal zlam heyey. Mambɔkakaya na, a rɔhey gadakar we?

<sup>10</sup> Asaya, sɔrfadamara peɲ maasala masa yah ma wunkatara ngada ndɔhay gabal mɔfad heyey. Mambɔkakaya na, a rɔhey gadakar mahura mahura we?

<sup>11</sup> Yaw, daa masa yah maa guzlkwar: “Wam vaw fa cek ma hɔsla peɲ masa fa Fariza hay leɲ fa Saduse hay” na, yaa guzley na, da ray peɲ ba. Kaa ka cɔndamara ba na, kwara?»

**16:6** 16.6 Lk 12.1    **16:7** 16.7-9 Mk 6.52    **16:8** 16.8 14.31

**16:9** 16.9 14.20    **16:10** 16.10 15.37

<sup>12</sup> Anda keɗe, \*gula hay nga Yesu heyye a sərmara, Yesu aa guzlar na, da ray cek ma həsla peŋ fara fara ba, ama a ngatar mey da ray meesərkedey nga Fariza hay ta nga Saduse hay.

*Piyer a wuzda, Yesu na, ara Kəriste  
(Mark 8.27-30; Luk 9.18-21)*

<sup>13</sup> Yesu a wusey aa slam masa gweegwe ta slala Sezere-Fəlep. Aa cəfdəta gula aŋga hay, a ləvtar: «Ndəhay a padamaya, yah, \*Bəz nga Ndaw na, nga wa?»

<sup>14</sup> A mbəɗdamara, a ləvmar: «Ndəhay siya a ləvam kah na, \*Jan-Baptis, mekele hay a ləvam, kah na, \*Eli, \*ndaw ma təla mey nga Gazlavay zleezle. Ndəhay mekele hay saya a ləvam, kah na, Jeremey, da daa ba, ndaw mekele dasi ndəhay ma təla mey nga Gazlavay zleezle.»

<sup>15</sup> Ta', Yesu aa cəfdəta saya, a ləvtar: «Kaa akwar may, ka ləvam yah na, wa?»

<sup>16</sup> \*Simanw \*Piyer a mbəɗdara, a ləvar: «Kah na, \*Kəriste, Bəzey nga Gazlavay, ndaw masa aŋga daha ta dey nga sərmataw.»

<sup>17</sup> Yesu aa guzlar, a ləvar: «Simanw, bəzey nga \*Jawnas, maaya nga Gazlavay aa da ray kah, maja mey masa kah maa guzlar keɗe na, ara ndaw-magədaŋ ma wuzdakawa ba, ama ara Papay da vad ma wuzdakawa. <sup>18</sup> Yaw, yah may, ya fa ləvka, kah na, mezəley akah Piyer anda meləvey “pərad.” Ya da pa \*mecəmey-ray nga ndəhay adaw hay da ray pərad a. Kwa meməcey

na, fa da gwa ngaa zɔɗda daa ba. <sup>19</sup> Ya da vɛlka gɔɗanɗa ngɔ wurey cɔved ngada ndɔhay amba a tɔram ndɔhay ngɔ Gazlavay. Mey masa kah ma da jɔwa da bɛla na, anɗa majɔwkaya da gazlavay da vad may. Asaya, mey masa kah ma da pɛska da bɛla na, anɗa mapɛskakaya da gazlavay da vad may.»

<sup>20</sup> Yesu ta', a kɛtata gula anɗa hay, a katar mey, a lɔvtar: «Fara fara yah na, Kɔriste, ama ka da wuzdamara a ndɔhay ba.»

*Ndaw ma wufey ngɔ sɔpa Yesu na, si a key me?*

*(Mark 8.27-30; Luk 9.18-21)*

<sup>21</sup> Dɔga ta pas masa \*Piyer ma wuzda Yesu ara \*Kɔriste heyey na, Yesu a wuztar mey ngada gula anɗa hay, a lɔvtar: «Si ya daw a \*Jeruzelem. Mahura hay ngɔ \*Jɔwif hay, \*bay-ray hay ngɔ ndɔhay ma ka kwakwas ngɔ Gazlavay, lenɗ \*ndɔhay maa sɛrkada kwakwas ngɔ Mawiz na, a sɔrdamaya banay la fetede, a kɔɗmaya la vagay. Ama ngɔ ɗar maakar a na, ya slɛkɗawa la daa memɔcey.»

<sup>22</sup> Piyer ta', a zɛla Yesu ta cakay, a mbɔɗar ray, a lɔvar: «Kay! Bay mahura, Gazlavay ngɔ ka kɛne ba! Anja sɛkway ngɔ cek anda ngene na, ngɔ hɔɗfaka ba sɛlak!» <sup>23</sup> Ama Yesu pɛla! a mbɔɗey dey ngada fa Piyer, a lɔvar: «Hway la da cakay aɗaw, kah, \*Satanɗ. Kah na, ka fa sɔpey ngɔ zlanɗaɗaɗaya daa cɔved aɗaw daw?»

---

**16:18** 16.18 Lk 22.32; Jan 1.42; 21.15-17; Ef 2.20    **16:19** 16.19  
Lk 11.52; Mt 18.18; Jan 21.15-17    **16:20** 16.20 17.9    **16:21**  
16.21 17.22-23; 20.17-19; 26.2

Maja mewulkey akah ngene na, ara mewulkey nga Gazlavay ba, ama ara mewulkey nga ndaw-magədanj gway.»

<sup>24</sup> Ta', Yesu aa guzltar a gula anja hay, a ləvtar: «Da ndaw a wudəy nga səpya na, si a mbəkda mewulkey fa ray anja, a səpya ta mevel pal, si a bəsa banay ma da sawa a ray anja maja yah, anda yah ma da məcey fa hwadam mazlanjalakaya. <sup>25</sup> Sərmara, kwa waawa ma wudəy nga ləhda heter anja na, a key aa zədda, ama ndaw maa zədda heter anja maja yah na, a hətər la aa slam a. <sup>26</sup> Da ndaw a hətəy cek hay tabiya masa anja ma wudəy da bəla kefe, ama taa zədda heter anja sem na, cek hay a tabiya ngene, ta ləhdamara ndaw a la daw? Yaw, ndaw a gwa nga mbəda heter anja na, ta me? <sup>27</sup> Sərmara, yah, \*Bəz nga Ndaw na, ya da sawa ta gədanj nga Papay lenj ta maslanj anja hay da vad. Ya da pəla mawurbay kwa nga waawa cəpa, təde fa sləra masa ndaw a ma ka. <sup>28</sup> Ya fa ləvkwar fara fara, ndəhay siya da wuzlah akwar fefe, fa da məcam daa ba haa ata ma hətmaya ta dey ata la dğay, masa yah, Bəz nga Ndaw, ya fa zəma bay adaw.»

## 17

*Yesu a mbədey fa dey nga gula anja hay  
(Mark 9.2-13; Luk 9.28-36)*

---

**16:24** 16.24-25 10.38-39; Lk 14.27; 17.33; Jan 12.25-26; 1Pi 2.21  
**16:27** 16.27 Ps 62.13; Jəw 34.11; Mt 7.23-27; 13.41; 25.31-46; Lk 13.27; Jan 5.29; Rm 2.6; 1Kwr 3.13-15; 1Pi 1.17; 2Tm 4.14; CWJ 22.12  
**16:28** 16.28 10.23; 24.34; Mk 9.1; 13.30; Lk 9.27; 21.32

<sup>1</sup> Dar maakwaw fa dɔba ha na, Yesu ta', a zɔlta ata \*Piyer, \*Jak, leŋ \*Jaŋ, mɛlmanŋ ŋga Jak a, a ŋgɔlta aa ray ŋga aŋgwa maazɔma, a njam fetede taava ata. <sup>2</sup> Yesu a, pɛla! a mbɔdey fa dey ata, dey aŋga a wedey anda pas, zana aŋga mabara ndɔf-nded. <sup>3</sup> Wure wure ŋgene, ata \*Mawiz ta \*Eli a wuzmatar vaw a gula aŋga hay heyey \*. Gula hay a, a hɛtmatar fa kam maɔay ta Yesu a. <sup>4</sup> Da ray ŋgene, Piyer aa guzlar a Yesu, a lɔvar: «Waa Bay Mahura, maaya na, ya njakwa fede. Da ka wudɛy na, amba ya kɔrcey slam hay maakar, pal ŋgada kah, pal ŋgada Mawiz, pal ŋgada Eli.»

<sup>5</sup> Daa masa faa guzley araŋ na, mekwtene mewedey ndɔf-nded! a sawa, sɛrat! a sɛrtata. A cɛnam ɔay maa guzlwa daa mekwtene he, a lɔvey: «Kede he ara Bɔzey aɔaw masa yah ma wuda kalah. Ara bɔzey masa ya faa sɔmey ga da ray a. Jɔkfamar slɔmay!»

<sup>6</sup> Masa \*gula hay ŋga Yesu ma cɛndamara la na, a zluram ga, ta', a tɔɔam ta mey ta mey, dangay dar! a hwayak. <sup>7</sup> Wure ŋgene, Yesu a ŋgɔchawa a cakay ata, a wusta ta har, a lɔvtar: «Slɔkɔam, ka da zluram ba.» <sup>8</sup> A baŋgaɔamara dey na, a hɛtam ndaw mekele saba, si Yesu taava aŋga gway.

<sup>9</sup> Masa ata fa bɛrŋgamawa da aŋgwa ha na, Yesu a kɔtata, a lɔvtar: «Ka da wuzdamara cek masa akwar ma hɛtmar kede a ndaw ba, haa kasl

---

**17:1** 17.1 5.1    **17:2** 17.2-8 2Pi 1.16-18; CWJ 1.16    \* **17:3** 17.3  
 Ata Mawiz ta Eli na, ta mɛcam sem dɔga zleezle, ta wuzmatar vaw la a gula hay ŋga Yesu.    **17:5** 17.5 3.17



pas masa yah, \*Böz nga Ndaw, ma da sləkɗawa daa meməcey.»

<sup>10</sup> Ta', gula hay nga Yesu aa cəfdamara, a ləvmar: «Ndəhay maa sərkaɗa kwakwas nga Mawiz a ləvam si Eli a sawa la teeseɗ da ray \*Kəriste na, maja me?» <sup>11</sup> Yesu a mbəɗɗatara, a ləvtar: «Ahaw, fara fara si Eli a sawa nga diyta cek hay cəpa maaya maaya. <sup>12</sup> Ama, yah na, ya fa ləvkwar, Eli ta sawa cay. Ndəhay ta hətmar la, ama ta sərmara daa ba, ta kamar cek maaya ba la anda mevel ata ma wuɗey. Ara kəne may, ndəhay a ma da sərdamaya banay, yah, Böz nga Ndaw.»

<sup>13</sup> Anda keɗe, gula hay nga Yesu ta sərmara sem Yesu aa guzɗtar na, da ray \*Jan-Baptis.

*Yesu a bada cek da ray bəzey  
(Mark 9.14-29; Luk 9.37-43a)*

<sup>14</sup> Masa ata Yesu ta gula anɗa hay maakar heyey ma wusam la a cakay ndəhay makus-takaya na, ta', ndaw daha a ngəchawa a cakay Yesu, a regedey fa mey anɗa, <sup>15</sup> a kar ambahw, a ləvar: «Bay Mahura, bəzey aɗaw anɗa ta cek da ray, fa bərɗlada, fa səɗda banay. Da cek aha ta zlar nga bərɗlada la na, ta pas lanɗar a təɗɗa aa awaw, da daa ba, aa yam. Sərfar dey-ceceh may taw! <sup>16</sup> Ya ta handa la fa gula akah hay, ama ta gwamara nga mbəɗdamara daa ba.»

<sup>17</sup> Yesu ta', aa guzley, a ləvey: «Hey! Akwar ndəhay marəɗɗtakaya masa ma pamaya nga ndaw akwar fara fara ba keɗe. Ya da njeɗ ta

akwar na, haa ta vara? Ya da b̄eskwar na, haa ta vara? Handamiwa b̄zey a fede!» <sup>18</sup> Masa ata ma handam̄rwa b̄zey a la na, Yesu ta', aa b̄car a cek da ray b̄zey a. Ta', cek aha a bey. Wure ṅgene, b̄zey a, a mb̄ley.

<sup>19</sup> Masa ata Yesu ta gula ṅṅa hay ata taava ata na, ta', gula ṅṅa hay a, a ṅṅocham a cakay a, aa c̄fdamara, a l̄vmar: «Ala ta gwamara ṅṅa badamara cek da ray b̄zey a daa ba na, maja me?» <sup>20</sup> Yesu a mb̄d̄datara, a l̄vtar: «Maja akwar fa t̄bmara mey ṅṅa Gazlavay fara fara daa ba. Ya fa l̄vkwara fara fara, da akwar fa t̄bmara mey ṅṅa Gazlavay kwa kuset k̄dey h̄ma bab̄za ṅṅa bazlawar na, ṅgene, ka gwamara ṅṅa l̄vmar a ṅṅwa mahura k̄de, sl̄k̄dey la fede, daw ṅṅada fatad̄ay na, ṅṅwa ha a sl̄k̄dey la. Anda k̄de, cek masa ta ḡara ṅṅa key fa akwar na, daa ba. [ <sup>21</sup> Ama ṅṅa bey cek anda k̄de da ray ndaw na, si ta med̄rey-d̄ṅṅay a Bay Gazlavay len ta mekey \*daliyam. ]»

*Yesu aa guzley saya da ray mem̄cey ṅṅa ta masl̄k̄d̄awa ṅṅa*

*(Mark 9.30-32; Luk 9.43b-45)*

<sup>22</sup> Ta pas langar daha, ata Yesu ta gula ṅṅa hay a v̄hmawa a \*Galile, ata tabiya daa slam a. Yesu ta', aa guzlar, a l̄vtar: «A da k̄rzamaya yah, \*B̄z ṅṅa Ndaw, a da v̄ldamaya a har nd̄hay. <sup>23</sup> Nd̄hay a, a da k̄dm̄aya vagay. ṅṅa d̄ar maakar a na, ya sl̄k̄d̄awa la daa mem̄cey.»

Mey a k̄de a t̄d̄tar mevel a gula ṅṅa hay.

### *Mey da ray budaw*

<sup>24</sup> Ata Yesu ta gula anɗa hay a diyam a Kaper-nayum. Ata ma wusam la na, ndəhay ma cakala budaw ɗga \*Way-mekey-kwakwas ɗga Gazlavay ata fetede. Ta', ndəhay a, a ɗgəcham a cakay \*Piyer aa cəfdamara, a ləvmar: «Bay akwar na, a pəley budaw ɗga Way-mekey-kwakwas ɗga Gazlavay ba daw?» <sup>25</sup> Piyer a mbəɗɗatara, a ləvtar: «'A, 'a, fa pəley.»

Daa masa Piyer fa mbəzey a way masa Yesu aa da hwaɗ a na, Yesu aa guzlar teesedɗ, a ləvar: «Simanɗw Piyer, ya wuɗey ɗgaa cəfdaka, ma pəlam budaw a bay hay da bəla keɗe na, wa hay wa? Ara bəza hay ɗga bay hay a daw? Da daa ba, ara zəgdaw hay daw?»

<sup>26</sup> Piyer a mbəɗɗara, a ləvar: «Ara zəgdaw hay.»

Yesu a ləvey: «Anda keɗe na, bəza hay ɗga bay a pəlam budaw ba. <sup>27</sup> Ama ɗgama ya pəlkwa budaw a, amba mevel a catar ba. Anda keɗe, daw aa dəhwa ɗga \*Galile, kəzla tetəlem † akah a hwaɗ a. Ewet masa kah ma da lawa teesedɗ na, ka wura mey ɗga ewet e, ka hətfey bərey ɗga dala mak ɗga pəɗndakwara budaw a la. Larawa amba ka pəɗndakwara budaw aləkwa cew e.»

## 18

### *Ma da key mahura na, wa?*

*(Mark 9.33-37; Luk 9.46-48)*

<sup>1</sup> Daa ɗgene, \*gula hay ɗga Yesu a ɗgəcham a cakay a, aa cəfdamara, a ləvmar: «Da wuzlah

ndəhay masa Gazlavay fa wey da ray ata na, mahura na, wa?» <sup>2</sup> Yesu ta', a zəlwa bəzey mecəhe, a lacada a wuzlah ata. <sup>3</sup> Ta', aa guzltar, a ləvtar: «Ya fa ləvkwar fara fara, da akwar ta mbədam amba ka təram anda bəza hay mecəhe daa ba na, ŋgene, akwar fa da njam a wuzlah ndəhay masa Gazlavay fa wey da ray ata na, daa ba səlak. <sup>4</sup> Ndaw ma pa ray anġa ŋga mecəhe anda bəzey mecəhe keđe na, ara anġa ma da key mahura da wuzlah ndəhay masa Gazlavay fa wey da ray ata. <sup>5</sup> Kwa waawa ma təbey bəzey anda bəzey mecəhe keđe maja a wudya na, a key ŋgene, a təbey yah, ray adaw.»

*Mewey vaw fa cek ma bata ndaw*

*(Mark 9.42-48; Luk 17.1-2)*

<sup>6</sup> «Asaya, kwa waawa ma betey ndaw pal dasi ndəhay ma təba mey adaw hay keđe ŋga key mebərey na, ŋgada anġa na, ŋgama ata ma jəwmar anġwa mahura a day, ma kəzlamara aa bəlay gway. <sup>7</sup> Kay! Banay daha fa ndəhay da bəla keđe, maja cek hay ga fa təknamata ndəhay ŋga key mebərey. Ahaw fara, cek hay a, a da batamata ŋga key mebərey mandaw mandaw. Ama banay a sawa la a ray ndaw ma həldata ndəhay ŋga key mebərey a. <sup>8</sup> Da har akah, da daa ba, salay akah, fa həldaka ŋga key mebərey na, dəsła har a, da daa ba, salay a, hazakada dərəŋ ta kah. Ŋgama kah ma hətey heter mendəvey ba ta salay pal, da daa ba, ta har pal da ray kah ma da mbəzey aa awaw

mendøvey ba ta har akah hay cewete, da daa ba, ta salay akah hay cewete. <sup>9</sup> Da dey akah fa hældaka nga key mebörey na, wuzlka dey a, hazakada dören ta kah. Ngama kah ma høtey heter mendøvey ba ta dey pal, da ray kah ma da mbøzey aa vøged nga awaw magaza ta dey akah hay cewete.

*(Luk 15.3-7)*

<sup>10</sup> «Pam lenjesl, kwa ka da røsam ndaw pal letek da wuzlah ndøhay ma pamata ray ata nga mecøhe anda bøza hay ba. Fara fara, ya fa løvkwar maslan ata hay da vad fa lacafamatar a ray da cakay Papay da vad mandaw mandaw.

[<sup>11</sup> Maja yah \*Bøz nga Ndaw, ya sawa na, nga løhdata ndøhay masa maazøftakaya.]»

*Mey-menjey ta tøban meezøfey*

<sup>12</sup> «Da ndaw aa ta tøban hay temere, da pal da wuzlah ata taa zøfey sem na, ndaw aha a da key na, kwara? A mbøkdata tøban hay kwakwar zlam-letek a ray a zlam-letek da angwa, a daw a søpørwa pal masa meezøfey a ngene daa ba daw?

<sup>13</sup> Ya fa løvkwar fara fara, da masa ta høtørwa la na, aa sømey la ga da ray tøban a pal ngene, ma føna da ray kwakwar zlam-letek a ray a zlam-letek masa taa zødam daa ba heyey.

<sup>14</sup> Ara køne, Papakw akwar masa da vad may, a wufey kwa ndaw pal letek da wuzlah ndøhay ma tøba mey anga hay aa zøfey ba.»

*Da mølmakw ta kaka cek maaya ba la na, ka da kada na, kwara?*

15 Yesu aa guzltar a gula aŋga hay, a ləvtar: «Da məlmakw \* ta kaka cek maaya ba la na, daw fa vəda, kadara mebərey aŋga ha, akwar taa cew e. Da ta cəndakawa mey akah la na, ŋgene ara cek maaya, kah ma dīya məlmakw a sem.

16 Ama da a cəndakawa mey akah ba na, ŋgəley ndaw pal, da daa ba, ndəhay cew asi akah. Ka ka anda keđe na, anda dərəwel ŋga Gazlavay ma ləvey: “Kwa cek wura wura maaya ba masa ndaw ma ka, ŋga sərey mey da ray a fara fara na, maaya na, ndəhay cew, da daa ba, maakar a nəkmara mey a, a kam sede da ray mey a.”

17 Da a cəndakwara ba cəŋga na, kada mey a, a ndəhay daa \*mecəmey-ray ŋga ndəhay adaw hay. Da a cəntar mey a ndəhay daa mecəmey-ray a ba cəŋga na, pa məlmakw a ŋga ndaw ma səra Gazlavay ba, da daa ba, pa ŋga \*ndaw ma cakala budaw.»

### *Mey da ray medərey-danɣay*

18 «Ya fa ləvkwar fara fara, kwa mey wura wura masa akwar ma da jəwmara da bəla na, aŋga majəwkaya da gazlavay da vad may. Asaya, kwa mey wura wura masa akwar ma da pəskamara da bəla na, aŋga mapəskakaya da gazlavay da vad may.

19 «Ya fa ləvkwar saya: da ndəhay cew da bəla keđe, a cəmam dɣay ŋgaa cəfdəy kwa meeme daa

---

\* **18:15** 18.15 məlmakw: A wufey ŋga ləvey ara məlman ŋga səkway ba, ama ara məlman daa mey ŋga Gazlavay. **18:15** 18.15 Lev 19.17; Gal 6.1 **18:16** 18.16 Mew 19.15; Jan 8.17; 2Kwr 13.1; 1Tm 5.19 **18:17** 18.17 Tit 3.10 **18:18** 18.18 16.19; Jan 20.23

medərey-dangay na, Papay da vad a vøltar la.  
<sup>20</sup> Maja da ndəhay cew, da daa ba, maakar ta cəmam la ta mezəley adaw na, yah da wuzlah ata.»

*Mey-menğey ta ndaw ma ka sləra ma sərey dey-ceceh ba*

<sup>21</sup> Fa dəba ha, \*Piyer ta', a ngəchey fa Yesu, a ləvar: «Bay Mahura, da məlma adaw fa kaya cek maaya ba mandaw mandaw na, ya da mbəkbara mebərey anğa na, dey we? Haa dey maasala daw?» <sup>22</sup> Yesu a mbəddara, a ləvar: «Kay! dey maasala daada ba, ama dey kwakwar maasala haa dey maasala ha.

<sup>23</sup> «Maja nğene, ya wudəy nğa nğakwar mey amba ka səmbara Gazlavay a wey da ray ndəhay na, kwara. Bay daha a wudəy nğaa cəfdə dəvaz anğa fa ndəhay ma ka sləra anğa hay. <sup>24</sup> Masa anğa fa zlar nğaa cəfdə dəvaz a na, a handamar ndaw pal masa ta dala anğa da ray a ga a sləfey ba. <sup>25</sup> Cek anğa nğa pəla daa ba. Anda keđe, bay a, a pəskatar mey a gula anğa hay nğa hədkadamara ndaw aha, ta nğwas anğa, ta bəz anğa hay leŋ cek anğa hay cəpa nğa pəley dəvaz a. <sup>26</sup> Ta', ndaw a heyey, a pətkeley fa mey nğa bay anğa ha, a ləvar: "Ambahw, bay adaw, vəlya đar nekədey, cay na, ya pəlkawa cəpa." <sup>27</sup> Bay heyey dey-ceceh a kar fa ndaw aha. Anda keđe, a mbəkda dəvaz anğa da ray ndaw aha heyey cəpa, ta', a mbəkda nğa daw.

<sup>28</sup> «Masa ndaw aha fa bawa na, a cam ray ta ndaw mekele masa ata ma kam slëra bama. Dëvaz anğa fa ndaw aha daha may, dëvaz a, kuset këdëy gway. Kaw! a kërza ndaw aha kasl! asi d'ay. Ta', a lëvar: "Pëlyawa dala adaw." <sup>29</sup> Ndaw masa ata ma kam slëra bama heyey, ta', a pëtkweley fa mey anğa, a dërar dangay, a lëvar: "Ambahw, vëlya d'ar nekëdëy, cay na, ya pëlkawa." <sup>30</sup> Ama ndaw kaa heyey a tëba ba. Ta', a handa, a këzla aa fërsëne, haa anğa ma pëlra dëvaz anğa ha. <sup>31</sup> Mandala anğa hay siya ma hëtmara na, a rëzlam, mevel a catar ga. Ta', a diyam a wuzdamara mey a cëpa a bay ata heyey. <sup>32</sup> Da ray ngene, bay a heyey a zëlrawa ndaw aha, a lëvar: "Kah na, ndaw malamba. Ya ta mbëkdakawa dëvaz masa da ray kah sem cëpa maja kah ma dërya dangay. <sup>33</sup> Kaa kah na, ka sërfa dey-ceceh fa mandala akah anda yah ma sërfa dey-ceceh ba na, kwara?" <sup>34</sup> Mevel a car a bay heyey, ta', a vëlda a har ndëhay nga sërdamara banay, haa aa ma pëlra dëvaz anğa ha cëpa.»

<sup>35</sup> Cay, Yesu ta', a patar lengesl, a lëvtar: «Yaw, ara anda ngene, da ndaw da wuzlah akwar a mbëkdara meberëy nga mëlmaaha ta mevel pal ba na, Papay da vad, fa da mbëkdara meberëy anğa daa ba këne may.»

## 19



*Mey da ray mebøley ηgwas*  
(*Mark 10.1-12; Luk 16.18*)

<sup>1</sup> Masa Yesu ma ndøvda mey anga cay na, ta', a bey daa hwayak ηga \*Galile, a daw aa hwayak ηga \*Jude da dey langar ηga wayam ηga Jurden.

<sup>2</sup> Ndøhay ga, a səpmar wurzay. Fetede, ta', a mbøldata masa-macay hay da wuzlah ata.

<sup>3</sup> \*Fariza hay a diyam a cakay a, amba a jadamara. Aa cəfdamara, a ləvmar: «Kwakwas aləkwa a vøley cəved a ndaw ηga bəla ηgwas anga, kwa fa mey wura wura daw?» <sup>4</sup> Yesu a mbøddatara, a ləvtar: «Mawuzlalakaya daa dferewel ηga Gazlavay a ləvey: “Daa mezley ηga bəla, Gazlavay a ləmwana, zel ta ηgwas.” Ka ta janɗamara mey a daa ba daw? <sup>5</sup> Gazlavay a ləvey saya: “Maja ηgene, ndaw-mezøle a mbəkda papaha ta mamaha, amba a cəmam ta ηgwas anga. Ata cewete, a tərām anda ndaw pal.” <sup>6</sup> Anda keɗe, ata ndøhay cew saba, ama ata anda ndaw pal. Yaw, cek masa Gazlavay ma cəma sem anda keɗe na, ndaw a da wunka ba.»

<sup>7</sup> Fariza hay a, aa cəfdamara Yesu a saya, a ləvmar: «\*Mawiz ta wuzleley mewey la ma ləvey, da ndaw a wudɗey ηga bəla ηgwas anga na, si a wuzlalar dferewel ηga wuzda anga ma bəla sem. Kaa a wuzlala mey a anda keɗe na, maja me?» <sup>8</sup> Yesu a mbøddatara, a ləvtar: «Mawiz a vəlkwār cəved ηga bøley ηgwas akwar hay na, maja mevel akwar maaya ba. Ama daa mezley ηga bəla na, cek aha ta key kəne na, daa ba. <sup>9</sup> Ya fa ləkwār fara fara, kwa

waawa ma bɛla ngwas anɔa, ngwas aha ta ley vaw saw da palah daa ba, a ley ngwas mekele, a key nɔene na, a ley vaw saw da palah.»

<sup>10</sup> Gula anɔa hay, a lɔvmar: «Da nɔa bɛley ngwas si anda keɔe na, nɔama, ndaw a nɔey manɔar ngwas.» <sup>11</sup> Yesu a mbɛɔɔɔatara, a lɔvtar: «Ndɛhay cɛpa a tɛbmara mey a nɔa key kɛne ba. Ma gwa nɔa tɛbmara na, si ndɛhay masa Gazlavay ma vɛltar gɛɔaɔ nɔa tɛbmara mey a. <sup>12</sup> Sɛrmara, cek hay mekele mekele daha ma tɛkta ndɛhay nɔa ley ngwas. Ndɛhay siya maja vaw a latar ba dɛga nɔa mayawa ata, siya maja ata maanɔgwadatakaya, siya hay may a nɔam manɔar ngwas, maja a wudam nɔa key slɛra nɔgaa Bay Gazlavay gway. Da ndaw ma gwa nɔa tɛba mey masa yah ma kada da ray meley ngwas keɔe daha na, nɔa tɛba.»

*Yesu a pɛstar mey a bɛza hay  
(Mark 10.13-16; Luk 18.15-17)*

<sup>13</sup> Fa dɛba ha, ndɛhay a handamata bɛza hay fa Yesu, amba a patar har a ray, a pɛstar mey, a dɛrey danɔgay maja ata. Ama gula anɔa hay, a kamatar mey a ndɛhay a. <sup>14</sup> Da ray nɔene, Yesu aa guzltar a gula anɔa hay a, a lɔvtar: «Mbɛkdamatɛrwa bɛza hay nɔa samawa fa yah! Ka da tɛkmata ba, maja Gazlavay fa wey da ray ndɛhay masa anda bɛza hay a.» <sup>15</sup> Ta', a patar har a ray, a pɛstar mey. Fa dɛba ha, ndal! madaw anɔa.

*Bəz-gula masa-zleley aa cəfda Yesu da ray  
mehətey heter mendəvey ba  
(Mark 10.17-31; Luk 18.18-30)*

<sup>16</sup> Ta pas langar daha, bəz-gula daha a ngəchey a cakay Yesu, aa cəfda, a ləvar: «Bay adaw, ya da key maaya amba ya hətey heter mendəvey ba na, me?» <sup>17</sup> Yesu a mbəddara, a ləvar: «Kaa cəfdaya da ray mekey cek maaya na, maja me? Ara Gazlavay pal taava anğa, ndaw maaya. Da ka wudəy nğa hətey heter mendəvey ba na, si ka nar ray a \*mewey hay nğa Gazlavay.» <sup>18</sup> Gula ha aa cəfda Yesu, a ləvar: «Ya ney ray na, a mewey hay wura?» Yesu a mbəddara, a ləvar: «Ka da kədəy ndaw vagay ba, ka da ley vaw saw da palah ba, ka da leley ba, ka da mbərzley a ray ndaw ba. <sup>19</sup> Natar ray nğada ata papakw ta mamakw, asaya, wudə meseembew akah anda kah ma wudə ray akah.» <sup>20</sup> Bəz-gula ha, a ləvar: «Mewey hay a cəpa kədə, ya ta zləbta daa ba səlak, ma mbəkya nğa key na, wura dəba wura?» <sup>21</sup> Yesu a ləvar a bəz-gula ha: «Da ka wudəy nğa tərey ndaw maaya kalah na, daw, hədkadata cek akah hay tabiya, wunkatara dala ha a masa-viya hay. Da ka ta ka la anda kədə na, ka da hətey zleley fa Gazlavay da vad. Masa kah ma vəldatara dala ha cay a masa-viya hay na, sawa, səpya.» <sup>22</sup> Masa bəz-gula ha ma cənda mey a anda kədə na, ta', a daw, anğa ta meesəmey daa ba, maja aa ta zleley ga, a wudəy nğa vəldatara a ndəhay ba.

**19:18** 19.18-19 Mab 20.12-16; Lev 19.18      **19:19** 19.19 22.39

**19:21** 19.21 6.20; 8.21-22; Lk 12.33      **19:22** 19.22 Ps 62.11

<sup>23</sup> Da ray ɲgene, Yesu aa guzltar a gula aɲga hay, a lɔvtar: «Ya fa lɔvkwar fara fara, aɲga ta banay ga ɲgada ndaw masa-zleley amba a tɔba Gazlavay ɲga wey da ray a. <sup>24</sup> Asaya, ya fa lɔvkwar, aɲga ta banay ɲgada slagwama ɲga mbɔzey taa vɛged ɲga baatal. Ama, aɲga ta banay ga ma fɔna saya ɲgada ndaw masa-zleley ɲga tɔba Gazlavay ɲga wey da ray a.» <sup>25</sup> Masa gula aɲga hay ma cɔndamara mey a kedɛ na, a rɔzlam ga, a lɔvam: «Kay! Da anda kedɛ na, ma da lɔhey daa mebɔrey na, wa?» <sup>26</sup> Da ray ɲgene, Yesu a nɛkta, a lɔvtar: «Melɔhey daa mebɔrey na, ara cek masa ndaw-magɔdan ma gwa ɲga ka ba, ama Gazlavay na, a gwa ɲga kata cek hay tabiya.»

<sup>27</sup> Ta', \*Piyer aa guzlar a Yesu a, a lɔvar: «Yaw, ala na, ya ta mbɛkdamatɔrwa cek ala hay sem cɔpa, amba ya sɔpmaka. Kaa ya da hɔtam fa salay ala na, me?» <sup>28</sup> Yesu a mbɛdɔdara, a lɔvtar: «Ya fa lɔvkwar fara fara, ta pas masa cek hay cɔpa ma da tɔram mawiya na, yah, \*Bɔz ɲga Ndaw, ya da njeɲ aa slam-menjeɲ adaw mawadakaya ɲga wey da ray ndɔhay. Akwar, kuraw a ray a cew masa ma sɔpmaya kedɛ na, ka da njam aa slam-menjeɲ ɲga bay hay amba ka kamatar sariya ɲgada sɛkway hay kuraw a ray a cew ɲga \*Israyel. <sup>29</sup> Da ndaw a mbɛkdɔrwa way aɲga, da daa ba, a mbɛkdatɔrwa mɔlmaha hay, dam-mamaha hay, mamaha, papaha, bɔz aɲga hay, da daa ba, a mbɛkdatɔrwa ley aɲga hay, amba a sɔpya na, ndaw aha a hɔteɲ cek hay a la

---

**19:26** 19.26 Zak 8.6; Lk 1.37      **19:28** 19.28 25.31; Lk 22.30;  
1Kwr 6.2; CWJ 3.21

ma fəna masa anɔa ma mbəkdatərwa nɔene a key dey temere. Asaya, a hətəy heter mendəvey ba la may. <sup>30</sup> Yaw, ndəhay ga ma təbmara mey aɗaw nɔeeme, a da vəham fa dəba. Asaya, ndəhay ga masa fa dəba, a da diyam fa mey.»

## 20

### *Mey-menɔey ta ndəhay ma ka sləra da ley*

<sup>1</sup> Ta', Yesu aa guzltar a gula anɔa hay, a ləvtar: «Ya gwa nɔa wa cek masa ndəhay ma da hətam ta pas masa Gazlavay ma da wuzdərwa mewey anɔa da ray ndəhay na, ta me? Ehe, ya nɔgakwar mey da ray a. Bay nɔa ley daha, a bawa taa pərek e nɔa səpey ndəhay nɔa key sləra da ley anɔa. <sup>2</sup> A kam maɗay ta ndəhay ma ka sləra. Fa mevərndey na, a da vəltar dala təde nɔa sləra nɔa ndaw mevərndey da ley. Ta', a ləvtar nɔa diyam a ley anɔa ha dəba. <sup>3</sup> Pas təde mehəley maaca na, a bawa da way saya, a da nəkey dey na, a ray ndəhay mekele hay manjatakaya nɔa maaya daa slam aha. <sup>4</sup> Ta', a ləvtar: "Diyam ta kam sləra da ley aɗaw katay may, amba ya pəlkwat dala təde fa sləra akwar a." <sup>5</sup> Ta', ndəhay a, a diyam aa sləra ha. Bay nɔa ley kaa heyey a bawa ta wuzlah-pas, a həley ndəhay mekele. Asaya, a bawa ta pas nɔaa kwad, a həley ndəhay mekele saya. <sup>6</sup> Pas gweegwe a kəzley na, a bawa, a hətəy ndəhay manjatakaya daa slam aha saya, a ləvtar: "Ka vərndam nɔa maaya anda keɗe na, maja me?" <sup>7</sup> A mbəɗdamara, a

lövmar: “Ya vərndam nga maaya na, maja ndaw ma hēlndar aa slēra daa ba.” Anda kedē, a lōvtar: “Yaw, diyam a ley adaw, ta kam slēra may.”

<sup>8</sup> «Masa pas ta kēzley cay na, ta’, a zəlrawa \*bay-ray nga slēra aŋga, a lōvar: “Zēltərwa ndōhay ma ka slēra, pēltara dala ata. Ka zlar ta fa ndōhay ma samawa madagway-dakw haa kasl fa ndōhay ma samawa ngeeme.” <sup>9</sup> Ndōhay madagway-dakw heyey a diyam fa bay-ray nga slēra heyey dēba, a tēbmara dala ata, kwa waawa a hōtey dala tēde nga slēra nga ndaw mevərndey da ley. <sup>10</sup> Ndōhay ngeeme heyey a diyam may, a wulkam na, a da hōtam ma fēna nga ndōhay madagway-dakw hay heyey. Ama, a hōtam na, dala tēde nga slēra nga ndaw mevərndey da ley cēnga gway. <sup>11</sup> Masa fa tēbmara dala ha na, faa ŋguram mey da ray bay nga ley a, <sup>12</sup> a lōvam: “Ndōhay ma samawa madagway-dakw kedē, a kam slēra bōrey pal gway, ama ka vōltar dala letek ta ala ma kam slēra hipas daa pas mecey na, kwara?” <sup>13</sup> Ta’, bay nga ley a, aa guzley ŋgada ndaw pal da wuzlah ata, a lōvar: “Jam adaw, ya ta bataka daa ba sēlak, maja ya kakwa maday na, da ray dala tēde nga mevərndey nga slēra nga ndaw pal da ley, ba diya? <sup>14</sup> Tēba dala akah masa anda alēkwa ma kakwa maday, daw. Ya wudēy nga vōlar dala hōma nga akah a ndaw ma sawa aa slēra fa dēba kedē. <sup>15</sup> Fa kah na, ya gwa nga key cek ta zleley adaw anda yah ma wudēy ba daw?”

Sølen fa kaka maja yah ndaw maaya daw?"»

<sup>16</sup> Ta', Yesu aa guzltar saya, a løvtar: «Ara anda keɗe, ndəhay madagway-dakw, a da təram ndəhay ngeeme, asaya, ndəhay ngeeme a da təram ndəhay madagway-dakw.»

*Yesu aa guzley nga dey maakar da ray meməcey anga ta masləkdawa anga*

*(Mark 10.32-34; Luk 18.31-34)*

<sup>17</sup> Ata Yesu fa diyam a \*Jeruzelem. Daa masa ata daa cəved na, ta', Yesu a ngelta gula anga hay kuraw a ray a cew ta cakay, a løvtar: <sup>18</sup> «Ehe, wure keɗe aləkwa fa nakwa a Jeruzelem. Fetede na, a da vøldamaya, yah \*Bəz nga Ndaw, a har \*bay-ray hay nga ndəhay ma ka kwakwas ta \*ndəhay maa sərkada kwakwas nga Mawiz. A da kamaya sariya nga kəɗey vagay. <sup>19</sup> Asaya, a da vøldamaya a har ndəhay masa \*Jəwif hay ba, amba aa sanğəram a ray aɗaw, a sləɗmaya ta laway, a dərmaya fa hwadam mazlanğalakaya, ya məcey la. Nga ɗar maakar a na, ya sləkɗawa la daa meməcey a.»

*Mamanj nga ata Jak ta Jan aa cəɗɗa Yesu*

*(Mark 10.35-45)*

<sup>20</sup> Fa dəba ha, ngwas nga Zebede ta bəz anga hay a ngəcham fa Yesu. Ngwas aha a regedey fa mey anga, aa cəɗɗa nga jəna. <sup>21</sup> Yesu ta', aa cəɗɗa, a ləvar: «Ka wuɗey na, me?» Ngwas aha, aa mbəɗɗara, a ləvar: «Ya wuɗey na, ka ləvya dəga wure keɗe, daa masa ka fa zəma bay akah na, ka da njadata bəz aɗaw hay cew

keɗe, pal ta har-zəmay akah, lanɗar ta har-gula akah.» <sup>22</sup> Yesu aa guzltar a bəza hay ɗga ɗɗwas a heyey, a ləvtar: «Ka sərmara cek masa akwar maa cəɗfam ba. Ka gwamara ɗga səram banay la anda yah ma da səra daw \*?» Ta', a mbəɗdamara, a ləvmar: «Ahaw, ya gwamara.» <sup>23</sup> Yesu a ləvtar: «Ahaw, ka səram banay la anda yah ma da səra. Ama ɗga njeɗ ta har-zəmay aɗaw, da daa ba, ta har-gula aɗaw na, ara yah ma da ɗəsla mey a ɗgene ba. Ara Papay ma ɗiyta slam hay a ɗgene ɗgada ndəhay masa aa ma walata.»

<sup>24</sup> Fa ɗəba ha, masa gula aɗga hay siya kuraw ma cəndamara mey a na, a cam mevel a ray mələman hay cew heyey. <sup>25</sup> Da ray ɗgene, Yesu a zəлта tabiya, a ləvtar: «Ka sərmara da wuzlah ndəhay da bəla keɗe na, bay hay daha. Bay hay a na, fa wam da ray ndəhay ta gəɗan, asaya, mahura hay mekele fa wam da ray ndəhay ta cəveɗ e ba. <sup>26</sup> Ama da wuzlah akwar na, a da key kəne ba. Yaw, da ndaw da wuzlah akwar a wuɗey ɗga key mahura na, si a tərey ndaw ma ka sləra akwar. <sup>27</sup> Asaya, da ndaw da wuzlah akwar a wuɗey ɗga key \*bay-ray na, si a tərey anda beke akwar. <sup>28</sup> Anda keɗe, kwa yah, \*Bəz ɗga Ndaw, ya sawa a bəla na, amba ndəhay a kamaya sləra ba. Ama ya sawa a bəla na, amba ya katar sləra a ndəhay, ya vəlda heter aɗaw ɗga

---

\* **20:22** 20.22 Ka gwamara ɗga səram banay la anda yah ma da səra daw?: Ta mey Gerek a ləvey «Ka gwamara ɗga sam cek la daa vəley anda yah ma da sa daw?» **20:22** 20.22 26.39; Mk 14.36; Lk 22.42; Jan 18.11 **20:23** 20.23 SNM 12.2 **20:26** 20.26-27 23.11; Mk 9.35; Lk 9.48



löhëy ndöhay ga daa mebörey.»

*Yesu a wurey dey nga ndöhay wulaf hay cew  
(Mark 10.46-52; Luk 18.35-43)*

<sup>29</sup> Masa ata Yesu ta gula anga hay fa bam da Jerikwaw na, ndöhay ga fa sɔpmatar wurzay.

<sup>30</sup> Ndöhay wulaf hay cew daha manjatakaya da mey-cöved. A cøndamara na, Yesu fa daw ta ngene. Ta', a wudam, a lövam: «Bay Mahura, Bözey nga \*Davít, ambahw sɔrfandar dey-ceceh may taw!»

<sup>31</sup> Ndöhay ga heyey a kamatar mey, a lövmatar nga njam teete. Ama wulaf hay a, a wudam ta gɔdan ta gɔdan cɔnga, a lövam: «Bay Mahura, Bözey nga Davít, ambahw sɔrfandar dey-ceceh may taw!»

<sup>32</sup> Yesu ta', a lecey, a zɔltɔrwa, aa cɔfdata, a lövtar: «Ka wudam ya kakwar na, me?»

<sup>33</sup> Ta', wulaf hay a, a mbɔfdamara, a lövmar: «Bay Mahura, ya wudam ka wurndara dey ala.»

<sup>34</sup> Wulaf hay a, a kamar dey-ceceh a Yesu. Anga gas! gas! a gɔsfatar har fa dey ata. Wure wure ngene, dey ata ha, wur! wur! a wuram, a hɔtmar dey maaya maaya dɔba. Fa dɔba ha, ta', a diyam asiya.

## 21

*Yesu a daw a Jeruzelem anda bay  
(Mark 11.1-11; Luk 19.28-40; Jan 12.12-19)*

<sup>1</sup> Ata Yesu ta gula anga hay fa diyam aa berney nga \*Jeruzelem. Masa ata gweegwe ta berney

---

**20:28** 20.28 Iz 53.12; 1Kwr 6.20; 7.23; Gal 1.4; 1Tm 2.5-6; 1Pi 1.18-19    **20:29** 20.29-34 9.27-30    **20:30** 20.30-31 1.1; 9.27; 12.23; 15.22; 21.9, 15; 22.41-46; Mk 10.47-48; 11.10; Lk 1.32, 69; 2.11; 18.38-39; Jan 7.42

a na, a wusam gweegwe ta slala daha mezøley Betfaje da rav Anɗwa nga \*Awliviye. Yesu ta', a slørey gula anɗa hay cew teesef ngada slala ha, <sup>2</sup> a løvtar: «Diyam a slala fa mey akwar katay, ka da høtfam madi-zøngwaw majøwkaya ta babøza da cakay a. Pøskamørwa, handamatiwa cewete. <sup>3</sup> Da ndaw a tøkakwar nga pøska na, løvmar: "Bay Mahura a wufey." Ngene na, ndaw aha, a mbøkdakwar la nga pøska wure ngene.» <sup>4</sup> Yaw, cek aha ta key la amba a key anda Gazlavay maa guzlwa zleezle ta mey \*ndaw ma tøla mey anɗa ma løvey:

<sup>5</sup> «Løvmatar a ndøhay daa berney nga \*Siyanɗw: nøkam dey, bay akwar fa sawa fa akwar. Ara ndaw meekwed-mey, aa da ray madi-zøngwaw, aa da ray babøza nga madi-zøngwaw aha.»

<sup>6</sup> Da ray ngene, gula anɗa hay cew heyey a diyam, a kamara anda Yesu ma løvtar ha. <sup>7</sup> A handamar madi-zøngwaw ta babøza ha døba. Gula anɗa hay a, a ciymata zana ata hay a ray zøngwaw hay a. Yesu ta', a njeɗ a ray a. <sup>8</sup> Ndøhay ga malacatakaya daa cøved nga cey ray ta Yesu, a ciyam zana ata hay aa cøved nga høslmar ray. Siya hay da wuzlah ata, a bøzlham mey-har nga wudez hay, a pamata aa cøved e may. <sup>9</sup> Ndøhay fa diyam fa mey anɗa, leɗ fa døba anɗa, ata tabiya fa wudam, a løvam: «\*Hawzana! Hølmakwa Bøzey nga \*Davit! Anja Bay Gazlavay nga pøsar mey a ndaw masa aa

ma slərdərwa ta mezəley aŋga. Həlmakwa Bay Gazlavay da vad!»

<sup>10</sup> Masa Yesu a fa mbəzey aa berney ŋga Jeruzelem na, ndəhay daa berney a, a mbədam haya! haya! aa cəfdam vaw da wuzlah ata, a ləvam: «Kede he na, ara wa?» <sup>11</sup> Ndəhay ga ma diyam ta Yesu heyey, a mbəddamatara, a ləvmatar: «Ara ndaw ma təla mey ŋga Gazlavay, mezəley Yesu, ndaw \*Nezeret daa hwayak ŋga \*Galile.»

*Yesu a bəltə ndəhay daa Way-mekey-kwakwas ŋga Gazlavay*

*(Mark 11.15-19; Luk 19.45-48; Jan 2.13-22)*

<sup>12</sup> Fa dəba ha, Yesu a mbəzey aa papalah ŋga \*Way-mekey-kwakwas ŋga Gazlavay. Fetede na, ndəhay fa kam luma. Maja ŋgene, ta', a bəltə ndəhay tabiya ma hədkadam cek hay leŋ ndəhay ma hədkam cek hay. A bəzltə slam hay ŋga ndəhay ma mbəda dala ta jaŋga hay ŋga ndəhay ma hədkadam makurgwadakw hay.

<sup>13</sup> Ta', a ləvtar: «Mawuzlalakaya daa cərewel ŋga Gazlavay, Gazlavay a ləvey: “Way adaw na, ara way amba ndəhay a dərmaya danɣay da hwad a.” Ama akwar na, ka tərɗamara way a kede ŋga slam ŋga mayal hay!»

<sup>14</sup> Ndəhay wulaf hay ta ndəhay jegwer hay a ŋgəcham fa Yesu daa Way-mekey-kwakwas a. Ta', a mbəldata. <sup>15</sup> Ndəhay mahura hay da ray ndəhay ma ka kwakwas ŋga Gazlavay leŋ \*ndəhay maa sərkada kwakwas ŋga Mawiz,

a hətmatar maazla hay masa Yesu ma ka. Asaya, a hətmatar bəza hay daa Way-mekey-kwakwas nga Gazlavay a, fa wudam, a ləvam: «\*Hawzana! Həlmakwa Bəzey nga \*Davit!» Da ray ngene, mevel a catar. <sup>16</sup> Ta', a ləvmar a Yesu: «Ka fa cənda mey masa ata maa guzlam kefe daw?» Yesu a mbədfatara, a ləvtar: «Ahaw, ya fa cənda. Mawuzlalakaya daa dərewel nga Gazlavay, a ləvey: “Bay Gazlavay, ka taa sərkadata bəza hay mecəhe hay ta bəza hay da mey dəwa la nga həlmamaka.” Ka ta janğamara mey a daa ba daw?» <sup>17</sup> Fa dəba ha, Yesu a mbəkdata, a bawa daa berney nga \*Jeruzelem e, a daw a slala Betani. A ney fetede dasi tavad a ngene.

*Mey da ray wudez manjar babəza  
(Mark 11.12-14, 20-24)*

<sup>18</sup> Pəpərek e, ta slam ngaa pərek na, Yesu a vəhwa aa berney nga \*Jeruzelem, may fa car. <sup>19</sup> Daa masa anğa fa daw na, a hətəy wudez daha da mey-cəved, a yey babəza anda gudav. Ta', a daw a cakay wudez e, ama a hətəfey fa wudez e na, si gwaslaf a gway, babəza fa vəfa daa ba. Da ray ngene, Yesu a nəsa wudez e, a ləvey: «Kuse! Ka yey babəza saba nga sərmataw.» Wure wure ngene, wudez e, a kweley. <sup>20</sup> Daa ngene, gula anğa hay, ata da siya. Masa ata ma hətmar wudez e ma kweley anda ngene na, a rəzlam, a ləvmar a Yesu: «Wudez e, a kweley fiyaw fiyaw na, kwara?» <sup>21</sup> Yesu a mbədfatara,

a ləvtar: «Ya fa ləvkwar fara fara, da akwar fa pamara Gazlavay nga ndaw akwar fara fara, asaya, da akwar fa wulkam cew cew daa ba na, ka gwamara nga key cek anda yah ma ka ngada wudez keɗe daada ba, ama ka gwamara kwa nga ləvar ngada anɗwa mahura keɗe: “Sləkɗey la feɗe, kəzley aa bəlay” na, a key la kəne. <sup>22</sup> Da akwar fa pamara Gazlavay nga ndaw akwar fara fara na, cek masa akwar maa cəɗɗamara daa medərey-danɗay na, a vəldakwara la cəpa.»

*Ma vəldara gədan a Yesu na, wa?*

*(Mark 11.27-33; Luk 20.1-8)*

<sup>23</sup> Fa dəba ha, Yesu a mbəzey aa papalah nga \*Way-mekey-kwakwas nga Gazlavay. Aa sərkaɗata ndəhay fetede. Masa anɗa faa sərkaɗata ndəhay a na, ta', \*bay-ray hay da ray ndəhay ma ka kwakwas nga Gazlavay leɗ mahura hay nga \*Jəwif hay a nɗəcham a cakay a, aa cəɗɗamara, a ləvmar: «Ma ləvka nga kata cek hay a keɗe na, wa? Asaya, ma vəlka cəved nga kata na, wa?» <sup>24</sup> Yesu, ta', a mbəɗɗatara, a ləvtar: «Yaw, yah may, amba yaa cəɗɗakwar mey pal. Da akwar ta mbəɗɗamiwa mey a la na, yah may, ya kadakwara ndaw ma vəlɗiwa cəved nga kata cek hay a keɗe la. <sup>25</sup> Kaa ma slərdərwa \*Jan-Baptis nga katar \*baptem a ndəhay na, wa? Gazlavay daw, ndəhay daw?»

Da ray nɗene, ndəhay mahura hay a ta bay-ray hay a, a slam yawa da wuzlah ata, a ləvam: «Ya da mbəɗɗakwa aa mey anɗa ha na, kwara? Da ya ləvkwa: “Ara Gazlavay ma slərdərwa” na, a

da mbøfdandakwara, a lövey: “Kaa ka tømbara mey nga Jan-Baptis a ba na, maja me?” <sup>26</sup> Ama da ya lövkwa: “Ara ndøhay ma slørdamørwana, ya zlurakwa ta ndøhay maja ndøhay tabiya fa wulkam Jan-Baptis na, ara \*ndaw ma tøla mey nga Gazlavay.» <sup>27</sup> Da ray ñgene, ta’, a mbøfdamara a Yesu, a lövmar: «Ya sømbara ba.»

Yesu, ta’, a mbøfdatara, a lövtar: «Yaw, da anda kedø na, ya fa da kadakwara ndaw ma vølya cøvedø nga kata cek hay a kedø, daa ba may.»

### *Mey-menjey ta bøza hay cew*

<sup>28</sup> Yesu aa guzltar a ndøhay daa \*Way-mekeykwakwas nga Gazlavay heyey saya, a lövtar: «Ya wudøy ya ñgakwar mey amba ka wulkam da ray a.

«Ndaw daha, aña ta bøza hay cew. A lövar ñgada bøzey mahura: “Bøz adaw, tasana daw ta kawa sløra da ley.” <sup>29</sup> Bøzey a, a mbøfdara, a lövar: “Ya fa da daw daa ba.” Ama menjey nekødøy na, a mbøfda løjgesl aña, ta’, a daw nga kawa sløra ha. <sup>30</sup> Papaha, ta’, a lövar ñgada bøzey mecøhe saya, køne may. Bøzey a, a mbøfdara, a lövar: “Aya, papay.” Ama fa døba ha, bøzey a, ta daw nga kawa sløra heyey daa saba. <sup>31</sup> Kaa dasi bøza hay cew kedø, ma ka cek masa papa ata ma wudøy la na, wura?» Ndøhay a, a mbøfdamara, a lövmar: «Ara bøzey mahura.»

Yesu a mbøfdatara ñgada ndøhay a døba, a lövtar: «Ahaw, køne, ama ya fa lövkwar fara

fara, ndøhay maaya ba hay anda ndøhay ma cakala budaw ta ηgwas-barlaw hay, a mbøzam la teesed da ray akwar a wuzlah ndøhay masa Gazlavay ma wey da ray ata. <sup>32</sup> \*Jan-Baptis ta sawa la ηga wuzkwar cøved masa dør e, ama akwar ta tømara mey ηnga daa ba. Ndøhay ma cakala budaw ta ηgwas-barlaw hay, ata na, ta tømara mey ηnga la. Kwa masa akwar ma hætmar ata ma mbøkdamara mekey mebørey na, akwar ta mbødamara menjey akwar ηga tøbey mey ηga Jan-Baptis a daa ba cønga.»

*Mey-menjey da ray ndøhay ma tømara Bøzey ηga Gazlavay ba*

*(Mark 12.1-12; Luk 20.9-19)*

<sup>33</sup> Yesu aa guzltar a ndøhay saya, a løvtar: «Jøkam slømay fa mey-menjey mekele. Ndaw daha, a key jerne ηga wudez ma yey babøza mezømey. Ta', a zløba jerne he ray a zlar. Daa jerne he na, a døyey slam ηga døcey babøza ηga wudez e, a lømey way magølkaya maazøma ηgada ndaw ma jøda jerne he. A vølda jerne he a har ndøhay ηga kam sløra da hwad a. Fa døba ha, ta', a daw aa slam dørej. <sup>34</sup> Masa kiya menjøley babøza ηga wudez daa jerne he ta wuswa cay na, bay ηga ley a, a slørey gula ηnga hay ηga tøbwa babøza ηga wudez e maala ηga ηnga. <sup>35</sup> Masa gula hay a ma wusam cay fa ndøhay ma ka sløra daa jerne kaa heyey na, ndøhay ma ka sløra hay a, kaw! kaw! a kørzamata. Gula langar, a slødmara, langar

may, a kədmara vagay, asaya, ta', aa zakamara gula lanġar ta anġwa vagay. <sup>36</sup> Fa dəba ha, bay nġa jerne kaa heyey a slərey gula hay ga ma fəna nġeeme heyey. Ndəhay ma ka sləra daa jerne kaa heyey, a kədmata kəne cənġa. <sup>37</sup> Fa dəba ha, ta', a slərey bəzey anġa, a wulkey, a ləvey: "A namar ray la a bəzey da hwađ ađaw." <sup>38</sup> Ama daa masa ndəhay ma ka sləra daa jerne kaa heyey ma hətmar bəzey anġa ha fa sawa na, ta', a slam yawa da wuzlah ata, a ləvam: "Katay ara bəzey ma da wa jerne keđe fa dəba nġa papaha. Nakwa ta kəđkwa vagay, amba ya wakwa jerne he keđe." <sup>39</sup> Anda keđe, a kərzamara, a đađamara a dəba jerne he, ta', a kədmara vagay.»

<sup>40</sup> Yesu aa guzltar saya, a ləvtar: «Kaa wara bay nġa jerne he ma da sawa na, a da kadata ndəhay a na, kwara?» <sup>41</sup> A mbəđdamara, a ləvmar: «Bay nġa jerne he, a da kəđta ndəhay lamba hay a vagay, kwa fa da sərɤatar dey-ceceh daa ba. Fa dəba ha, a da vəlda jerne he a har ndəhay mekele. Ndəhay a, a da vəlmar babəza nġa wudez e ta kiya menġəley babəza ha.» <sup>42</sup> Yesu ta', aa guzltar, a ləvtar: «Akwar ta janġamara mey mawuzlalakaya daa đerewel nġa Gazlavay daa ba səlak daw? Mey masa ma ləvey:

“Anġwa meləmey way masa ndəhay ma ləma  
way  
ma kəzlamara ta cakay na,



anɣwa ha na, ta tɔrey sem nɣa anɣwa maaya  
melɔmey way  
ma fɔnta siya hay jak.

Nɣene na, ara Bay Gazlavay ma ka cek aha,  
ara cek maaya fa dey alɔkwa.”»

<sup>43-44</sup> Fa dɔba ha, Yesu aa guzltar saya, a lɔvey:  
«[Da ndaw a tɔdey a ray anɣwa aha na, ndaw  
aha a da nɣɔrfey. Asaya da anɣwa aha a kɔzley  
a ray ndaw na, a dɔga ndaw aha la kwɔd-kwɔd  
anda bebɔdes.] Ara maja kedɛ, ya fa lɔvkwar,  
akwar na, Bay Gazlavay fa da vɔlkwar cɔved nɣa  
nɣey da wuzlah ndɔhay anɣa hay daa ba. A da  
vɔley cɔved na, si nɣada ndɔhay masa slɔra ata  
ma mbafar.»

<sup>45</sup> Masa \*bay-ray hay nɣa ndɔhay ma ka kwak-  
was nɣa Gazlavay ta \*Fariza hay ma cɔndamara  
mey-menɣey masa Yesu maa guzlda ha na, a  
sɔmara Yesu aa guzley na, da ray ata. <sup>46</sup> Da  
ray nɣene, a sɔpam cɔved amba a kɔzamarara.  
Ama a zɔram ta ndɔhay fetede maja ndɔhay a,  
a wulkam Yesu na, ara \*ndaw ma tɔla mey nɣa  
Gazlavay.

## 22

*Mey-menɣey da ray Jɔwif hay ma tɔbmara  
mey nɣa Yesu ba*

*(Luk 14.15-24)*

<sup>1</sup> Yesu aa guzltar nɣada ndɔhay daa \*Way-  
mekey-kwakwas nɣa Gazlavay heyey ta mey-  
menɣey hay saya, a lɔvtar: <sup>2</sup> «Ya gwa nɣa wa

---

**21:42** 21.42 Ps 118.22-23

**21:43-44** 21.43-44 Dan 2.34-35, 44-45

**21:46** 21.46 21.11; 26.4-5

\*mewey nga Bay Gazlavay da ray ndəhay na, ta me? Yaw, bay daha, a key gwagway ta pas bəzey anğa ma lawa kwakwa. <sup>3</sup> A slərdata madərլam anğa hay nga zəlwa ndəhay masa mazəltakaya ngadaa gwagway a. Ama ndəhay mazəltakaya ha, a gəmam nga samawa ba.

<sup>4</sup> «Fa dəba ha, a slərey madərլam anğa hay mekele saya, a ləvtar: “Diyam ta ləvmatar a ndəhay masa mazəltakaya na, nga samawa aa gwagway a. Yah ma hərta sla hay ta dāhway cay, cek hay tabiya madiytakaya cay, nga samawa nga zəmey daf nga gwagway a dəba.” <sup>5</sup> Ama ndəhay mazəltakaya ha, a pam ləngesl fa mezəley a ba. A diyam nga key cek ata hay mekele. Ndaw lanğar a daw a ley, ndaw lanğar a daw a kawa filaw. <sup>6</sup> Siya hay may, a kərzamata madərլam hay nga bay kaa heyey, a sərdamata banay, a kədmata vagay. <sup>7</sup> Masa bay kaa heyey ma cənda na, mevel a car, a slərey sewje anğa hay nga kədey ndəhay ma kədmata madərլam anğa hay heyey vagay. Fa dəba ha, sewje hay a, a wawurmara berney ata.

<sup>8</sup> «Cay, ta’, a ləvtar ngada madərլam anğa hay siya: “Cek hay tabiya nga gwagway madiytakaya cay, ama ndəhay mazəltakaya na, ata təde nga samawa aa gwagway a saba. <sup>9</sup> Anda kedə, diyam aa cəved mahura hay, zəlmawa kwa waawa masa akwar ma hətam amba a samawa, a zəmam daf nga gwagway a.” <sup>10</sup> Ta’, madərլam anğa hay kaa heyey, a diyam aa cəved mahura hay, a zəlmawa ndəhay masa ata ma hətam,

ndəhay maaya ta maaya ba hay cəpa, haa way masa ata ma kam gwagway da hwaɗ a kaa heyey a rəhey.

<sup>11</sup> «Bay kaa heyey a daw, a mbəzey aa way nga gwagway nga nəktərwa ndəhay ma zəmam daf nga gwagway a. A da nəkey dey na, a ray ndaw daha da wuzlah ata, zana nga gwagway fa vaw daa ba. <sup>12</sup> Aa guzlar a ndaw a, a ləvar: “Jam adaw, zana nga gwagway fa vaw akah daa ba kaa na, ka mbəzwa aa way a, ta wura?” Kwa ndaw aha, ta mbəɗɗara daa ba. <sup>13</sup> Ta’, bay kaa heyey aa guzlar a ma ka sləra anɗa hay, a ləvtar: “Jəwmara salay ta har nga ndaw nɗene, hazakadamara aa ambaw, aa ləvaŋ. Fetede na, a da təway, asaya, a daa pəɗey sler.”»

<sup>14</sup> Yesu ta’, aa guzlar a ndəhay a saya, a ləvey: «Ahaw, ndəhay ga mazəltakaya, ama mawalatakaya na, ndəhay nekəɗey gway.»

*Ndəhay mahura hay a jadamara Yesu da ray mepəley budaw*

*(Mark 12.13-17; Luk 20.20-26)*

<sup>15</sup> Fa dəba ha, ndəhay \*Fariza hay, a kusam ta cakay nga səpey dabaray, amba a kərzamara Yesu fa mey masa anɗa ma daa guzlda. <sup>16</sup> Ta’, a sləram gula ata hay siya, ta ndəhay nga Bay \*Herawt fa Yesu nɗaa cəɗamara. A ləvmar: «Bay ala, ya sərmara kah na, ndaw ma mbərzley ba, ka faa sərkadata ndəhay nga nɗam anda Gazlavay ma wuɗey fara fara, ka zlurey ta ndaw ba, asaya, ka nəkta ndəhay cəpa letək fa mey akah. <sup>17</sup> Anda keɗe, ya wuɗam nɗaa cəɗamaka,

kwakwas aləkwa na, a vøley cøved nga pøley budaw a bay mahura \*Sezere daw? A vøley cøved ba daw? Wuzdandara mewulkey akah da ray mey a keđe cey.»

<sup>18</sup> Ama Yesu ta søra mewulkey ata maaya ba ñgene sem. Ta', a løvtar: «Akwar ndøhay masa ta neneh cew, ka wudam nga jadamaya na, maja me? <sup>19</sup> Wuzmaya dala masa akwar ma pølam budaw a ta anga.» Ta', ndøhay kaa heyey a wuzmar dala ha pal. <sup>20</sup> Yesu a nøka dala ha, ta', aa cøfdata saya, a løvtar: «Fa dala ha keđe na, ara dey nga wa? Ara mezøley nga wa?» <sup>21</sup> A mbøđdamara, a løvmar: «Ara nga Sezere, bay mahura nga \*Rawm.» Da ray ñgene, Yesu a løvtar: «Anda keđe, cek masa nga Sezere na, vøldamara a Sezere he. Cek masa nga Gazlavay na, vøldamara a Gazlavay a.» <sup>22</sup> Masa ata ma cøndamara Yesu ma mbøđdatara anda ñgene la na, a røzlam ga da ray mey a. Mbak! a mbøkdamara, ta', a diyam.

*Mey da ray masløkɖawa nga ndøhay daa memøcey*

*(Mark 12.18-27; Luk 20.27-40)*

<sup>23</sup> Ta pas a ñgene, ndøhay \*Saduse hay a ñgøcham a cakay Yesu. Saduse hay na, ara ndøhay ma wulkam, ma løvam da ndaw ta møcey sem na, fa da sløkɖawa daa memøcey daa ba. Ta', aa cøfdamara Yesu, a løvmar: <sup>24</sup> «Bay ala, mawuzlalakaya daa \*kwakwas nga Mawiz a løvey: “Da ndaw a møcey ta høtey bøzey daa ba na, si mølmaha a la ñgwas-vagay a, amba a

yamawa bəza hay ɲgada məlmaha maməckaya ha.” <sup>25</sup> Yaw, məlman ɲ hay maasala da wuzlah ala daha, ata ɲgaa man, ɲgaa paɲ. Məlma ata mahura leɲ! a ley ɲgwas, pam! a məcəy, kwa ta hətey bəzey daa ba. Da ray ɲgene, a mbəkdara ɲgwas aɲga a məlmaha laɲgar. <sup>26</sup> Cek aha, a key letek ta mambaray a, a key letek ta məlma ata ɲga dey maakar a haa kasl fa məlma ata ɲga dey maasala ha. <sup>27</sup> Fa dəba ha ata ma məcām la cəpa ata na, ɲgwas aha pam! a məcəy may. <sup>28</sup> Anda kefe, ta pas masa ndəhay maməctakaya ma da sləkdamawa na, ɲgwas aha a da key na, ɲgwas ɲga wa dasi ata? Maja ata cəpa ta lamara la ɲga ɲgwas ata.»

<sup>29</sup> Yesu a mbəɸɸdatara a ləvtar: «Akwar faa zəɸdamara ray akwar maja ka sərmara mey ɲga Gazlavay ba, asaya, maja ka sərmara gəɸaɲ aɲga ba. <sup>30</sup> Ya fa ləvkwar fara fara, ta pas masləkɸawa ɲga ndəhay daa meməcəy na, zel hay fa da lam ɲgusay daa saba, ɲgusay fa da njam ta zel hay daa saba may, ama ndəhay, a da njam anda maslaɲ hay ɲga Gazlavay da vad. <sup>31</sup> Akwar ma jaɲgamara mey masa Gazlavay maa guzlakwara da ray masləkɸawa ɲga ndəhay daa meməcəy na, daa ba daw? Gazlavay a ləvey: <sup>32</sup> “Yah, Gazlavay masa \*Abəraham, \*Izak, leɲ \*Jakwap ma namar ray.”» Yesu aa guzley saya, a ləvey: «Gazlavay na, ara Gazlavay ɲga ndəhay ta dey, ba na, ɲga ndəhay maməctakaya ba.» <sup>33</sup> Ndəhay tabiya ma cəndamara mey a kefe na, a rəzlam da ray meesərkedey ɲga Yesu a.

*Mewey nga Gazlavay masa mahura na, wura?*  
(Mark 12.28-34; Luk 10.25-28)

<sup>34</sup> Masa \*Fariza hay ma nœkmara Yesu ta kusta \*Saduse hay sem ta mey na, ta', a kusam, a ngœcham a cakay Yesu. <sup>35</sup> \*Ndaw maa sœrkada kwakwas nga Mawiz da wuzlah ata daha, aa cœfdœ Yesu amba a jada, a lœvar: <sup>36</sup> «Bay adaw, \*mewey nga Gazlavay mahura ma fœnta siya hay na, wura?»

<sup>37</sup> Yesu a mbœfdœara, a lœvar: «“Si ka wudœ Bay Gazlavay akah, ta mevel akah cœpa, ta mesœfney akah cœpa, asaya, ta lengesl akah cœpa.” <sup>38</sup> Kede he ara mewey nga Gazlavay mahura ma fœnta siya hay. <sup>39</sup> Asaya, mewey nga dey cew e ma sœpa kede daha saya. Mewey a, ata letek. Mewey a, a lœvey: “Si ka wudœ meseembew akah anda kah ma wudœ ray akah.” <sup>40</sup> Yaw, \*kwakwas nga Mawiz tabiya ta meesœrkedey nga ndœhay ma tœla mey nga Gazlavay zleezle macœmtakaya tabiya na, daa mewey hay a cew kede.»

*Kœriste, anga bay nga Davit na, kwara?*  
(Mark 12.35-37; Luk 20.41-44)

<sup>41</sup> Daa masa \*Fariza hay makustakaya na, Yesu aa cœfdœata may, <sup>42</sup> a lœvtar: «\*Kœriste, \*ndaw masa Gazlavay ma wala nga lœhdata ndœhay na, ka wulkam da ray a na, kwara? Anga, sœkway nga wa?» A mbœfdœamara, a lœvmar: «Anga na, sœkway nga Bay \*Davit.» <sup>43</sup> Yesu a lœvtar: «Ta gœdanj nga \*Mesœfney nga Gazlavay na, Davit ta

---

**22:37** 22.37 Mew 6.4-5    **22:39** 22.39 Lev 19.18; Mt 5.43; 19.19; Rm 13.9; Gal 5.14; Jak 2.8    **22:40** 22.40 5.17; Rm 13.10    **22:41** 22.41-46 20.30-31

zøla Køriste he la, “Bay Mahura.” Kaa a zøla anda kedfe saya na, kwara? Davit e, ta løyey la:

<sup>44</sup> “Bay Gazlavay a løyar a Bay adaw Mahura:

Sawa, njeý a har-zəməy adaw

amba ya wakwa da ray ndəhay

haa ta pas masa yah ma da pata

masa-gəra akah hay asi salay akah.”

<sup>45</sup> Yaw, da Davit a zøla Køriste “Bay Mahura” na, kaa wara Køriste he ara bəzey da hwað Davit saya na, kwara?» <sup>46</sup> Kwa ndaw pal da wuzlah

ata ta gwa nga mbəfdara kwa mey pal daa ba. Dəga ta pas ngene, kwa waawa a zlurey ngaa cəfdafar mey.

## 23

*Yesu a patar lenjesl a ndəhay da ray ndəhay maa sərkada kwakwas nga Mawiz ta da ray Fariza hay*

*(Mark 12.38, 39; Luk 11.43, 46; 20.45, 46)*

<sup>1</sup> Yesu aa guzltar ngada ndəhay makustakaya ta ngada gula anga hay daa \*Way-mekey-kwakwas nga Gazlavay heyey saya, <sup>2</sup> a ləvtar: «\*Ndəhay maa sərkada kwakwas nga Mawiz len ndəhay \*Fariza hay na, mapatakaya aa slam a nga Mawiz ngaa sərkedey kwakwas anga. <sup>3</sup> Si ka təbmara mey ata, asaya, ka kamara cek masa ata maa sərkadamakwara ha. Ama cek masa ata ma kamara na, ka da kamara ba, maja ata ta ray ata na, fa kamara cek anda ata maa sərkadamakwara ha, daa ba. <sup>4</sup> A bamawa

**22:44** 22.44 Ps 110.1; SNM 2.33-35; 1Kwr 15.27; Heb 1.13; 8.1

**22:46** 22.46 Mk 12.34; Lk 20.40    **23:3** 23.3 Rm 2.21-23

kwakwas hay maadakw a maadakw a masa ndəhay ma gwamara nga səpa ba. A təkmatar dəy a ndəhay nga səpmara kwakwas hay a, ama ata na, a gəmam nga jənmata ndəhay nga səpey kwakwas hay a kwa nekədəy ba. <sup>5</sup> A kamata sləra ata hay tabiya na, amba ndəhay a hətmatar aa həmdamata gway. Anda keđe, a wuzlalam mey masa daa dərewel nga Gazlavay, a təfmara aa ambal anda laya, a ləwmara fa dəngay, da daa ba, fa har. A təfmata mahura mahura ma fəna nga ndəhay siya hay. Asaya, zana hay masa ata ma pamata fa vaw na, a cam gagəmay maazəma maazəma \* fa mey a, ma fəna nga ndəhay mekele.

<sup>6</sup> «Da ta zəlmata la aa gwagway na, a wudam menjey aa slam maaya nga ndəhay mahura hay. Asaya, daa \*way-mewuzey-mey nga Gazlavay na, a wudam menjey aa slam maaya fa mey. <sup>7</sup> A wudam ndəhay a camatar har ta meney ray fa mey nga ndəhay makustakaya, asaya, a wudam ndəhay a zəlmata bay.

<sup>8</sup> «Ama akwar na, ka da təbmara amba a zəlmakwar bay ba, maja akwar tabiya na, məlmanj hay. Nğada akwar, ndaw ma səra cek na, anğa pal. <sup>9</sup> Asaya, ka da zəlam ndaw da bəla keđe Papanj ba, maja Papakw akwar na, anğa pal masa da vad. <sup>10</sup> Ka da təbmara amba a zəlmakwar Bay Mahura ba, maja Bay akwar

---

\* **23:5** 23.5 Daa mewulkey nga Jəwif hay, gagəmay macakaya maazəma fa mey nga zana nga ndaw na, a wuzda ndaw aha anğa ndaw ma nar ray a Gazlavay. **23:5** 23.5 Mab 13.9; Mew 6.8; Mesl 15.38-39; Mt 6.1 **23:8** 23.8 Janj 13.13



Mahura na, ara \*Kəriste pal taava aŋga.

<sup>11</sup> «Ndaw mahura da wuzlah akwar na, ara ndaw ma kakwar sləra. <sup>12</sup> Kwa waawa ma pa ray aŋga ŋga ndaw mahura na, Gazlavay a da pa ŋga mecəhe. Kwa waawa ma nada ray aŋga na, Gazlavay a da pa ŋga mahura.»

*Yesu a mbəftar ray a ndəhay maa sərkada kwakwas ŋga Mawiz ta a Fariza hay*

*(Mark 12.40; Luk 11.39-42, 44, 52; Luk 20.47)*

<sup>13</sup> «Banay a sawa la a ray akwar, akwar \*ndəhay maa sərkada kwakwas ŋga Mawiz ta \*Fariza hay. Akwar na, ndəhay masa ta neneh cew. Akwar fa təkмата ndəhay ŋga mbəzey a wuzlah ndəhay masa Gazlavay fa wey da ray ata. Akwar ta ray akwar, ta mbəzam daa ba, asaya, ka ta təkмата ndəhay ma wudam ŋga mbəzam sem.

[ <sup>14</sup> «Banay a sawa la a ray akwar, akwar ndəhay maa sərkada kwakwas ŋga Mawiz ta Fariza hay. Akwar na, ndəhay masa ta neneh cew. Akwar fa təbmatara cek hay ŋga ŋgwas-vagay hay tabiya, asaya, akwar faa guzlam ga daa medərey-danɣay amba ndəhay aa zaramakwar. Maja ŋgene Gazlavay a sərdakwar banay la ma fəna ndəhay siya.]

<sup>15</sup> «Banay a sawa la a ray akwar, akwar ndəhay maa sərkada kwakwas ŋga Mawiz ta Fariza hay. Akwar na, ndəhay masa ta neneh cew. Akwar fa pəkam aa wura aa wura cəpa amba ka hətam kwa ndaw pal letək ŋga səpey

kwakwas akwar ni, ama da akwar ma hɔtam la na, ka tɔrdamara ndaw a, ɲga ndaw ɲga awaw magaza ma fɛnkwar haa dey cew.

<sup>16</sup> «Banay a sawa la a ray akwar, akwar ndɔhay ma wuzmatar cɔved ɲgada ndɔhay, ama akwar na, wulaf hay. Ka lɔvam: “Kwa waawa ma mbedey ɲga key cek ta \*Way-mekey-kwakwas ɲga Gazlavay na, ara ɲga tede, ama kwa waawa ma mbedey ɲga key cek ta bɔrey magaza mewedey pɔɲged pɔɲged daa Way-mekey-kwakwas a na, si cɔma a ka cek aha anda aa ma lɔvey.”

<sup>17</sup> Akwar na, ndɔhay manjar-lenɲesl, asaya, akwar wulaf hay! Way-mekey-kwakwas ɲga Gazlavay ta bɔrey magaza na, mahura dasi ata na, wura? Way-mekey-kwakwas ɲga Gazlavay na, aɲga mahura da ray bɔrey magaza, maja ara Way a ma tɔrda bɔrey magaza aha ɲga cek maaya ɲgada Gazlavay.

<sup>18</sup> Akwar fa lɔvam saya: “Kwa waawa ma mbedey ɲga key cek ta slam-mefɔkey cek ɲgada Gazlavay na, \*mbedey a, ara ɲga tede. Ama kwa waawa ma mbedey ɲga key cek ta cek mavɔldakaya ɲgada Gazlavay masa mapakaya da ray slam aha na, si a ka cek aha anda aa ma lɔvey.”

<sup>19</sup> Akwar na, wulaf hay! Cek mahura na, cek mevɔley a Gazlavay daw? Da daa ba, slam-mefɔkey cek a Gazlavay ma tɔrda cek aha maaya fa Gazlavay daw?

<sup>20</sup> Anda kedɛ, kwa waawa ma mbedey ta slam-mefɔkey cek ɲgada Gazlavay na, a key ɲgene, a mbedey ta slam aha len ta cek da ray a tabiya. <sup>21</sup> Kwa waawa ma

mbedey ta Way-mekey-kwakwas nga Gazlavay na, a key ngene, a mbedey ta Way a lenj ta Gazlavay manjakaya daa Way a. <sup>22</sup> Kwa waawa ma mbedey ta slam da vad na, a key ngene, a mbedey ta slam-menjey nga Gazlavay lenj ta Gazlavay a manjakaya da ray a.

<sup>23</sup> «Banay a sawa la a ray akwar, akwar ndohay maa sarkada kwakwas nga Mawiz ta Fariza hay. Akwar na, ndohay masa ta neneh cew. Akwar fa wunkamata cek akwar hay tabiya slam kuraw, ka veldamara slam pal a Gazlavay, kwa cek hay mecøhe mecøhe ma cørda lar na, akwar fa wunkamara køne may. Ama nga søpey mewey hay maaya na, ka sørfadamara ba. Anda meløvey mekey cek ta cøved e, mesørey dey-ceceh, asaya, menjey mandaw mandaw daa cøved nga Gazlavay. Sasøkar jak, cek hay a ngene na, ara cek hay maaya nga key. Ka da mbøkdamara nga key cek hay siya hay ba may.

<sup>24</sup> Akwar fa wuzmatar cøved ngada ndohay, ama akwar na, wulaf hay. Akwar fa jajørmara cek akwar mesey maja jajøway mecøhe da hwad a, anja ngene, akwar fa ndam slagwama a hwad daa yam maajørkaya heyey cønga gway.

<sup>25</sup> «Banay a sawa la a ray akwar, akwar ndohay maa sarkada kwakwas nga Mawiz ta Fariza hay. Akwar na, ndohay masa ta neneh cew. Akwar fa pørmata døba nga vøley akwar hay mesey cek ta vøley akwar hay nga daf, anja ngene, ta da hwad a na, vøley hay a madakalatakaya tep! tep! ta cek hay nga mayal

---

**23:21** 23.21 1Bay 8.13    **23:23** 23.23 Lev 27.30; Mi 6.8; Lk 18.12

**23:24** 23.24 15.14

akwar hay lej ta cek hay maaya ba masa akwar ma wufam kalah daa mevel akwar. <sup>26</sup> Akwar Fariza hay na, wulaf hay! Përam teesef na, hwaɗ a ɗagay, anda keɗe, dɔɓa ha na, a pɔrey la.

<sup>27</sup> «Banay a sawa la a ray akwar, akwar ndəhay maa sərkaɗa kwakwas ŋga Mawiz ta Fariza hay. Akwar na, ndəhay masa ta neneh cew. Akwar na, anda cəvay hay makulɓatakaya mabara ma mbam. Ama ta da hwaɗ a na, mazakaya, asaya, marəhtakaya ta tetesl hay.

<sup>28</sup> Akwar na, kəne may. Fa dey ŋga ndəhay na, akwar anda ndəhay maaya. Anja daa mevel akwar na, cek hay malamba hay ga, akwar ndəhay masa ta neneh cew.

*(Luk 11.47-51)*

<sup>29</sup> «Banay a sawa la a ray akwar, akwar \*ndəhay maa sərkaɗa kwakwas ŋga Mawiz ta \*Fariza hay. Akwar na, ndəhay masa ta neneh cew. Akwar fa ləmamata cəvay hay ŋga ndəhay ma tɔla mey ŋga Gazlavay ma kəɗmata vagay zleezle ŋga mbey, akwar fa kam banjay fa cəvay hay ŋga ndəhay ma ka cek ta cəved e zleezle.

<sup>30</sup> Asaya, akwar fa ləvam: “Daa masa papaŋ ŋga papa ala hay, ata ta dey, da daa ŋgene ala daha na, anja ala fa da cəmam ta ata ŋga kəɗey ndəhay ma tɔla mey ŋga Gazlavay a vagay na, daa ba.”

<sup>31</sup> Anda keɗe, akwar, ta ray akwar, fa wuzdamara, akwar na, bəza hay ŋga ndəhay ma kəɗmata ndəhay ma tɔla mey ŋga Gazlavay. <sup>32</sup> Yaw, maaya na, ka ndəvdamara

slëra nga papanj nga papakw akwar hay zleezle la gway. <sup>33</sup> Akwar zezekw hay, səkway nga kucesl hay! Akwar fa da ləham fa awaw magaza na, daa ba! <sup>34</sup> Maja ŋgene, jəkam sləmay! Yah na, ya da slərkwār ndəhay ma təla mey ŋga Gazlavay, ndəhay ta ləngesl ma səra cek, ləŋ ndəhay ma daa sərkadamakwara mey ŋga Gazlavay. Da wuzlah ndəhay a na, siya hay ka da kədmata vagay, siya hay ka da dərmeta fa hwadam mazlanjalakaya, siya hay ka da slədmata daa way akwar hay mewuzey mey ŋga Gazlavay, siya hay may ka da səpmatar wurzay aa berney hay mekele mekele amba ka sərdamata banay. <sup>35</sup> Maja ŋgene, mambaz ŋga ndəhay ma ka cek ta cəved e cəpa masa ndəhay ma kədmata vagay na, a hufkwār † la. A kədam teesed na, Abel. Asaya, ta kədam ndəhay mekele mekele la haa kasl fa Zakari, bəzey ŋga Baraki, masa akwar ma kədmara daa walaŋ ŋga slam-mefəkey cek ŋgada Gazlavay ta \*Way ŋga Gazlavay. <sup>36</sup> Ya fa ləvkwar fara fara, mambaz ŋga ndəhay a ŋgene, a huftar la a ray ndəhay masa wure kedə.»

*Yesu aa guzley da ray Jeruzelem*

*(Luk 13.34, 35)*

<sup>37</sup> Fa dəba ha, Yesu a ləvey: «Haya! Akwar ndəhay da \*Jeruzelem, akwar ndəhay da Jeruzelem, Gazlavay a slərkwār ndəhay ma təla mey aŋga hay na, ka kədmata vagay! Asaya, a slərkwār maslaŋ aŋga hay na, kaa zakamata

---

**23:33** 23.33 3.7    **23:34** 23.34 1Tes 2.15    † **23:35** 23.35 a  
hufkwār: a wufwa a ray akwar    **23:35** 23.35 MC 4.8-10

ta aŋgwa! Ama mandaw mandaw ya wuɗey amba ya bɔckwar tabiya akwar anda gwagwar ma bɔcta bɔz aŋga hay asi kɔrpaŋ, ama ka wuɗam ba. <sup>38</sup> Cɔndamara, Gazlavay a da la har aŋga da ray akwar, Way-mekey-kwakwas akwar a da tɔrey yiden. <sup>39</sup> Yah fa lɔvkwar dɔga wure kede, akwar fa da hɔtmaya fa dey daa saba haa ta pas masa akwar ma da lɔvam: “Anja Bay Gazlavay ŋga pɔsar mey ŋgada ndaw masa aa ma slɔrdɔrwa ta mezɔley aŋga.”»

## 24

*Yesu aa guzley da ray Way-mekey-kwakwas  
ŋga Gazlavay ma da bɔzley  
(Mark 13.1-2; Luk 21.5-6)*

<sup>1</sup> Yesu a bawa daa \*Way-mekey-kwakwas ŋga Gazlavay. Masa aŋga fa daw na, gula aŋga hay a ŋgɔcham a cakay a amba a wuzdamara Way-mekey-kwakwas ŋga Gazlavay a, aŋga malɔmkaya na, kwara. <sup>2</sup> Ta', Yesu aa guzlar, a lɔvtar: «Akwar fa hɔtmar way a kede cɔpa, ba diya? Ya fa lɔvkwar fara fara, way a kede na, a bɔzlmara la, kwa aŋgwa pal fa da mbɔkey da ray cɔla daa ba.»

*Mey da ray bɔla ma da ndɔvey  
(Mark 13.3-13; Luk 21.7-19)*

<sup>3</sup> Fa dɔba ha, Yesu a daw aa Aŋgwa ŋga \*Awliviye, cɔkwam! a njeɣ fetede. Gula aŋga hay ta', a ŋgɔcham a cakay a, ata taava ata, aa cɔɗdamara, a lɔvmar: «Wuzdandara cey, cek

---

**23:38** 23.38 Ez 10.18-19; 1Bay 9.7-8      **23:39** 23.39 Ps 118.26

**24:2** 24.2 Lk 19.44



la, a da mbørzlam, a ləvam ata na, ndəhay ma təla mey nga Gazlavay. Ndəhay a ŋgene, a da nəsam ndəhay ga. <sup>12</sup> Ndəhay a da kam cek hay malamba ma fəna ma fəna, maja ŋgene ndəhay ga fa da wudfam vaw ta maaya daa saba. <sup>13</sup> Ama ndaw ma bəsa banay a la haa mendəvey a na, Gazlavay a ləhda la. <sup>14</sup> Si a wuzdamara \*Mey-maaya-mawiya da ray \*mewey nga Bay Gazlavay da ray ndəhay a ndəhay tabiya da bəla la dāgay, amba ndəhay tabiya a cəndamara mey da ray adaw. Fa dəba ha, bəla a ndəvey dəba.»

*Mey da ray banay ma da sawa a ray ndəhay da Jude*

*(Mark 13.14-23; Luk 21.20-24)*

<sup>15</sup> «Cay na, ka da hətmar ndaw malamba ma nəsə cek, ara ndaw masa Gazlavay ma wudəy nga hətar fa dey ba. Ka da hətmar ndaw aha manjakaya daa \*Way-mekey-kwakwas nga Gazlavay. Ndaw a na, \*Daniyel, \*ndaw ma təla mey nga Gazlavay ta wuzleley mey la zleezle da ray a. (Akwar masa ma jangamara mey a keɖe na, si ka pam lenɖesl fa mey a.) <sup>16</sup> Daa dər hay a ŋgene na, si ndəhay daa hwayak nga \*Jude a hwam nga bəwa a anɖwa. <sup>17</sup> Kwa ndaw masa fa məskey vaw daa ambaw na, fa da mbəzey a way nga lawa cek anɖa hay daa ba. <sup>18</sup> Kwa ndaw anɖa da ley na, a da vəhwa a way nga ley zana ba. <sup>19</sup> Daa dər hay a ŋgene, banay a sawa la a ray ŋgusay ta hwad ta a ray ŋgusay masa

---

**24:11** 24.11 7.15    **24:12** 24.12 2Tm 3.1-5    **24:13** 24.13 CWJ  
 13.10    **24:14** 24.14 28.19    **24:15** 24.15 Dan 9.27; 11.31; 12.11  
**24:17** 24.17-18 Lk 17.31



ta bəza hay da har. <sup>20</sup> Dəram dangay a Gazlavay amba banay a, a sawa ta piya ba, kwa ta \*pas meməskey-vaw ba may, <sup>21</sup> maja daa đar hay a ŋgene na, banay a sawa la ga a ray ndəhay. Dəga mezley ŋga bəla haa wure keđe ndaw ta sərey banay anda ŋgene daa ba araŋ. Asaya, banay fa da sawa ma fəna ŋgene daa saba. <sup>22</sup> Da Gazlavay ta ŋgəwa siya ŋga đar ŋga banay a daa ba na, anja kwa ndaw pal fa da mbəkey ta dey daa ba. Ama a ŋgəwa siya ŋga đar a na, maja ndəhay masa aŋga ma walata ŋga ndəhay aŋga hay.

<sup>23</sup> «Da ray ŋgene, da ndaw a ləvkwar: “\*Kəriste, aŋga keđe”, da daa ba “aŋga katay” na, ka da təbmara mey aŋga ba. <sup>24</sup> Ya ləvkwar anda keđe na, maja ndəhay ma pamara ray ata ŋga Kəriste, asaya, ndəhay ma pamara ray ata ŋga ndəhay ma təla mey hay ŋga Gazlavay na, a samawa la. A kam maazla hay ma rəzla ndaw la ŋga wuzdərwa gədaŋ ata amba a təknam ndəhay. Da a gwamara na, a təknam kwa ndəhay masa Gazlavay ma walata sem ŋga ndəhay aŋga hay may. <sup>25</sup> Jəkam sləmay, cəndamara maaya maaya, fa cek hay a keđe ma da kam na, ya ta pakwar lengeŋsl cay.»

*Mey da ray ma vəhwa ŋga Bəz ŋga Ndaw  
(Mark 13.24-27; Luk 17.23-24; Luk 21.25-28)*

<sup>26</sup> «Da ndaw aa guzlkwar, a ləvkwar: “\*Kəriste aŋga katay da wuzlah-ley” na, ka da diyam ba. Da a ləvkwar saya “aŋga maɓakaya feđe” na, ka

**24:21** 24.21 Dan 12.1; CWJ 7.14     **24:23** 24.23-25 Lk 17.23-24

**24:24** 24.24 24.5; 7.15; CWJ 13.13-14

da tǝbmara mey nga ndaw a ba. <sup>27</sup> Yah, \*Bǝz nga Ndaw, ya da vǝhwa na, anda var ma zǝmey ma wedey dǝga da wurza haa kasl a mey-aŋgwa.

<sup>28</sup> Daa slam masa cek mamǝckaya daha na, kwakucuh hay makustakaya fetede \*.

<sup>29</sup> «Fa dǝba nga banay a masa daa dǝr hay a ŋgene na, wure ŋgene pas a tǝbzley la, kiya fa da wedey daa saba, wurzla hay a kǝzlamawa la da vad a hwayak, cek hay cǝpa da gazlavay da vad, a wusam la. <sup>30</sup> Daa ŋgene, yah, Bǝz nga Ndaw, ya da wuzwa vaw da gazlavay da vad. Anda kefe, ndǝhay da bǝla cǝpa a da wudam ta matǝway. A da hǝtmaya, yah, Bǝz nga Ndaw, ya fa sawa da ray mekwtene ta gǝdan mahura lej ta mewedey nga Bay Gazlavay. <sup>31</sup> Day nga taalam mahura a cǝnwa la, yah, Bǝz nga Ndaw, ya da slǝrdatǝrwa maslan hay nga Bay Gazlavay da vad amba a diyam aa slam hay tabiya da bǝla, a kusmatǝrwa ndǝhay masa Gazlavay ma walata nga ndǝhay aŋga hay.»

*Mey-menjey ta gudav*  
(Mark 13.28-31; Luk 21.29-33)

---

**24:27** 24.27 24.30, 37; 25.31; 1Kwr 15.23; 1Tes 3.13; 4.15; 2Tes 2.1, 8; Jak 5.7-8; 2Pi 3.4; 1Jn 2.28 \* **24:28** 24.27-28 Anda ndǝhay ma hǝtmar mezǝmey nga var, da daa ba, kwakucuh hay makustakaya da ray cek mamǝckaya na, ndǝhay tabiya a da hǝtmar Yesu, Bǝz nga Ndaw ma da vǝhwa na, kǝne may. **24:28** 24.28 Jǝw 39.30; CWJ 19.17-18 **24:29** 24.29 Iz 13.10; 34.4; Hag 2.6, 21; 2Pi 3.10, 12; CWJ 6.12-14 **24:30** 24.30 Zak 12.10-14; Dan 7.13-14; Mt 24.27; 26.64; Mk 14.62; CWJ 1.7 **24:31** 24.31 13.41; taalam: 1Kwr 15.52; 1Tes 4.16

<sup>32</sup> «Jøkam sləmay maaya maaya fa mey masa yah ma da wakwara ta gudav. Da masa ka hətmar gudav fa dɛdɛy, gwaslaf a gudaf! gudaf! na, ka səmra kiya madaw a ley gweegwe cay. <sup>33</sup> Anɣa letək kəne, da ka hətmatar cek hay a tabiya fa kam anda yah ma ləvkwar keɛde na, ŋgene səmra, Yah, \*Bəz ŋga Ndaw, gweegwe cay ya vəhwa. <sup>34</sup> Ya fa ləvkwar fara fara, cek hay a keɛde tabiya a da kam na, ndəhay masa wure keɛde ta məcam tabiya daa ba araŋ. <sup>35</sup> Slam da vad ta slam da hwayak a ndəvey la, ama mey adaw na, fa da ndəvey daa ba səlak.»

*Ma səra pas ŋga mavəhwa ŋga Bəz ŋga Ndaw na, wa?*

*(Mark 13.32-37; Luk 17.26-30, 34-36)*

<sup>36</sup> «Fara fara, cek hay a keɛde tabiya a da kam na, ndaw ma səra kwa ɛar a, kwa ler e, daa ba. Kwa maslaŋ hay ma njam da cakay Bay Gazlavay da vad a səmra ba, kwa Yah, Bəzey anɣa, ya səra ba, ama si Papay, pal taava anɣa, ma səra ɛar a.

<sup>37</sup> Ta pas masa yah, \*Bəz ŋga Ndaw ma da vəhwa na, a da key anda cek ma key daa masa Nəwe anɣa da bəla. <sup>38</sup> Daa masa Bay Gazlavay ta paslata cek hay da bəla ta yam daa ba araŋ, haa a wusey kasl fa ɛar masa Nəwe ma mbəzey aa kwambiwal na, ndəhay fa zəmam cek, fa sam cek, fa lam ŋgusay, asaya, fa vəldamata dam ata hay a way zel. <sup>39</sup> Ama daa ŋgene na, kwa ndəhay ta səmra masa cek fa da hətɛatar na, daa ba, haa yam a sawa aa zəɛɛdata cəpa.

Yah, Böz nga Ndaw ma da vèhwa na, a da key kène. <sup>40</sup> Daa ñgene, da ndəhay cew fa kam sləra da ley na, ya da ñgəla pal, ya da mbəkda laŋgar. <sup>41</sup> Da ñgusay cew fa kəram fa lavar pal na, ya da ñgəla pal, ya da mbəkda laŋgar.

<sup>42</sup> Anda kedè, wam vaw, ka da nam ba, maja ka sərmara pas nga Bay akwar Mahura ma da vèhwa ba. <sup>43</sup> Jəkam sləmay maaya maaya, da bay nga way a sərə đar masa ndaw-mayal ma da daw a way aŋga nga leley ta tavad na, a ney aa đar dasi tavad a ñgene la daw? Fa da ney daa ba səlak, fa da mbəkda ndaw-mayal nga sləna way aŋga daa ba. <sup>44</sup> Maja ñgene, akwar may, wam vaw maaya maaya, maja yah, Böz nga Ndaw, ya da vèhwa na, kwa ka sərmara đar a ba.»

*Mey da ray ndaw ma ka sləra maaya ta maaya ba*

*(Luk 12.41-48)*

<sup>45</sup> «Ndaw ma ka sləra maaya ta leŋgesl na, wura? Ndaw ma ka sləra maaya ta leŋgesl na, ara ndaw masa bay aŋga ma veldata ma ka sləra hay cəpa asi har aŋga amba a veltar cek mezəmey daa masa may fa catar. <sup>46</sup> Da masa bay aŋga ha, a sawa a hətfar aŋga fa ka sləra ha na, ndaw ma ka sləra ha aa səmey la. <sup>47</sup> Ya fa ləvkwar fara fara, bay aŋga ha, a da veldara zleley aŋga hay cəpa a har aŋga amba a nəkfar dey. <sup>48</sup> Ama da ndaw ma ka sləra ha aŋga maaya ba na, a da ley mewulkey wal, a ləvey: “Bay adaw aha, fa da vèhwa gweegwe daa

**24:42** 24.42 24.44, 50; 25.13; Mk 13.33, 35; Lk 12.40; 21.36

**24:43** 24.43 1Tes 5.1-2; 2Pi 3.10; CWJ 3.3      **24:45** 24.45-47  
25.21-23

ba.” <sup>49</sup> Anda keŋe, ndaw ma ka sløra ha, a zlar nga køfta mandala anga hay masa ata ma kam sløra bama. A da zømey cek, a da sey wuzam ta ndøhay ma wam mandaw mandaw. <sup>50</sup> Yaw, bay anga ha na, a da vøhwa ta pas masa ndaw ma ka sløra fa wulkey da ray a daa ba, asaya, kwa fa da søra ler e daa ba. <sup>51</sup> Bay anga ha, a da bøla da way anga, a da sərda banay anda ndøhay masa ta neneh cew ma da søram banay ta pas mendøvey nga bøla, fetede a da tøway, asaya, a daa pødey sler.»

## 25

### *Mey-menŋey da ray ma da vøhwa nga Yesu*

<sup>1</sup> Yesu a ngatar mey a gula anga hay, a løvtar: «Ya gwa nga wa pas masa yah ma da vøhwa nga wey da ray ndøhay na, ta me? Yaw, ya gwa nga wa ta sabara hay kuraw daha ma diyam ta pas meley kwakwa. A diyam nga cawa ray ta zel nga dam a ta tavad, ta petørla ata hay da har.

<sup>2</sup> Sabara hay zlam da wuzlah ata na, manjar lenŋesl hay. Siya hay zlam na, ata ta lenŋesl.

<sup>3</sup> Sabara hay manjar lenŋesl hay heyey na, a lamata petørla ata hay, ama ta lam mal a har nga zlørey aa petørla ata hay a saya na, daa ba gway.

<sup>4</sup> Ama sabara hay zlam masa ta lenŋesl heyey na, a lamata petørla ata hay, asaya, a zløram mal aa kwalaba hay. <sup>5</sup> Zel nga dam aha ta wuswa fiyaw daa ba. Anda keŋe, sabara hay heyey a gøram nga søkwmara haa dar a katar, a nam.

<sup>6</sup> «Ta wuzlah-tavad na, dɔay a cənwa ta gədan, a ləvey: “Zel nɔga dam ta wuswa cay, diyam ta cadamərwa ray.” <sup>7</sup> Da ray nɔgene, sabara hay kaa heyey a sləkɔam daa ɔar, a dɔymata petərla ata hay. <sup>8</sup> Sabara hay manjar lenɔgesl hay heyey na, a ləvmatar a sabara hay masa ta lenɔgesl hay: “Ambahw, vəlmandar mal may taw. Petərla ala hay fa məcəm maja mal daa saba.” <sup>9</sup> Sabara hay a, a mbəɔɔdamatara, a ləvmatar: “Kay! ya vəldamara ba, maja mal ala fa da wusndakwar aləkwa cəpa daa ba. Diyam ta həɔkamawa fa ndəhay ma həɔkada mal.”

<sup>10</sup> «Masa ata ma diyam sem nɔga səpwa mal heyey na, zel nɔga dam heyey, a wuswa dəba. Sabara hay siya zlam masa maɔiytakaya vaw heyey na, a mbəzəm bama nɔga key gwagway. Ta’, a ɔercamara mey-slam.

<sup>11</sup> «Fa dəba ha, sabara hay zlam manjar lenɔgesl heyey, a wusmawa, a ləvam: “Bay ala, Bay ala, wurndara mey-mbew may taw!”

<sup>12</sup> Ama zel nɔga dam heyey, a mbəɔɔdatara, a ləvtar: “Ya fa ləvkwar fara fara, ya sərkwar ba.”»

<sup>13</sup> Yaw, Yesu aa guzltar saya, a ləvtar: «Anda kede, wam vaw, maja yah, \*Bəz nɔga Ndaw, ma da vəhwa na, ka sərmara kwa ɔar a ba, kwa ler e ba.»

*Mey-menɔgey da ray ndəhay ma ka sləra maaya ta maaya ba  
(Luk 19.11-27)*

<sup>14</sup> Yesu aa guzltar mey-menġey saya, a ləvtar: «Ma da vəhwa adaw a bəla na, anġa letək anda ndaw masa-zleley ma daw a mələk. Masa fa da daw na, a zəлта ndəhay ma ka sləra anġa hay, a vəldatara zleley anġa amba a nəkfamar dey.

<sup>15</sup> A vəlar gabal temere zlam \* a ndaw pal, a vəlar gabal temere cew a ndaw lanġar, a vəlar gabal temere pal a ndaw lanġar saya. A vəldatara na, təde ta gədanġ nġa ndaw a, nġa ndaw a. Fa dəba ha, ta', a daw a mələk. <sup>16</sup> Ndaw masa ma hətey gabal temere zlam heyey na, a daw wure wure nġene, a kada filaw ta dala ha. A hətey gabal temere zlam mekele a dey a. <sup>17</sup> Ndaw masa ma hətey gabal temere cew heyey na, a ka kəne may. A hətey gabal temere cew a dey a. <sup>18</sup> Ama ndaw masa ma hətey gabal temere pal na, a daw ta', a zlədey vəgeɖ, a bəda dala nġa bay anġa ha a hwaɖ a.

<sup>19</sup> «Menġey ga fa dəba ha, bay nġa ndəhay ma ka sləra ha, a vəhwa da mələk a, ta', aa cəɖdata da ray dala ha heyey. <sup>20</sup> Ndaw masa ma hətey gabal temere zlam heyey, a nġəchey a cakay a, ta gabal temere zlam mekele da dey a, ta', a ləvar: "Bay adaw, kah ta vəlya gabal temere zlam la. Nəka, yah ma hətey gabal temere zlam mekele la a dey a." <sup>21</sup> Bay anġa, a mbəɖdara, a ləvar: "Maaya, kah ndaw ma ka sləra maaya ta cəveɖ e. Kah ma key sləra ta cəveɖ e la ta cek mecəhe. Ya da vəldatakawa cek adaw hay maaya ga asi

---

**25:14** 25.14-15 Mk 13.34 \* **25:15** 25.15 Gabal temere zlam, gabal temere cew, leŋ gabal temere pal mawuzlalakaya ta mey Gerek na, «*talaŋ zlam, talaŋ cew, talaŋ pal*». **25:15** 25.15 Rm 12.6 **25:19** 25.19 18.23

har akah. Sawa, njakwa cew e, sasəmkwa.”

<sup>22</sup> «Ndaw masa ma hətəy gabal temere cew, a ɲgəchey a cakay a may, ta’, a ləvar: “Bay adaw, ka ta vəlya gabal temere cew la, nəka, ya ta hətəy gabal temere cew mekele la a dey a.” <sup>23</sup> Bay anɲa ha, a ləvar: “Maaya, kah ndaw ma ka sləra maaya ta cəved e. Ka ta key sləra la ta cəved e ta cek mecəhe. Ya da vəldatakawa cek adaw hay maaya ga asi har akah. Sawa, njakwa cew e, sasəmkwa.”

<sup>24</sup> «Fa dəba ha, ndaw masa ma hətəy gabal temere pal heyey, a ɲgəchey a cakay a, ta’, a ləvar: “Bay adaw, ya səra, kah ndaw ma sərey dey-ceceh fa ndaw ba, ka ɲgəmey daw daa slam masa kah ma sləka ba, asaya, ka kawa cek da ley daa slam masa kah ma rəva ba. <sup>25</sup> Ya ta zlurey la ta kah, anda keɖe, ta’, ya daw ya bəda dala akah aa vəged. Dala ha anɲa keɖe, ehe təba cek akah.” <sup>26</sup> Bay anɲa ha, a mbəɖdara, a ləvar: “Kah ndaw ma ka sləra maaya ba, masa-mayad! Ka səra yah ndaw ma ɲgəmey daw daa slam masa yah ma sləka ba, asaya, ya kawa cek da ley daa slam masa yah ma rəva ba, <sup>27</sup> anda keɖe, ka gwa ka vəlda dala adaw a har ndəhay amba daa mavəhwa adaw keɖe na, a vəhdamiwa dala ha ta yam a, ba daw?”

<sup>28</sup> «Da ray ɲgene, ndaw masa-zleley a, a ləvtar a ndəhay ma ka sləra anɲa hay mekele: “Təbmara gabal temere he, vəldamara a ndaw masa ma hətəy gabal temere zlam a dey a heyey. <sup>29</sup> Sərmara, ndaw masa cek anɲa daha, a da vəlmar a dey a, ama ndaw masa cek anɲa kuset



kədəy na, a da təbmara kwa masa kuset kədəy a ŋgene. <sup>30</sup> Ndaw ma ka sləra kedde na, anɗa ndaw masa mayad ŋga tede, hazakadamara aa ambaw, aa ləvaŋ. Fetede, a da təway, asaya, a daa pədəy sler.”»

*Mey da ray mendəvey ŋga bəla*

<sup>31</sup> Yesu aa guzltar a gula anɗa hay saya a ləvtar: «Masa yah, \*Bəz ŋga Ndaw, ma da vəhwa daa mewedey adaw na, ya da samawa ta maslaŋ hay ŋga Gazlavay tabiya da vad. Ya da njeɗ aa slam adaw menjeɗ maaya ŋga key sariya.

<sup>32</sup> Səkway hay tabiya da bəla, a da kusam fa meɗ adaw. Ya da ŋgəwta ndəhay maaya ta maaya ba hay wal wal anda ndaw-mecəkwer ma ŋgəweɗ təbaŋ hay ta dahway. <sup>33</sup> Ya da pata ndəhay maaya ta har-zəmay, ndəhay maaya ba ta har-gula.

<sup>34</sup> «Fa dəba ha, yah bay, ya da ləvtar a ndəhay ta har-zəmay: “Akwar ndəhay masa Papay ma pəskwar meɗ, slam madiykaya ŋgada akwar daha dəga mezley ŋga bəla, samawa, nɗakwa bama ta Gazlavay ŋga səmataw, <sup>35</sup> maja may ta caya la, akwar ta vəlmaya cek mezəmey la, yam ta kaya la, akwar ta vəlmaya yam ŋga sey la, ya ta daw la fa akwar anda ndaw-məlak, akwar ta təbmaya la a way akwar hay, <sup>36</sup> zana fa vaw adaw daa ba, akwar ta vəlmaya zana la. Vaw ta caya la, akwar ta samawa la ŋga nəkmaya. Yah daa fərsəne, akwar ta samawa la ŋga nəkmaya.”

**25:29** 25.29 13.12; Mk 4.25; Lk 8.18; 19.26      **25:30** 25.30 8.12

**25:31** 25.31 Mew 33.2; Zak 14.5; Mt 16.27; 19.28; 1Tes 3.13; Jud 14      **25:31** 25.31-46 16.27      **25:35** 25.35-36 Iz 58.7

<sup>37</sup> «Da ray ɲgene, ndəhay maaya heyey, a da mbəɸdamiwa, a ləvmaya: “Bay mahura, ya hətmaka may fa caka, ta’, ya vəlmaka cek mezəmey na, ɲga vara? Ya hətmaka yam fa kaka, ta’, ya vəlmaka yam ɲga sey na, ɲga vara? <sup>38</sup> Ya hətmaka kah ndaw-mələk, ta’, ya təbmaka a way ala hay na, ɲga vara? Da daa ba, ya hətmaka zana fa vaw daa ba, ta’, ya vəlmaka zana na, ɲga vara? <sup>39</sup> Asaya, ya hətmaka vaw fa caka, da daa ba, kah daa fərsəne, ta’, ya nəkmakawa na, ɲga vara?”

<sup>40</sup> «Yah, bay, ya da mbəɸdatara, ya ləvtar: “Ya fa ləvkwar fara fara, cek hay tabiya masa akwar ma kamara ɲgada kwa waawa, kwa ɲgada ndəhay mecəhe hay dasi ndəhay aɸaw hay keɸe, ka kamara ɲgene na, ɲgada yah may.”

<sup>41</sup> «Fa dəba ha, ya daa guzltar a ndəhay ta har-gula, ya ləvtar: “Akwar masa Bay Gazlavay ta nəskwar sem, ɲgəcham la da cakay aɸaw. Diyam aa awaw mendəvey ba maɸiykaya ɲgada bay-malula ta maslan ɲga hay. <sup>42</sup> Maja may ta caya la, ama akwar ta vəlmaya cek mezəmey daa ba. Yam ta kaya la, ama akwar ta vəlmaya yam ɲga sey daa ba. <sup>43</sup> Ya ta daw la fa akwar anda ndaw-mələk, ama akwar ta təbmaya a way akwar hay daa ba. Zana fa vaw aɸaw daa ba, ama akwar ta vəlmaya zana daa ba. Vaw ta caya la, asaya, yah daa fərsəne, ama akwar ta samawa ɲga nəkmaya daa ba.”

<sup>44</sup> «Da ray ɲgene, a da mbəɸdamiwa, a

lœvmaya: “Bay mahura, ya hœtmaka may fa caka, da daa ba, yam fa kaka na, nga vara? Ya hœtmaka kah ndaw-mœlak, da daa ba, zana fa vaw akah daa ba na, nga vara? Asaya, ya hœtmaka vaw fa caka, da daa ba, kah daa fœrsœne masa ala ta jœnmaka daa ba na, nga vara?”

<sup>45</sup> «Da ray ŋgene, ya da mbœdɔdatara, ya lœvtar: “Ya fa lœvkwatara fara fara, cek hay masa akwar ma gœmam ŋga kamara ŋgada kwa waawa, kwa ŋgada ndœhay mecœhe hay dasi ndœhay adaw hay kedœ ba na, ka gœmam ŋga kamara ba ŋgene na, ara ŋgada yah may.”

<sup>46</sup> «Yaw, ndœhay maaya ba hay anda ŋgene na, a da sœram banay ŋga sœrmataw, ama ndœhay masa maaya fa Gazlavay na, a da hœtam heter mendœvey ba.»

## 26

*Mahura hay nga Jœwif hay a slam yawa nga kœdœy Yesu vagay*

*(Mark 14.1, 2; Luk 22.1, 2; Jan 11.45-53)*

<sup>1</sup> Masa Yesu ma ndœvda meesœrkedey hay a kedœ tabiya cay na, ta', aa guzltar a gula anŋa hay, a lœvtar: <sup>2</sup> «Ka sœmara, mendœrey dœr cew ŋga wusey fa gwagway ŋga \*Pak, ba diya? Ta pas a ŋgene, a da kœrzamaya yah, \*Bœz ŋga Ndaw, a da dœrmaya fa hwadam mazlangalakaya.»

<sup>3</sup> Ta pas a ŋgene, \*bay-ray hay ŋga ndœhay ma ka kwakwas ŋga Gazlavay ta mahura hay

nga \*Jəwif hay a kusam a way Kayif, \*ndaw mahura da ray ndəhay ma ka kwakwas nga Gazlavay cəpa. <sup>4</sup> A slam yawa da wuzlah ata amba a kərzamara Yesu ta mayal a nga kədəy vagay. <sup>5</sup> Aa guzlam, a ləvam: «Ya gwakwa nga kərzakwa daa gwagway kefe ba, maja ndəhay a da yam mey.»

*Ngwas a mbədar bərdey fa ray nga Yesu  
(Mark 14.3-9; Jan 12.1-8)*

<sup>6</sup> Daa ngene, Yesu aa da Betani da way \*Simanjw, ndaw masa aa ma mbəlda daa maasəkula. <sup>7</sup> Masa Yesu a, fa zəmey dəf na, nɣwas daha a nɣəchey a cakay a ta kwalaba nga aɣɣwa maavərkwakaya mezəley «\*albaatəra». Kwalaba ha marəhkaya ta bərdey mezey maaya ma hədkey ba. Ta', a mbəddara bərdey a fa ray nga Yesu. <sup>8</sup> Masa \*gula hay nga Yesu ma hətmar na, a cam mevel, a ləvam da wuzlah ata: «A nəsa bərdey a kefe nga tede na, maja me? <sup>9</sup> Anja a hədkada na, a gwa nga hətey dala ga. Fa dəba ha a wunkatara dala ha a masa-viya hay, ba daw?»

<sup>10</sup> Yesu a sərə mewulkey ata ha, ta', aa guzlar, a ləvtar: «Ka həbmar ray a nɣwas aha na, maja me? Sləra masa aɣɣa ma kayawa kefe na, aɣɣa maaya, <sup>11</sup> maja ndəhay masa-viya hay na, mandaw mandaw akwar bama. Ama yah na, akwar fa da hətmaya nga njeɣ mandaw mandaw ta akwar daa ba. <sup>12</sup> Nɣwas aha, a mbədda bərdey fa vaw adaw na, a key ngene, a diyawa vaw adaw nɣadaa cəvay. <sup>13</sup> Ya fa ləvkwar fara

fara, kwa daa wura daa wura da bēla tabiya, ndəhay ma da wuzdamara \*Mey-maaya-mawiya na, a kadamara cek masa ɲgwas a ma ka keɗe la may, amba ndəhay a sərɗadamara ɲgwas aha.»

*Juda a vəlda Yesu a har masa-gəra anɲa hay  
(Mark 14.10, 11; Luk 22.3-6)*

<sup>14</sup> Fa dēɓa ha, ndaw pal da wuzlah \*gula hay ɲga Yesu kuraw a ray a cew mezəley Juda Iskariyawt, a daw fa \*bay-ray hay ɲga ndəhay ma ka kwakwas ɲga Gazlavay. <sup>15</sup> Ta', aa guzltar, a ləvtar: «Da ya ta vəldakwara Yesu a har akwar la na, ka da vəlmaya me?» Ta', a məslmar bərey hay kwakwar maakar ɲga dala, a vəldamara.

<sup>16</sup> Dəga ta pas a ɲgene, Juda a daw a səpey cəved amba a kərzatara Yesu, a vəldatara.

*Yesu a zəmam ɗaf ɲga gwagway ɲga Pak ta gula anɲa hay*

*(Mark 14.12-21; Luk 22.7-13, 21-23; Jan 13.21-30)*

<sup>17</sup> Ta ɗar ɲgeeme ɲga \*gwagway ɲga peɲ manjar cek ma həsla da hwad a na, \*gula hay ɲga Yesu, a ɲgəcham a cakay a, a ləvmar: «Ka wuɗey ya diyam, ya ɗiymərwa slam amba ya zəmkwa ɗaf ɲga gwagway ɲga \*Pak na, dama?»

<sup>18</sup> Yesu a mbəɗɗatara, a ləvtar: «Diyam aa berney ɲga \*Jeruzelem fa ndaw daha. Ka ləvmar na, “Bay ala a ləvey: Dar aɗaw gweegwe cay a wuswa. Ya wuɗey ɲga key gwagway ɲga Pak ta gula aɗaw hay na, da way akah.”» <sup>19</sup> Gula hay ɲga Yesu heyey a kamara anda Yesu ma ləvtar.

Anda keɗe, a ɗiymara cek nga gwagway nga Pak a ɗɓa.

<sup>20</sup> Taa kwad a ngene, Yesu a njam ta gula anga hay kuraw a ray a cew nga zɔmey ɗaf nga gwagway a. <sup>21</sup> Daa masa ata fa zɔmamara ɗaf a na, Yesu aa guzltar, a lɔvtar: «Ya fa lɔvkwar fara fara, ndaw pal da wuzlah akwar a vɔɗɗaya la a har ndɔhay nga kɔɗmaya vagay.» <sup>22</sup> Mey a keɗe a mɔctar vaw kwa ara mey ba a gula anga hay a. Da ray ngene, aa cɔɗɗamara Yesu pal pal, a lɔvam: «Bay Mahura, ara yah ma da vɔɗɗaka ba, ba diya?»

<sup>23</sup> Yesu a mbɔɗɗatara, a lɔvtar: «Ma da vɔɗɗaya a har ndɔhay nga kɔɗmaya vagay na, ara ndaw masa alɔkwa fa zɔmkwa ɗaf bama daa slam a keɗe. <sup>24</sup> Ahaw, yah, \*Bɔz nga Ndaw na, ya mɔcey la anda mey mawuzlalakaya daa ɗerewel nga Gazlavay ma lɔvey. Ama banay a sawa la a ray ndaw ma da vɔɗɗaya a har ndɔhay nga kɔɗmaya vagay a. Ngada ndaw aha na, ngama ta yamɔrwa daa ba sɔlak.»

<sup>25</sup> Juda, ndaw ma da vɔɗɗa Yesu a har ndɔhay nga kɔɗmara vagay heyey aa cɔɗɗa Yesu may, a lɔvar: «Bay aɗaw, ara yah ma da vɔɗɗaka daw?» Yesu a mbɔɗɗara, a lɔvar: «Ka fa kada ta mey akah ngene na, kwariya?»

*Mey da ray mezɔmey cek nga madagway-dakw nga Bay Mahura*

*(Mark 14.22-26; Luk 22.14-20; 1 Kwarinti hay 11.23-25)*

<sup>26</sup> Masa ata fa zəmam dəf ŋga gwagway a na, Yesu leŋ! a ley peŋ. A kar suse a Gazlavay, a wunka, ta', a vədatara a gula anŋa hay, a ləvtar: «Ehe, təbmara, zəmamara. Kede he, ara vaw adaw.» <sup>27</sup> Fa dəba ha, leŋ! a ley vəley ta cek mesey da hwaɗ a, a kar suse a Gazlavay saya. Ta', a vədatara, a ləvtar: «Ehe, samara akwar cəpa. <sup>28</sup> Kede he, ara mambaz adaw. Ta fa mambaz a, Gazlavay a jəwey mey mawiya ta ndəhay anŋa hay. Mambaz a, a da mbəɗwa maja ndəhay ga amba Gazlavay a mbəkdatara mebərey ata hay. <sup>29</sup> Ya fa ləvkwar, dəga wure kede ya fa da sey yam ŋga babəza ŋga wudez maɗəckaya anda kede daa saba səlak. Ya da sey na, si cek mawiya mekele ta pas masa aləkwa bama daa slam masa Papay fa wey da ray ndəhay da vad.» <sup>30</sup> Ta', a zlam walay ŋga gwagway daa \*Pəsam hay. Fa dəba ha, a sləkdam, a diyam aa Anŋwa ŋga \*Awliviye.

*Piyer a ləvey fa da mbəkda Yesu daa ba səlak  
(Mark 14.27-31; Luk 22.31-34; Jan 13.36-38)*

<sup>31</sup> Yesu aa guzltar a gula anŋa hay, a ləvtar: «Dasi tavad kede akwar cəpa ka da mbəkdamaya anda mawuzlalakaya daa ɗerewel ŋga Gazlavay, ma ləvey: “Ya kəɗa ndaw-mecəkwer la vagay. Təbaŋ hay masa ma səkəram daa slam a may, aa kwacam ray la pal pal.” <sup>32</sup> Ama da yah ta sləkɗawa cay daa meməcey na, ya daw la teesɗ da ray akwar aa

---

**26:26** 26.26-28 1Kwr 10.16    **26:28** 26.28 Mab 24.8; Jer 31.31; Heb 7.22; 9.15-20    **26:30** 26.30 Lk 22.39; Jan 18.1    **26:31** 26.31 Zak 13.7; Mt 26.56; Jan 16.32

hwayak nga \*Galile. Ka da hɔtfamaya fetede.»

<sup>33</sup> \*Piyer a mbɔɔɔɔɔɔ, a lɔvar: «Kwa ndɔhay cɔpa a mbɔkdamaka, ama yah na, ya fa da mbɔkdaka daa ba sɔlak.» <sup>34</sup> Yesu a mbɔɔɔɔɔɔ, a lɔvar: «Ya fa lɔvka fara fara, dasi tavad keɔe, wuskwaa gwagwalak a da cey ɔay na, ka ta lɔvey cay dey maakar, ka sɔrya ba, ka sɔrya ba.»

<sup>35</sup> Ama Piyer a mbɔɔɔɔɔɔ, a lɔvar: «Kwa da fa da kɔɔmaka vagay na, nga kɔɔmandakwar cew e, ya fa da lɔvey ya sɔrka ba na, daa ba sɔlak.» Gula hay nga Yesu siya a lɔvam kɔne may.

*Yesu a ɔɔrey ɔangay a Gazlavay da Gecemene  
(Mark 14.32-42; Luk 22.39-46)*

<sup>36</sup> Fa ɔɔba ha, Yesu a wusam ta gula aɔga hay aa slam daha mezɔley Gecemene. Ta', aa guzltar a gula aɔga hay, a lɔvtar: «Njam fede, yah na, ya daw la fataɔay nga ɔɔrwa ɔangay a Gazlavay.»

<sup>37</sup> Ta', a ngɔlta ata \*Piyer ta bɔza hay nga Zebede cewete. Wure ngene, mevel aɔga a ɔɔsley, aa lɔkey maja banay ma da sawa a ray a.

<sup>38</sup> Anda keɔe, aa guzltar, a lɔvtar: «Mewulkey fa da kɔɔya vagay. Njam fede, zazɔkakwa, ka da nam ba.» <sup>39</sup> Ta', a ngɔchey nekɔɔey fa mey, a ney ta hwaɔ ta hwaɔ, ray dar! a hwayak, a ɔɔrey ɔangay, a lɔvey: «Papay, da a key ta key na, ngɔchada banay ma da sawa a ray aɔaw keɔe la. Ta kɔne he cɔpa na, key anda kah ma wuɔey, ba na, anda yah ma wuɔey ba.»

---

**26:32** 26.32 28.7, 16    **26:34** 26.34 26.75    **26:34** 26.34-35  
Lk 22.33-34; Jan 13.36-38    **26:36** 26.36-46 Lk 5.16; Heb 5.7-8  
**26:39** 26.39 6.10; 20.22; Jan 18.11; Heb 10.9



<sup>40</sup> Cay, ta', a vøhwa fa gula anğa hay maakar heyey, a høtfatar manatakaya daa đar. Aa guzlar a Piyer, a løvar: «Haya! Ka gwamara nğaa zøkam ta yah kwa ler pal ba gway daw? <sup>41</sup> Zazøkam, ka da nam ba, døram danğay a Gazlavay nğa jønkwat amba cek a batakwar nğa key mebørey ba. Mevel akwar na, a wudfey nğa key cek maaya, ama vaw akwar na, anğa ta bøle.»

<sup>42</sup> Yesu a nğøchey nğa dey cew saya, ta', a dørey danğay, a løvey: «Papay, da ka wudfey nğa nğøchada banay a keđe dørey ta yah ba, si a sawa a ray adaw cøma na, ka anda kah ma wudfey.»

<sup>43</sup> Fa døba ha, a vøhwa fa gula anğa hay maakar heyey saya, a høtfatar manatakaya cønğa maja đar fa latar mey kalah. <sup>44</sup> Anda keđe, Yesu ta', a mbøkdata, a nğøchey saya, a dørey danğay nğa dey maakar, aa guzley mey letek anda aa ma dørey danğay nğa dey cew heyey.

<sup>45</sup> Fa døba ha ta', a vøhwa fa gula anğa hay heyey saya, a løvtar: «Haa wure keđe, akwar fa nam, fa møskam vaw cønğa daw? Ehe đar a ta wuswa cay amba a vøldamaya, yah, \*Bøz nğa Ndaw, a har ndøhay ta mebørey. <sup>46</sup> Nøkmaranda ndaw ma da vøldaya a har ndøhay nğa kødfey vagay fa sawa katay. Lacam, nakwa ta cadakwa ray.»

*A kørzamara Yesu  
(Mark 14.43-50; Luk 22.47-53; Jan 18.3-12)*

<sup>47</sup> Masa Yesu ta ndøvda meeguzley daa ba aran na, Juda, ndaw pal dasi gula anğa hay kuraw a ray a cew heyey, a wuswa. Juda ha a samawa na, ta ndøhay ga ta dølawa\* hay da cakay, ta zlanday hay da har. Ma slørdamatørwa ndøhay a na, ara bay-ray hay nğa ndøhay ma ka kwakwas ta mahura hay nğa Jøwif hay. <sup>48</sup> Juda, ndaw masa ma da vølda Yesu a har ndøhay, ta wuswa fa Yesu daa ba aran na, aa guzltar a ndøhay a, a løvtar: «Ndaw masa yah ma da car har anda mandala adaw fara fara na, ara anğa, kørzamara.» <sup>49</sup> Masa Juda ma wusey la gweegwe ta Yesu na, wure wure ngene, a nğøchey a cakay a, a løvar: «Bay adaw, zay daw?» Ta', a car har anda aa ma løvey heyey. <sup>50</sup> Yesu a mbøfdara, a løvar: «Jam adaw, ka sløra masa kah ma wufey nğa ka.»

Anda kedø, ndøhay ma samawa ta ata Juda heyey a nğøcham fa Yesu a, ta', a kørzamara. <sup>51</sup> Ndaw pal da wuzlah gula anğa hay masa da cakay a, a mødørwa dølawa anğa, a nğøma, cørah! a cørha slømay nğa madørlam nğa ndaw mahura da ray ndøhay ma ka kwakwas. <sup>52</sup> Maja ngene, Yesu aa guzlar, a løvar: «Mada dølawa akah aa way a maja ndøhay ma kødam vaw ta dølawa na, ara dølawa a ma da kødta vagay. <sup>53</sup> Ka søra, da ya wufey na, ya gwa nğaa cøfda Papay nğa slørya maslan anğa hay ga a føna

---

\* **26:47** 26.47 dølawa: maslalam    **26:52** 26.52 MC 9.6

gabal kuraw a ray a cew † nga jønya, ba daw?  
<sup>54</sup> Ama da ya ka køne na, mey nga Gazlavay mawuzlalakaya a da key fara fara na, kwara døba wura? Maja mey a mawuzlalakaya, a løyey si cek aha a key køne.»

<sup>55</sup> Fa døba ha, Yesu aa guzltar a ndøhay makustakaya fetede, a løvtar: «Ka samawa nga kørzamaya ta dølawa, ta zlanday faa har faa har anda yah ndaw-mayal na, maja me? Mandaw mandaw yah manjakaya daa \*Way-mekey-kwakwas nga Gazlavay, ya faa sèrkadata ndøhay, ama ka ta kørzamaya daa ba.

<sup>56</sup> Ama daa mey nga Gazlavay mawuzlalakaya na, ndøhay ma tøla mey nga Gazlavay taa guzlam la da ray cek ma da key da ray adaw. Ara maja ñgene si cek aha a key cøpa.»

Fa døba ha, gula aña hay cøpa a zluram, a mbøkdamara Yesu, a hwam.

*Yesu fa mey nga ndøhay ma sla yawa nga Jøwif hay*

*(Mark 14.53-65; Luk 22.54, 55, 63-71; Jan 18.13, 14, 19-24)*

<sup>57</sup> Ndøhay ma kørzamara Yesu heyey, ta', a handamara a way Kayif, \*ndaw mahura da ray ndøhay ma ka kwakwas nga Gazlavay. \*Ndøhay maa sèrkada kwakwas nga Mawiz ta mahura hay nga \*Jøwif hay makustakaya fetede.

<sup>58</sup> \*Piyer na, fa søpa Yesu ta meedøreñ e. A daw

---

† **26:53** 26.53 Yesu a wufey nga løyey Papaha, Bay Gazlavay, a gwa nga slørar maslan hay ga, a sløfey ba. A wa ta sewje hay nga Rawm ma kusam gabal maakwaw, gabal maakwaw, slam 12.

**26:55** 26.55 Lk 19.47     **26:56** 26.56 Mt 26.31; Lk 24.46

haa a mbøzey a palah-way nga ndaw mahura da ray ndøhay ma ka kwakwas nga Gazlavay heyey. Ta', a njam ta ndøhay ma jøða way a, amba a nøka cek masa ata ma da kamar a Yesu.

<sup>59</sup> \*Bay-ray hay nga ndøhay ma ka kwakwas nga Gazlavay ta ndøhay mahura hay mekele masa ma sla yawa nga Jøwif hay tabiya, a søpam dabaray nga mbørzlafamar a ray Yesu amba a køðmara vagay. <sup>60</sup> Kwa ndøhay ga ta mbørzlafamar la a ray Yesu, ama ta ñgene he cøpa, ta høtam mey tøðe nga køðmara vagay daa ba. Fa døba ha na, ndøhay cew daha a samawa fa mey ata, a mbørzlafamar a ray a, a løvam: <sup>61</sup> «Ndaw keðe a løvey: “Ya gwa nga bøzla \*Way-mekey-kwakwas nga Gazlavay, ðar maakar na, ya løma la aa slam a.”» <sup>62</sup> \*Ndaw mahura da ray ndøhay ma ka kwakwas nga Gazlavay a sløkðey, aa guzlar a Yesu, a løvar: «Ka mbøðdatara a ndøhay maa guzlam da ray akah kaa ba gway daw?» <sup>63</sup> Ama Yesu manjakaya teete. Ta', ndaw mahura da ray ndøhay ma ka kwakwas nga Gazlavay heyey a løvar saya: «Ya faa cøðfaka ta mezøley nga Gazlavay masa aa ta dey, \*ndaw masa Gazlavay ma wala nga løhdata ndøhay heyey na, ara kah daw? Wuzdiwa! Kah na, Bøzey nga Gazlavay daw? Mbedey amba ka kadiwa fara fara.» <sup>64</sup> Yesu a mbøðdara, a løvar: «Ka fa kada ta mey akah ñgene na, kwariya? Ama ya fa løvkwar, døga wure keðe, ka da høtmaya yah, \*Bøz nga Ndaw, manjakaya ta har-

---

**26:61** 26.61 27.40; Jan 2.19; SNM 6.14    **26:63** 26.63 manjakaya teete: Iz 53.7; Mt 27.12-14; Bøzey nga Gazlavay: Mt 14.33; 27.40, 43; Lk 22.70

zəmay nga Bay Gazlavay Mawaca-waca. Asaya, ka hətmaya la ya fa sawa da ray mekwtene da vad.» <sup>65</sup> Maja ngene, ndaw mahura ha ngar! ngar! a ngərta zana anğa hay, aa guzley, a ləvey: «'As! 'As! Ta pa ray anğa sem nga Gazlavay, akwar ta cəndamara la, ba diya? Wure keđe, kwa ya səpkwa ndaw ngaa guzldakwar da ray a saba. <sup>66</sup> Kaa wure keđe, ka wulkam kwara?» Ndəhay da cakay a, a mbəddamara, a ləvmar: «Anğa ta key mebərey sem, si mekədey anğa vagay.»

<sup>67</sup> Ndəhay siya a cərmar meesleḅ aa dey, a dəvmar mekədey, siya hay may, a vəlmar matapa-har ‡, <sup>68</sup> a ləvmar: «Da kah \*Kəriste na, sərə ma kəḏka keđe na, wa? Wuzdandara cey!»

*Piyer a ləvey a sərə Yesu ba*

*(Mark 14.66-72; Luk 22.56-62; Jan 18.15-18, 25-*

*27)*

<sup>69</sup> Daa ngene, \*Piyer manjakaya da palahway nga ndaw mahura ma ka kwakwas nga Gazlavay heyey. Dam ma ka sləra fetede daha, a ngəchawa a cakay a, a ləvar: «Kah na, gula nga Yesu, ndaw \*Galile may, ba diya?» <sup>70</sup> Ama Piyer a cada mey fa mey nga ndəhay tabiya, a ləvey: «Kay! Ya sərə mey masa kah ma wudey ngaa guzley ba!» <sup>71</sup> Fa dəḅa ha, ta', a daw fa mey-mbew nga way a. Dam ma ka sləra mekele

**26:64** 26.64 Dan 7.13; Mt 22.44; 24.30; Mk 13.26; Lk 21.27

**26:65** 26.65 a ngərta zana anğa hay: Mesl 14.6; Es 9.3; Ta pa ray anğa sem nga Gazlavay: Lev 24.16; Jan 19.7 ‡ **26:67** 26.67 matapa-har: maarawa **26:67** 26.67 Iz 50.6; 53.5 **26:68** 26.68 21.11

daha saya, a hëtar Piyer, ta', aa guzltar a ndøhay fetede, a løvtar: «Ndaw kede ara ndaw nga Yesu, ndaw \*Nezeret.» <sup>72</sup> Piyer a cada mey saya, a løvey: «Ya fa mbedey, fara fara, ya sëra ndaw a ba.»

<sup>73</sup> Fa døba ha nekødey saya, ndøhay masa fetede a ngøcham a cakay Piyer, a løvmar: «Fara fara kah na, kah ndaw da wuzlah ndøhay anga hay maja meeguzley akah kaa na, anda ndaw daa hwayak anga.» <sup>74</sup> Da ray ngene, Piyer ta', a løvtar: «Ya fa mbedey, fara fara ya sëra ndaw a ba. Da ya mbørzley na, Gazlavay nga mbødya ray!» Wure wure ngene, gwagwalak ta', a cey day. <sup>75</sup> Piyer a sørfada mey masa Yesu maa guzlar zleezle heyey døba. Mey a, a løvey: «Wuskwaa gwagwalak a da cey day na, ka ta løvey cay dey maakar ka sørya ba, ka sørya ba.» Piyer ta', a bawa aa ambaw, a tøway ga, a zøley marava.

## 27

*A handamara Yesu fa mey nga Bay Pilat  
(Mark 15.1; Luk 23.1, 2; Jan 18.28-32)*

<sup>1</sup> Pørek pørek, \*bay-ray hay nga ndøhay ma ka kwakwas nga Gazlavay tabiya, lej mahura hay nga \*Jøwif hay a slam yawa daa slam a nga kødey Yesu vagay. <sup>2</sup> A jøwmara, a handamara fa Pilat, ndaw Rawma ma wa hwayak ata.

*Mey da ray memøcey nga Juda  
(SNM 1.18, 19)*

<sup>3</sup> Juda, ndaw ma vølda Yesu asi har nga masa-gøra anga hay heyey, a cønda fa da kødmara Yesu vagay na, a zøley marava. Da ray ngene, a handatara børey hay kwakwar maakar nga dala heyey a \*bay-ray hay nga ndøhay ma ka kwakwas nga Gazlavay ta mahura hay nga \*Jøwif hay. <sup>4</sup> A løvtar: «Ya ta key mebørey la maja yah ma vølda ndaw masa ta zay da mey nga køfey vagay.» Ama ndøhay a, a mbøðdamara, a løvmar: «Ijgene na, ara mey akah ba na! Ma høtfandar me?» <sup>5</sup> Da ray ngene, aa kwacada dala heyey aa \*Way-mekey-kwakwas nga Gazlavay. Ta', a daw a løwa ray anga, pam! a møcey.

<sup>6</sup> \*Bay-ray hay nga ndøhay ma ka kwakwas nga Gazlavay heyey, a gødmamara dala ha. Aa guzlam, a løvam: «Kwakwas aløkwa, a vøldakwar cøved amba dala keðe, a cømey ta zleley mavøldakaya nga key sløra daa Way-mekey-kwakwas nga Gazlavay ba, maja ara dala nga mekøfey ndaw vagay.» <sup>7</sup> A slam yawa da wuzlah ata da ray dala ha. Ta', a høðkam ley nga ndaw melømey mangayak daha ta dala ha. A tørdamara ley a nga cøvay nga mølak hay ma møcam fetede. <sup>8</sup> Ara maja ata ma høðkamara ley a ngene ta dala nga ray nga ndaw na, haa wure keðe, ndøhay fa zølmara ley a: «ley nga mambaz.» <sup>9</sup> Cek aha, ta key la anda Jeremey, \*ndaw ma tøla mey nga Gazlavay maa guzley zleezle, a løvey: «A lam børey hay kwakwar maakar nga dala masa ndøhay da

wuzlah ndəhay \*Israyel hay ma pamara təde fa ray nga ndaw. <sup>10</sup> A vəldamara dala ha nga hədfkey ley nga ndaw meləmey manğayak anda Bay Gazlavay ma ləvya.»

*Yesu fa mey nga Bay Pilat*

*(Mark 15.2-15; Luk 23.2-5, 13-25; Jan 18.28-19.16)*

<sup>11</sup> A lacadamara Yesu fa mey nga Bay Pilat. Bay a, aa cəfdə, a ləvar: «Kah na, bay nga \*Jəwif hay fara daw?» Yesu a mbəddara, a ləvar: «Anda kah ma ləvey.»

<sup>12</sup> Daa masa \*bay-ray hay nga ndəhay ma ka kwakwas nga Gazlavay leŋ mahura hay nga Jəwif hay heyey faa dədfamar mey na, kwa Yesu ta mbəddatara daa ba. <sup>13</sup> Da ray ŋgene, Pilat aa guzlar, a ləvar: «Ka fa cənda mey hay maaya ba cəpa masa ata maa guzldamara da ray akah kede, ba diya?» <sup>14</sup> Kwa Yesu a mbəddara ba səlak. Anda kede, Bay Pilat a rəzley ga maja.

<sup>15</sup> Fa mevey a, fa mevey a, ta gwagway nga \*Pak na, bay daa hwayak a, fa pəskey ndaw pal daa fərsəne. A pəskey na, ndaw masa ndəhay makustakaya ma wudam. <sup>16</sup> Daa ŋgene, ndaw daa fərsəne daha, ndəhay tabiya a sərmara ara ndaw maaya ba. Mezəley nga ndaw a na, Yesu Barabas. <sup>17</sup> Pilat aa cəfdəta ndəhay makustakaya, a ləvtar: «Ka wudam ya pəskakwar na, Yesu Barabas daw, da daa ba, Yesu, ndaw masa ata ma zəlmara \*Kəriste heyey daw?» <sup>18</sup> Pilat a

---

**27:9** 27.9-10 Zak 11.12-13; Jer 32.8-9    **27:11** 27.11 2.2; 27.29, 37, 42; Mk 15.2, 9, 12, 18, 26, 32; Lk 23.3, 37-38; Jan 1.49; 12.13; 18.33, 39; 19.3, 15, 19, 21    **27:12** 27.12-14 Jan 19.9; Mt 26.63



sëra a handamërwa Yesu fa mey anğa na, maja sölën fa katar da ray Yesu a.

<sup>19</sup> Daa masa Bay Pilat manjakaya daa slam mekey sariya na, ngwas anğa, a slërwa fa anğa, a lëvar: «Ka da kar cek a ndaw ngene ba, maja ara ndaw masa ta zay da mey. Ya sëra maja dasi tavad keđe, mesëfney ta kaya la ta ndaw aha. Mesëfney a, ta laya mey la.»

<sup>20</sup> \*Bay-ray hay nga ndëhay ma ka kwakwas nga Gazlavay len mahura hay nga Jëwif hay heyey, a hëldamata ndëhay makustakaya heyey ngaa cëfdamara Bay Pilat amba a pëskatara Barabas, ama Yesu na, a këdmara vagay. <sup>21</sup> Bay Pilat aa cëfdata saya, a lëvtar: «Dasi ndëhay cew keđe na, ka wudam ya pëskakwar na, wa?» Ndëhay makustakaya ha, a mbëfdamara, a lëvmar: «Barabas! Barabas!» <sup>22</sup> Pilat aa cëfdata saya, a lëvtar: «Kaa Yesu ndaw ma zëlmara Këriste na, ya da kada na, kwara?» Ndëhay tabiya a mbëfdamara, a lëvmar: «Dëra fa hwadam mazlanğalakaya!» <sup>23</sup> Pilat aa cëfdata, a lëvtar: «Cek maaya ba masa anğa ma key na, wura?» Ama a wudam ta gëdan ta gëdan saya, a lëvam: «Dëra fa hwadam mazlanğalakaya!»

<sup>24</sup> Masa Pilat ma nëka kwa a gwa nga key meeme da ray mey a ba, asaya, masa anğa ma nëka ndëhay fa kam baazlam ta gëdan, ta gëdan na, ta', a kawa yam, a përa har anğa fa mey nga ndëhay makustakaya, a lëvtar: «Da akwar ta këdmara ndaw keđe la vagay na, mey adaw da hwad a daa ba. Ara mey akwar!» <sup>25</sup> Ndëhay

makustakaya tabiya a mbœfdamara, a lœvmar: «Anja ndaw a nga mœcey. Mey a nga sawa a ray ala ta bœz ala hay tabiya!» <sup>26</sup> Anda kedœ, ta', Pilat a pœskatara Barabas daa fœrsœne. Ama Yesu na, Pilat a lœvtar a sewje hay nga slœdmara ta laway, ta', a vœdatara amba a dœrmara fa hwadam mazlangalakaya.

*Sewje hay aa sanœoram a ray Yesu  
(Mark 15.16-20; Jan 19.2-3)*

<sup>27</sup> Fa dœba ha, sewje hay nga Bay Pilat, a handamara Yesu a palah-way nga Bay aha. Ta', a zœlmatœrwa sewje hay siya fetedœ tabiya a cakay a. <sup>28</sup> A cœkwmata zana anœa hay fa vaw, ta', a kœzlmara zana nga bay hay magaza. <sup>29</sup> Ta', a cam hatak, a padamar ray ta anœa anda gursaw nga bay. Fa dœba ha, a vœlmar dangwar nga bay hay a har-zœmay. A ragadam fa mey anœa, aa sanœoram a ray a, a lœvam: «Zay daw, bay nga \*Jœwif hay?»

<sup>30</sup> Fa dœba ha, a tœfmar meesleb fa vaw, ta', a tœbmara dangwar heyey, a kœdmara aa ray ta anœa. <sup>31</sup> Masa ata maa sanœoram cay a ray a na, a cœkwmara zana magaza heyey fa vaw, a kœzlmara zana anœa hay. Ta', a badamara daa berney a, a handamara nga dœrey fa hwadam.

*A dœrmara Yesu fa hwadam mazlangalakaya  
(Mark 15.21-32; Luk 23.26-43; Jan 19.17-27)*

<sup>32</sup> Masa sewje hay a, fa handamara Yesu na, a cam ray ta ndaw daa berney nga Siren daha,

mezøley \*Simanɿw. A tøkmar dɿay a Simanɿw heyey nga la hwadam mazlanɿgalakaya nga Yesu a. <sup>33</sup> A wusam aa slam mezøley Gwalgwata, anda meløvey, «slam anda tetesl nga ray nga ndaw.» <sup>34</sup> Fetede, a vølmar wuzam majahadɿakaya ta slalak meedøwek e. Yesu aa cøka, ama a gømey nga sa ba.

<sup>35</sup> Ta', a dørmara fa hwadam mazlanɿgalakaya heyey. Fa døba ha, a kødam caca nga wunkey zana anɿga hay. <sup>36</sup> Ta', a njam fetede nga jødmara. <sup>37</sup> A wuzlalam mey fa hwadam, a sløpmara ta da ray Yesu fa hwadam mazlanɿgalakaya. Ara mey masa ata ma kødmara vagay maja. Mey a, a løvey: «Ndaw kefe na, ara Yesu, bay nga \*Jøwif hay.» <sup>38</sup> Daa slam masa ata ma dørmara Yesu a na, ta døram mayal hay cew la a cakay a, pal ta har-zømay, langar ta har-gula.

<sup>39</sup> Ndøhay ma diyam taa slam a nɿgene, aa sanɿgøram a ray a, a wusam ray, a cødmara, <sup>40</sup> a løvmar: «Kah na, ndaw ma wudfey nga bøzla \*Way-mekey-kwakwas nga Gazlavay amba ka løma mekele daa dɿar maakar heyey, ba diya? Da kah Bøzey nga Gazlavay na, bønɿgawa fa hwadam a nɿgene a hwayak, løhda ray akah, døba taw!» <sup>41</sup> Asaya, \*bay-ray hay nga ndøhay ma ka kwakwas nga Gazlavay ta \*ndøhay maa sørkada kwakwas nga Mawiz len mahura hay nga Jøwif hay aa sanɿgørfamar, a løvam: <sup>42</sup> «A løhdata ndøhay siya hay na, kaa ray anɿga na,

a gwa nga ləhda, ba daw? Da anga Bay nga \*Israyel hay na, anja nga bərnəgawa fa hwadam a wure keɗe dəba taw! Da ta bərnəgawa sem na, nge, ya təbkwa mey anga. <sup>43</sup> A pa Gazlavay nga ndaw anga fara fara, asaya, taa guzley la, a ləvey: “Yah na, Bəzey nga Gazlavay.” Yaw, da Gazlavay fa wudfa na, nga ləhda wure keɗe dəba taw!» <sup>44</sup> Mayal hay cew masa madərtakaya da cakay a heyey na, a cəɗmara kəne may.

*Meməcey nga Yesu*

*(Mark 15.33-41; Luk 23.44-49; Jan 19.28-30)*

<sup>45</sup> Ta wuzlah-pas, ləvan a key daa hwayak cəpa. Ləvan a, a nje, haa bərey maakar nga pas ngaa kwad. <sup>46</sup> Ta bərey maakar a na, Yesu a wudey ta gədan, a ləvey ta mey ata: «*Eli, Eli, lema sabaktani?*» Anda meləvey: «Gazlavay adaw, Gazlavay adaw, ka mbəkdaya na, maja me?» <sup>47</sup> Ndəhay siya fetede, a cəndamara mewudey nga Yesu a na, a ləvam: «Nəka, anga fa zəla \*Eli, \*ndaw ma təla mey nga Gazlavay zleezle!» <sup>48</sup> Ndaw pal da wuzlah ata, ta', a hway nga jəhwəbey cek anda gagəmay aa yam nga babəza nga wudez meekwerek e, ta', a pa fa mey nga zlanday. A təldara a Yesu a amba a sasəba. <sup>49</sup> Ama ndəhay mekele a ləvam: «Səkwakwa, amba ya nəkakwa da wara cay Eli a, a sawa nga ləhda kwa.»

<sup>50</sup> Yesu a wudey ta gədan saya, pam! a məcəy. <sup>51</sup> Daa \*Way nga Gazlavay na, zana ma gərca \*Slam masa Gazlavay aa da hwad a daha. Masa

Yesu ma mōcey la na, zana ha, a ngōrey cew dōga da vad kasl a hwayak. Hwiyak a wusey, bōler \* hay a bōzlam, <sup>52</sup> cōvay hay a wuram, ndōhay nga Gazlavay mamōctakaya ga, a slōkdamawa daa memōcey. <sup>53</sup> A bamawa daa cōvay. Fa dōba nga maslōkdāwa nga Yesu na, ndōhay a, a diyam aa berney nga \*Jeruzelem, berney nga Gazlavay. Fetedē, ndōhay ga a hōtmatar.

<sup>54</sup> Mahura nga sewje hay nga Rawma hay ta sewje aṅga hay ma jōdmara Yesu heyey, a hōtmar hwiyak ma wusey ta cek hay mekele ma kam heyey na, a zluram ga, a lōvam: «Fara fara ndaw kedē na, ara Bōzey nga Gazlavay.»

<sup>55</sup> Ngusay ga fetedē daha, ata fa nōkam dey da dōreṅ, da dōreṅ. Ngusay a ta sōpmar wurzay nga Yesu la dōga da \*Galile fa jōnmara. <sup>56</sup> Da wuzlah ngusay a na, \*Mari da Magdala, Mari mamanṅ nga ata \*Jak ta \*Jawzef, leṅ mamanṅ nga bōza hay nga Zebede.

### *A jōhmara vagay nga Yesu*

*(Mark 15.42-47; Luk 23.50-56; Jan 19.38-42)*

<sup>57</sup> Ta pas ngaa kwad a ṅgene, ndaw masa-zleley da slala Arimate daha, mezōley \*Jawzef, aṅga may, ara \*ndaw ma tōba mey nga Yesu. A wusey a \*Jeruzelem. <sup>58</sup> Ta', a daw a hōtfar Bay Pilat, aa cōfda vagay nga Yesu. Da ray ṅgene, Bay Pilat a, a pōskatar mey a sewje aṅga hay nga vōldamara vagay a, a Jawzef e. <sup>59</sup> A la vagay a, a zlōṅga ta zana mawiya mezlōṅgey vagay.

---

\* **27:51** 27.51 bōler: aṅgwa ma bōzlwa. **27:51** 27.51 Mab 26.3; Heb 10.19-20 **27:54** 27.54 14.33; 26.63; Mk 15.39 **27:57** 27.57-58 Mew 21.22-23

<sup>60</sup> A handa vagay a, aa cəvay mawiya masa anğa maa vərkwā daa anğwa daa đar hay a nğene. Fa dəba ha, a gədbalawa † beeler mahura gazl! fa mey nğa cəvay a, ta', a daw. <sup>61</sup> Ata \*Mari da Magdala ta Mari lanğar daha, manjatakaya fetede, dey pəla! a mey cəvay a.

*Sewje hay nğa Bay Pilat a jədmara cəvay nğa Yesu*

<sup>62</sup> Peperək e, anda meləvey ta \*pas meməskeyvaw, \*bay-ray hay nğa ndəhay ma ka kwakwas nğa Gazlavay ta \*Fariza hay a kusam, a diyam a way Bay Pilat, <sup>63</sup> a ləvmar: «Bay Mahura, ala fa sərfadamara daa masa ndaw membərzley keđe anğa ta dey na, taa guzley la, a ləvey: “Fa dəba nğa đar maakar na, ya sləkđawa la daa meməcey.” <sup>64</sup> Anda keđe, pəskatar mey a sewje akah hay amba a jədmara cəvay a haa đar maakar, daa ba na, gula anğa hay a da samawa nğa lalamara vagay a. Fa dəba ha, a da mbərzlam, a da ləvam: “Yesu ta sləkđawa sem daa meməcey.” Membərzley ata nğene na, a da fəna membərzley nğa ndaw aha masa nğeeme heyey.»

<sup>65</sup> Pilat ta', a mbəđdatara a ndəhay a, a ləvtar: «Ehe, nğəlmata sewje hay keđe, diyam jədmara cəvay a maaya maaya anda akwar ma wudam.»

<sup>66</sup> Ta', a diyam nğa jədmara cəvay a maaya maaya. Anda keđe, a slərbamara mey nğa cəvay a maaya maaya. Fa dəba ha, a pam sewje hay nğa jədmara.

---

† **27:60** 27.60 gədbalawa: gədkalawa      **27:63** 27.63 12.40  
**27:64** 27.64 28.13

## 28

*Yesu a sləkɗawa daa meməcey  
(Mark 16.1-10; Luk 24.1-12; Jan 20.1-10)*

<sup>1</sup> Fa dɔba ŋga \*pas meməskey-vaw, ta pas luma ŋga Gudal, \*Mari da Magdala ta Mari lanɗar daha a diyam ta slam bɛŋ-bɛŋ ŋga nɛkmərwa cɔvay ŋga Yesu. <sup>2</sup> Wure wure ŋgene hwiyak a wusey gɛɗ-gɛɗ ta gɔɗaŋ. Daa ŋgene maslaŋ ŋga Gazlavay da vad a pawa salay, a gɛɗbala beeler mahura da mey cɔvay heyey, a njeɣ a ray a. <sup>3</sup> Maslaŋ a, dey aŋga a wedey anda var ma zɔmey, zana fa vaw aŋga a wedey mabara ndɔɗ-ndɔɗ anda gagɔmay. <sup>4</sup> Sewje hay ma jɔɗa cɔvay heyey ma hɛtmar cek aha na, a zɛluram ga, aa wasam pɛr-par! a tɔɗam a hwayak, ata anda ndɔhay mamɔctakaya.

<sup>5</sup> Ta', maslaŋ ŋga Gazlavay heyey aa guzɛtar a ŋgusay a, a lɔvtar: «Akwar na, ka da zɛluram ba, ya sɛra ka sɔpam na, Yesu, ndaw masa ata ma dɛrmara fa hwadam mazlaŋgalakaya heyey. <sup>6</sup> Aŋga fedɛ daa saba, ta sləkɗawa sem daa meməcey anda aŋga maa guzɛley heyey. Samawa nɛkmara slam masa ata ma pamara vagay aŋga ha a hwad a tiya! <sup>7</sup> Cay na, diyam fiyaw fiyaw, lɔvmatar a gula aŋga hay: "Yesu ta sləkɗawa sem daa meməcey. Aŋga sem teesɛɗ fa mey akwar ŋgada \*Galile, ka da hɛtfamar fetedɛ." Mey adaw ŋgada akwar na, ara kedɛ.»

<sup>8</sup> Ŋgusay a, a mbɛkdamərwa cɔvay a, a hwam fiyaw fiyaw ŋga kadamatara mey a, a gula aŋga hay heyey. Daa ŋgene mandɔrzay fa katar, ama

faa sɔmam ga. <sup>9</sup> Ta', Yesu heyey a daw a cadata ray, a catar har. Masa ngusay a ma hɔtmar Yesu la na, a ngɔcham a cakay a, a ragadamar, a kɔrzamara fa salay. <sup>10</sup> Ta', Yesu aa guzltar, a lɔvtar: «Ka zɔlram ba, diyam ta wuzdamatara a mɔlma adaw hay siya na, nga diyam a Galile. A da hɔtmaya fetede.»

*Mey nga sewje hay ma jɔɔmara cɔvay*

<sup>11</sup> Daa masa ngusay heyey ata daa cɔved aran na, sewje hay siya da wuzlah sewje hay ma jɔɔa cɔvay heyey, a vɔham aa berney. A kadamatara cek ma key cɔpa da mey cɔvay heyey ngada \*bay-ray hay nga ndɔhay ma ka kwakwas nga Gazlavay. <sup>12</sup> \*Bay-ray hay nga ndɔhay ma ka kwakwas kaa heyey, ta', a kusam ta mahura hay nga \*Jɔwif hay, a slam yawa da wuzlah ata. Ta', a vɔlmatar dala ga ngada sewje hay a, <sup>13</sup> a kɔtmata, a lɔvmatar: «Diyam, wuzdamara a ndɔhay, lɔvmatar: “Gula hay nga Yesu a, ta samawa sem ta tavad, ta lalamara vagay a sem daa masa ala manatakaya daa dar.” <sup>14</sup> Da bay nga hwayak ta cɔnda la na, ya sɔpam cɔved la nga wuzdamara mey a maaya maaya amba a tɔba. Anda keɔe, kwa mey fa da hɔtfakwar daa ba.» <sup>15</sup> Ta', sewje hay heyey dɔba, a tɔbmara dala ha, a diyam a kamara anda ata ma kɔtmata heyey. Ara maja ngene haa wure keɔe fa kadamara mey a da wuzlah Jɔwif hay cɔnga.



*Yesu, a wuztar vaw a gula anğa hay  
(Mark 16.14-18; Luk 24.36-49; Jan 20.19-23;  
SNM 1.6-8)*

<sup>16</sup> Gula hay nga Yesu kuraw a ray a letek a diyam a \*Galile, a tɔpam aa ray nga anğwa masa Yesu ma lɔvtar nga diyam a hwad a heyey.

<sup>17</sup> Daa masa gula hay a ma hɔtmar Yesu la na, ta', a ragadamar. Ama siya hay da wuzlah ata na, ta sɔrmara ara Yesu fara fara na, daa ba.

<sup>18</sup> Yesu ta', a nğɔchey a cakay ata, a lɔvtar: «Gazlavay ta vɔldiwa gɔdan sem nga wa slam da vad ta slam da hwayak cɔpa. <sup>19</sup> Maja nğene, diyam fa sɔkway hay da bɔla cɔpa, tɔrdamata nga ndɔhay adaw hay. Kamatar \*baptem ta mezɔley nga Papay, ta mezɔley adaw, yah Bɔzey anğa, leŋ ta mezɔley nga Mesɔfney anğa.

<sup>20</sup> Asaya, sasɔrkadamata amba a tɔbmara mey hay tabiya masa yah maa sɔrkadakwara. Yaw, sɔrmara, yah na, yah ta akwar mandaw mandaw haa mendɔvey nga bɔla.»

---

**28:16** 28.16 5.1; 26.32; 28.10    **28:17** 28.17 14.31    **28:18** 28.18  
Dan 7.14; Mt 11.27    **28:19** 28.19 sɔkway hay da bɔla cɔpa:  
10.5-6; 24.14; Mk 16.15; Lk 24.47; SNM 1.8; CWJ 7.9; kamatar  
baptem: Mt 3.15; Mk 16.16; SNM 2.38; 8.36; 1Kwr 1.13-16; Ef 4.5;  
Jan 3.22; 4.1-2; Rm 6.3-4; Papay, Bɔzey anğa, leŋ Mesɔfney anğa:  
2Kwr 13.13; SNM 2.38; 8.16; Rm 6.3, 4; Gal 3.27; Kwa 2.12    **28:20**  
28.20 1.23; 5.2-7, 27; 11.28-30; 18.20

**Mejəwey-mey Mawiya**  
**Mofu-Gudur: Mejəwey-mey Mawiya New Testament**  
**Le Nouveau Testament en langue Mofu-Gudur**  
**(Cameroun)**

copyright © 2007 Wycliffe Bible Translators, Inc.

Language: (Mofu-Gudur)

Contributor: Aramaic Bible Translation, Inc.

All rights reserved.

2020-11-19

---

PDF generated using Haiola and XeLaTeX on 21 Feb 2024 from source  
files dated 29 Jan 2022

2b021919-36cf-59da-a35f-10c5e5548811